

**NATIONAL ASSEMBLY OF  
SEYCHELLES**

*Thursday 11<sup>th</sup> March, 2021*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**SEYCHELLES FIRE &  
RESCUE SERVICES AGENCY**

**MR SPEAKER**

Mersi. Bonzour tou Manm Onorab. E bonzour nou lodyans. Nou pe kontinyen avek *Appropriation Bill* e nou pe pran Bidze Seychelles Fire & Rescue Services Agency. Nou ava apel bann zofisyé silvouple. Nou a fer sa e nou a move dan Staz Komite.

Bonzour tou delegasyon Minis Errol Fonseka pou *Internal Affairs*. PS These parey labitid PS pou Finans. Mr Jude Commettant, *Director of Public investment and Assets Management*. E Mr Albert Rose, *Chief Fire Officer*. Mr Roy Lemiel, *Director Human Resources and Budget*. E Mrs Marie-Helene Pierre, *Senior Accountant*.

Nou a konmans lo Bidze Seychelles Fire & Rescue Services Agency, lo paz 297 ziskan 305 pou en total R100 milyon 249mil. Minis ou a fer lentrodiksyon silvouple.

**MINISTER ERROL FONSEKA**

Mersi Mr Speaker. E bonzour Mr Speaker. Bonzour Onorab Lopozisyón, Onorab Pillay. *Leader of Government Business* Onorab Georges, tou bann lezot Onorab, e tou dimoun a lekout.

Ozordi nou prezant nou Bidze pou Lazans Tenny Dife ek Sovtaz. Sa Lazans Tenny Dife ek Sovtaz in ganny propoze en alokasyon R100milyon 248.817 pou lannen 2021. E i en logmantasyon 45poursan konpare ek Bidze 2020.

Stasyon Dife Anse Royale pou konplet sa an Novanm 2021. Alors provizyon in ganny fer dan Bidze pou zofisyé ek staff adisyonnéll pou sa stasyon Anse Royale. Lo kestyon servis ek komodite, an zeneral i annan serten rediksyon R206mil 340 dan depans pou lofis. Nou annan en rediksyon dan servis ek komodite de R110 mil dan *stationary* ek *printing*. E osi en rediksyon de R105mil pou delo lo legzersis ki'n ganny fer lo zot bezwen aktyel.

Dan transportasyon ek *travel cost*, nou osi annan en rediksyon lo la R230mil 700. Sa en rezulta ki nou bann plan pou voyaze aletranze osi in ganny redwir. E osi bann *allowance* ki vin ek sa bann vwayaz. Bann *allowance* nou'n ganny en rediksyon de R50 mil ladan.

Pou reparasyon ek *maintenance*, an zeneral i annan en rediksyon R681, 997 mil. E ladan i osi annan sa rediksyon 200mil lo Bidze pou bann pti travay *maintenance* ki bezwen ganny fer. Nou osi nou annan en logmantasyon ladan *still*. Menm sa rediksyon i annan logmantasyon R325mil pou bann pti travay reparasyon pou stasyon Anse Boileau *Headquarters*, e osi La Digue.

Nou annan en logmantasyon R252mil pou *maintenance* bann lekipman tenny dife. E sa i reste parey kantite ki ti ganny donneen lannen pase. Akoz lannen pase ti annan en pti rediksyon, me *still* pou annan sa bezwen sa voyaz. Alor in ganny kite parey.

Pou lezot servis ek komodite nou annan en logmantasyon R162mil 271 mil. Sa i enkli en logmantasyon R190mil dan alokasyon pou pey lasirans transpor. Sa i pou lasirans 2 masin tenny dife

adisyonnel ki sa lazans pou annan an 2021.

Ladan osi i annan en kou R60 mil pou lasirans bato. E dan '*minor capital outlays*' nou annan en logmantasyon R22 milyon, sa lokasyon i provizyon pou ranplas 2 masin tenny dife *as sonm* 11milyon. E osi pou rod ase en gro masin e en mwayen *medium* masin tenny dife pou nou nouveau stasyon Anse Royale.

Dan nou proze '*capital outlay*' nou annan en logmantasyon R6.5 milyon. E sa i pou konplet sa louvraz ki pe ganny fer lo stasyon Anse Royale. Lo kestyon *training* Mr Speaker, nou annan plizyer cours pou bann zofisyen tenny dife dan Lenstiti Guy Morel, e osi *Seychelles Maritime* pou *skipper courses*. E plizyer *short courses*.

Me selman *training* parey mon'n remarke dan bann lezot departman, i sa pli gro defayans, e pou nou Lazans Tenny Dife i regretan ki nou stasyon Praslin i pli byen ekipe lo kestyon *training* ki nou *main* stasyon la isi anvil. E parey zot konnen sa louvraz i neseser ki tou bann zofisyen i *top fit* pou zot fer zot *response*.

E pa en keksoz, sa bann *fire officers* zot pe travay dan sityasyon reel. Menm bomaten,

5er ekek bomaten Baie Lazare ti annan en lensidan dan en pti *Butchers shop* e zot la toultan.

So i pa en keksoz ki, *training* pa en keksoz ki sipoze arete. I sipoze pran par zot *daily* aktivite. Be lefe ki ler ou vizit sa landrwa i zis regretab. So sa i en keksoz ki vreman si i annan okenn priyorite limero 1, i sa ki nou bezwen fer.

E menm sa lokasyon kot nou *main Fire Station* i ete, i dan en lokasyon *Red Zones*, difikilte. E la lo sityasyon transpor, trafik, ensidswit. I demande ki en novo landrwa i ganny idantifye pou nou *main Fire Station*.

Mr Speaker, bann diferan *achievement, challenges*, ek nou bann *strategic priorities* zot pou war zot pou lir. Mon pa pou al an detay dan tou sa bann zafer, me sa zot kapab fer referans ek sa bann *headings* pou war ki plan ki nou CFO i annan.

Alor mon ava *end* an se moman e les bann Manm Onorab pran kestyon lo Bidze *Seychelles Fire and Rescue Service Agency*. Mersi Mr Speaker.

## **MR SPEAKER**

Mersi Minis. Mon a verifye mon lalis pou bann ki'n demande pou koze. Onorab Henrie,

William, Samynadin, Arissol, Roucou, Woodcock, Esparon, Mondon, Loizeau, Bastienne, Roucou. Ghislain, Uranie, Cosgrow, Gabriel, Gill, Aglae, e Lemiel.

La i la bann ki mon annan, e osi Onorab Pillay byensir. Wi Onorab Porice, wi. Byen nou a komanse, mon demann bann Manm, mon pe rapel zot pou disiplinen avek letan silvouple. Mon pe met en limit ki zot lev 3 pwen, komanter oubyen kestyon.

E yer mon'n remarke i annan bann pti taktik en pti remark an pasan a lafen. Sa bann pti remark anpasan a lafen i osi kont en pwen ki ou pe lefe. Alor mon pou apel ou ler ou al tro long. Mersi.

Nou a konmanse. E nou a komans avek, annou komans avek Onorab Roucou. Roucou Michel mersi.

## **HON MICHEL ROUCOU**

Bonzour Mr Chair. *Welcome panel*. Mr Chair mwan mon pou al en pti pe dan zot *challenges*. Kot zot in koz en pti pe kote zot lokasyon. Kot zot baze, zot *main* baz la anvil. Nou'n war akoz mon distrik osi tou nou vreman konsernen avek sirtou kot sa bann gro soz SEYPPEC i ete la. Si zot kapab koz en pti pe lo la, ki zot plan. Si zot annan plan pou

zot *relocate* dan le fitir pou ganny en lot landrwa.

Apre osi zot in koz en pti pe lo kote bann volonter dan bann, pou *train* ban dimoun, bann sivilyen pou ed zot konbat kont zour i annan en lensidan dife. Mwan mon anvi demann zot lo sa bout. Ti annan en programm ki zot ti'n komanse avek bann zabitan lo bann *housing estate*. Pou vi ki sa bann zabitan zot reste dan bann lakaz sirtou bann blok *flat* ki si demen i annan en dife, ki zot programm lo la? Eski zot pou kontinyen fer li?

E mon trwazyenm kestyion i en pti pe lo kote sa *digit* ki zot pe koz lo la. Mon mazinen zot pe dir sa 3 limero ki bann rezidan i sipoze *call* si demen i annan en *emergency*. Mersi Mr Speaker.

### **MR SPEAKER**

Mersi Onorab Roucou. *Panel* parey labitud lev lanmen pou reponn. Amwen ki Minis i endike lekel ki pou reponn.

### **CHIEF FIRE OFFICER ALBERT ROSE**

Mersi Mr Speaker. Bonzour Mr Speaker. Bonzour tou Manm Onorab. Pou ou kestyion Onorab Roucou, kot i konsern lokasyon kot *Fire Service* i baze aktyelman, si ou le parey Minis

in fer sorti o paravan, nou dan en *Red Zone*. Kot nou antoure si ou le avek Por, *SEYPEC*, Elektrisite, *STC*.

E si nou a rapel pa tro bokou letan, an *Kuwait* ti annan en leksplozyon kot en por kot bokou dega ti arive. E nou dan *Fire Service* nou annan bokou konsern dan sa laliny. Kot nou ete la nou baze i annan Por. I annan bokou bann kemikal, bokou bann keksoz ki pe antre la.

E si nou kontinyen reste la dan lefitir nou santi ki i pou en danze pou nou. So dabor nou'n met devan e nou anvi *reallocate Fire Service* si ou le dan le fitir. Nou konnen a ler aktyel la pou lemoman i pa posib. Me selman nou pe, nou'n konsider avek Gouvernman pou revwar en lot landrwa pou *reallocate Fire Service*.

E osi letan i annan bann *emergency*, nou santi ki nou ganny bokou konzesyon. Kot parfwa nou pa kapab pase i annan tro bokou transpor lo semen. E si nou kapab ganny en landrwa ki en pti pe pli ideal pou nou kapab *locate*.

Kot i konsern travay volonter, mon krwar. *Ok 3 digits*, si ou get *3 digit* parey ou vwar la letan nou ti'n met sa nou pa ti ankor ganny konfirmasyon ki nou pou ganny

en 3 digit. So lately travay in ganny fer dan sa laliny kot nou'n ganny konfirmen ki nou pou ganny en 3 digit.

Rezon ki nou'n rod sa se letan i annan en *emergency*, pe servi 999 pou lemoman. Kot tou *call* i pas atraver santral Lapolis. E ler en *call*, en dimoun i *call bann dimoun* dan *control room* Lapolis zot pran ban lenformasyon, avan ki zot *relay* sa *call* kot *Fire Service*. E ler sa *call* i ganny *relay* kot *fire service*, parfwa bann dimoun i demann nou si nou pe demann menm kestyon ki zot in fini dir avek Lapolis?

So nou, nou pe demann en 3 digit si ou le kot ler i annan en *emergency* nou *call* i a vin direkteman dan nou *control room* kot *Fire Service*. Instead of pas an traver Lapolis si ou le li menm kot parfwa i vin problem. Parfwa i annan delay dan kolekte lenformasyon. Mersi Onorab.

### **MR SPEAKER**

Mersi. I reste kestyon lo volonter. Minis wi.

### **MINISTER ERROL FONSEKA**

Mersi Mr Speaker. Mersi Onorab. Pou kestyon lo *voluntary fighting force*. I en keksoz ki mon krwar, mon ler mon'n get sa mon eksite. Akoz i

en keksoz byen neseser. E nou bezwen osi devlop dan pei sa nesesite *civil duties*. *Civil duties* i form par kot sitwayen i konnen i annan en bout osi li pou zwe.

So i annan en kantite rannman dan keksoz koumsa. I fer dimoun, i vin parey en *club* si ou le dan diferan distrik. Dimoun i asosye ansanm. Me pa zis pou rabase, pou en *common purpose* en keksoz byen serye. E i annan en kantite keksoz zot kapab aprann osi. Kot zot kapab aprann diferan *challenges*.

E sa zafer i pa neseserman pou dimoun ki pa pe travay. Non. I pou dimoun ki annan en travay ki apre dan Sanmdi dan Dimans *whatever*, i donn en serten letan pou fer serten *training*. E sa lespri *civil duties* i en keksoz ki nou bezwen devlope dan diferan lorganizasyon si ou le. Akoz en kantite nou bann problem i kapab ganny rezourd si dimoun pe *think* anliny ek sa.

Si bann kominote pe travay ansanm. Alor mwan mon eksite lo sa bout. E mon ti ape zis koz ek *CFO* bomaten, premye keksoz i ti ape koz ek mwan *the need for finance*. Ou bezwen serten Bidze ki enportan. Me *the motivation* i sa *volunteer side of things* ki pli

enportan ki nou bezwen vann.  
Ok? Sa *civil duties volunteerism*.

E i pa zis dan keksoz koumsa, parey ou war dan *Red Cross* dan lezot keksoz. Be dan *Fire Service* i en bout ki nou bezwen travay lo al. Mersi Mr Speaker.

### **MR SPEAKER**

Mersi. Onorab Bastienne.

### **HON DESHEILA BASTIENNE**

Bonzour Mr Chair. Bonzour Minis avek ou delegasyon. Bonzour tou dimoun a lekout. Bonzour tou koleg Onorab. Mr Chair, mon kestyon i al koumsa. An referans avek sa Bidze pou *SFRSA*, eski i annan okenn alokasyon pou ed sa servis detekte ouswa fer en swivi lo bann *prank calls* ki dimoun pe kontinyelman fer? Pou evite ki sa servis i fer bann deplasman initil e ki byensir sa i al ek en kou? Mersi.

### **MR SPEAKER**

Mersi Onorab. *Panel* lev lanmen silvouple sa ki pou reponn. Wi Mr Rose.

### **CHIEF FIRE OFFICER**

#### **ALBERT ROSE**

Mersi Onorab Bastienne. Mon krwar sa size ki ou'n touse i vreman en size esansyel pou *Fire Service*. Si ou le letan nou

vwar nou *statistic* souvandfwa nou'n war ki dan en lannen nou'n *respond to* en 10, 15 bann *false call* ki nou gannyen.

En dimoun zis i deside *call* ou dir ou i annan dife dan tel lakaz, oubyen tel lakaz. E letan ou'n arive i napa naryen. San i realize ki i pe met en danze pou, *Fire Service* li menm ler ou pe deplase ou pe *either* kekfwa ou pe fer en *speed* pou ariv laba. E i annan lavi dan sa transpor ou fer aksidan, e i vin en problem pou sa lazans li menm.

Si ou le nou'n sey, sak fwa i annan bann *call* koumsa nou sey *trace* kote nou kapab ganny sa bann dimoun ki pe fer sa ansanm avek Lapolis. Me parfwa i difisil. I annan de fwa sa bann dimoun ki fer sa zot pou pret en telefonn ek en lot dimoun, ouswa zot fer li malisyezman. Me i difisil pou nou kapab. *Unless* fodre nou annan en sistem ki nou *set up* pou nou kapab vreman detekte letan bann dimoun pe fer sa bann *call* parey. Mersi.

### **MR SPEAKER**

Mersi. Minis wi.

### **MINISTER ERROL FONSEKA**

An relasyon ki *CFO* in dir. Zis mon anvi re asir zot ki mon a diskrit sa ek li, akoz nou annan fason pou nou kapab *follow that*

*up si i arive. So rest assure nou pou kapab fer sa. Mersi.*

### **MR SPEAKER**

Mersi. Onorab Ghislain.

### **HON CHANTAL GHISLAIN**

Bonzour Mr Speaker. Bonzour tou dimoun e bonzour Minis osi tou avek delegasyon. Mon kestyon i pou CFO. Pli gro defi zot lazans sete, si mon kapab dir pli gro defi pou nou bann zonm e fanm dan Servis Tenny Dife se sa dife lo *landfill*. And nou konnen ki i pase lo en *landfill*. Kwa ki konpri bann keksoz ki laba lo *landfill*.

Anba *current challenges* mon war zot, zot in met sa *inability to attend to hazardousness waste ouswa hazmat*. Ki osi enkli bann lensidan kot bann site dizon ki annan bann *hazardousness waste*. Ouswa bann keksoz *hazard* ki *hazardous* pou lasante nou bann *fireman*.

And lo la mon war zot, zot pe rod en *specialized hazmat tender*. Mon ti a kapab demande konbyen i koute enn sa, enn sa *tender*? Ki mon vwar ki letan mon pe fer resers lo la, mon vwar i kout ase ser, i annan tou lezot lekipman.

Dan zot Bidze mon pa vwar, eski i annan sa dan zot Bidze? Ouswa zot ti demande

zot pa'n gannyen? Ki bann lezot lekipman ki zot annan dizon par egzanp *uniform* pou sa bann dimoun kapab al laba.

Apre osi nou'n vwar i annan en pe letan deza, ti komans avek *Ocean Gate House*, kot nou'n vwar letan zot in fer renovasyon zot in met *cladding* lo zot *building*. E la zis la kot *fuel station* la, nou vwar en lot *building* pa ni menm, mon kapab dir pa ni menm 50 met avek kanmarad. I annan en lot *building* ki pe monte la. E mon war zot pe komans met *cladding* lo la.

And nou konnen ki zistwar *cladding* ki ti arive Langleter kot sa dife ti brile. Mon kestyon i lekel ki fer teste. Eskei letan sa bann *cladding* i ariv Sesel, eskei zot teste sa *metallic cladding* ki fer li pa *hazardous*? Ouswa sa bann dimoun zis i vini i fer zot, zot met zot *cladding* lo zot *building* san ki *Fire Services* i annan en apersi ladan? Ouswa i annan en mo pou dir si sa materyo i bon pou servi pou met bann *building*?

Akoz nou tou nou konnen poudir *cladding*, kekfwa pa tou dimoun ki konnen. Si i fer resers *cladding* i en materyo ki letan i ganny mete lo la, *once* ki ou anvoy delo lo la dan dife i enzekte en kemikal ladan ki fer

flanb pli bokou. So mon kestyion i dan sa laliny koumsa. Mersi.

### **MR SPEAKER**

Mersi Onorab. *Panel.*

### **CHIEF FIRE OFFICER**

#### **ALBERT ROSE**

Mersi Onorab Ghislain pou ou kestyion. Kot i konsern *landfill*. Si ou le nou napa lekipman vreman ki pou dil avek bann sityasyon *landfill*. E mon krwar dernyen fwa letan ti annan en dife *landfill* ti annan en mal konprenezon kot dimoun pe dir ki *Fire Service* napa lekipman.

*Fire Service* li menm i annan lekipman, me selman i annan serten lekipman ki ler dife i pran lo *landfill* nou napa. Si ou le nou napa bann daf, nou napa *excavator*, kot pou nou kapab *excavate* sa landrwa. E servi daf al rod *corafil* ouswa soz pou kapab dil avek.

E sa letan i arive nou bezwen rod lasistans avek ban konpannyen, bann ki enterese pou ed nou dan sa laliny.

Ou dezyenm pwen i si nou annan lekipman pou *attend* bann *emergency* ki *involve chemical?* Wi i annan lekipman. Malgre i pa sifi sa kantite, me nou annan pou nou kapab, letan en sityasyon i arive pou nou kapab dil avek.

Kot i konsern *cladding*, kot ou pe koze lo sa 2 *building*. Mwan personnelman mon pa ti vreman okouran. E parfwa i annan bann kontrakter ki konstri bann *building* ki parfwa *Fire Service* napa en *say* ladan. Ouswa parfwa ou war *building* zis i monte e *Fire Brigade* pa tro konnen.

E parey nou'n ete, nou annan nou regilasyon ki nou pe preske fini travay lo la. Kot si ou le pou lemoman nou napa bokou ledan pou nou kapab morde si ou le. Kot ler nou regilasyon i a vin an fors, so nou a dan en pozisyon pou nou kapab dil avek nenport ki sityasyon ki arive dan pei.

So nou regilasyon nou ti ava'n preski fini travay lo la. Vi ki avek sa sityasyon ki nou konnen nou menm *COVID* la. E nou ti bezwen arete, *stop* en kou lo la. E la prezan nou pou bezwen repran e fer sir ki nou regilasyon i vin an fors pou nou kapab dil ek bann sityasyon.

Kot i konsern *hazmat truck*; sa nou pa'n anvoy kot Minister Finans sa lanmen. Vi ki nou ti konpran mannyer sityasyon i ete. Me selman dan *mid-year review* nou pou anvoy en *request* pou nou kapab ganny en *hazmat truck* Sesel. Akoz i annan bokou kemikal ki pe antre. I annan bokou bann

keksoz danzere ki pe antre. E nou santi ki nou bezwen annan enn sa transpor kot pou nou kapab kordin bann lensidan letan i arive. Akoz pou lemoman nou santi nou en pti pe napa lekipman pou kapab dil avek sa sityasyon. Mersi.

### **MR SPEAKER**

Onorab Ghislain ou a termin avek en klarifikasyon silvouple. Mersi.

### **HON CHANTAL GHISLAIN**

Mersi Mr Speaker. So CFO eski ou pe osi konfirmen ki le 2 *building* an se moman, enn dwat dan milye lavil, enn zis o-bor *fuel station* kot i donn bennzin la. I 2 *building* an se moman ki pli a risk *and* pli *unsafe* dan nou lavil Victoria? Mersi.

### **MR SPEAKER**

Mersi. CFO.

### **CHIEF FIRE OFFICER ALBERT ROSE**

Mersi. Ou konsern ki ou'n *point out* la, i ti osi mon konsern akoz mon osi mon pas dan sa landrwa laba lo, mon'n sey pran serten bann lenformasyon dan sa laliny. E mon pe sey vwar, e mwan mon ti annan serten vreman konsern letan mon ti vwar en *building* parey pe ganny

fer o-bor *SEYPEC*, o-bor *SHELL* si ou le.

Kot demen si i ariv en problemm vreman i pou en katastrof dan sa landrwa. E nou pou sey kontinyen travay lo la e vwar ki mannyer nou kapab rezourd sa problemm.

### **MR SPEAKER**

Mersi. Onorab Philip Arissol.

### **HON PHILLIP ARISSOL**

Mersi Mr Chair. Bonzour tou dimoun. Minis mon war dan, mon'n get dann '*maintenance and repairs*' i annan *maintenance* pou masin lekipman e batiman *SFRSA*. Me lenspeksyon e *maintenance* lo bann *fire hydrant* pa aparet. Alors eski *panel* i kapab dir mwan, lekel ki responsab pou fer lenspeksyon ek *maintenance* lo *fire hydrant*? Konbyen fwa eski lenspeksyon i ganny fer par lannen?

Ki fason ki bann landrwa i ganny idantifye pou enstal bann *fire hydrant*? Konbyen i koute? E eski i annan demann pou plis *fire hydrant* dan pei? Mersi.

### **MR SPEAKER**

Mersi. *Panel*.

### **CHIEF FIRE OFFICER ALBERT ROSE**

Mersi Onorab Arissol. Kot i konsern *fire hydrants; maintenance* pou *fire hydrant* i ganny fer par *Fire Service*. Me *repairs* i ganny fer par *PUC*. *Fire hydrant* i propriete *PUC*. E nou, nou servi *fire hydrant*, nou fer *maintenance*, nou rod bann lapentir ki ou war ki bann lapentir zonn la ki demarke ki ou war ki detekte poudir i annan en *fire hydrant*.

E sa nou ti fer *maintenance*. E konbyen fwa nou fer li? 2 fwa par lannen nou fer li. Mon krwar petet Anse Boileau ou'n kapab war nou bann *staff* parfwa pe pase pe fer bann lenspeksyon pe *maintain* sa bann *fire hydrants*. E mon pa'n atrap ou dernyen kestyon *please?*

### **MR SPEAKER**

Ou premye kestyon ti lo *maintenance*.

### **HON PHILLIP ARISSOL**

Ok ki fason ki sa bann landrwa i ganny idantifye pou enstal bann *fire hydrant* e konbyen i koute? Apre eski i annan plis demann pou *fire hydrants*?

### **CHIEF FIRE OFFICER ALBERT ROSE**

Costing pou *fire hydrant* i pa tonm lo *Fire Service*. Se costing i *PUC*. I tonm anba *PUC*. Si i

annan demann pou plis *fire hydrant*? Wi i annan demann pou plis *fire hydrant*. I annan bann landrwa ki letan nou pe fer bann *survey* nou pase, nou vvar ki i neseser annan *fire hydrant* pou kouver bann batiman ouswa bann keksoz ki la. E sa nou anmenn dan latansyon *PUC* nou les zot konnen.

Si ou le nou travay an tre konzwentman avek *PUC*. Nou travay tre an kolaborasyon avek kanmarad, kot letan i annan en problem nou les zot konnen ki arive avek *fire hydrant*. Parfwa letan ou dan sa laliny *fire hydrants* se nou ganny bokou problem avek bann dimoun ki *resurface* semen.

Kot sa zot konsyan poudir en *fire hydrants* i kout bokou larzan. E ki zot fer se zot kouver bann *fire hydrant* avek si ou le koltar, letan zot in mete ensidswit. E sa i annan serten konsern, e mwan mon santi petet letan zot ti pe al met koltar si ou le dan serten *area*, ti bon ki zot envit *Fire Service*.

Petet i ava ed zot pou zot pa kouver sa bann *fire hydrants* akoz sa bann *fire hydrant* i enportan. Si i ariv nenport lensidan nou, nou pe *rely* lo *fire hydrants*. Letan nou ariv laba *fire hydrant* pa la in kouver.

Nou santi nou dan en lanbara.  
Mersi.

**MR SPEAKER**

Mersi. Onorab Roucou Clive.

**HON CLIVE ROUCOU**

Mersi Mr Speaker. Bonzour Minis avek ou delegasyon. Mr Speaker mon premye kestyon for CFO. Se lo *program 2, emergency operation*. Mon war en gran logmantasyon sorti 51.9milyon pou plis ki 83 milyon. En logmantasyon pre 31.4 milyon.

Me selman ler mon get dan zot *table 6* zot bann *target* i reste plizoumwen parey. Alors mon le ki ou eksplik sa Lasanble pou sa gro logmantasyon. An relasyon avek *purpose* sa programm li menm.

E mon dezyenm kestyon se lo *program 4. Lifeguard. Lifeguard Services*. Mon war en bidze en pti pe plis ki 4.2 milyon. Me parkont mon war zot bann lans ki zot aktiv avek *lifeguards* i reste *4 throughout from 2020 an montan*. Be still mon vvar en bes dan zot Bidze. Sorti 6.2 pou desann sa 4.2.

Alors mon pe demann CFO si sa i zot *target* e si zot pa krwar ki plis dimoun pe al plis lo bann diferan lans ki zot devret

ogmant lakantite *lifeguard* lo nou bann lezot lans? Mersi.

**MR SPEAKER**

Mersi.

**CHIEF FIRE OFFICER****ALBERT ROSE**

Mon krwar sa kestyon i pou tonm avek nou *budget management* e mon a pas avek li pou li eksplik konsernan *program 2*.

**MR SPEAKER**

Tre byen. Yes. Kote isi lekel ki pe reponn? Mrs Pierre. Wi ok.

**SENIOR ACCOUNTANT****MARIE-HELENE PIERRE**

Bonzour Mr Speaker. Bonzour tou bann Manm Onorab. Egzakteman kwa ki'n ogmante dan *table 2*?

**MR SPEAKER**

Onorab ou a eklersi li silvouple.

**HON CLIVE ROUCOU**

Mersi Mr Speaker. Mr Speaker mon'n fer referans avek zot Bidze total pou *table 2 'emergency operation.'* So mon'n demann zot sa logmantasyon. E zot target dan *table 6* in reste plizoumwen parey an relasyon avek zot *purpose*. So mon pe demande, ou'n konpran

madanm silvouple? *Program 2.*  
*Program 2 table 6.*

**MR SPEAKER**

Ok. lekel ki pou reponn lo *Lifeguard Services?* Wi *PS* kekfwa i kapab anmenn en leklersisman. Wi *PS*.

**PS DAMIEN THESEE**

Bonzour Mr Chair tou Manm Onorab. Bidze *SFRSA* in *increase* partikilyerman dan son ‘goods’ 22 milyon akoz i annan 4 *fire tender* ki nou’n met ladan. 2 ki’n fini konmisyonnen depi lannen pase. Nou sipoze pey son *retainer* sa lannen. Apre nou’n met ankor larzan pou *commission* ankor 2 sa lannen. Ki *by the time* i *manufacture* i fini lannen prosenn nou met son *retainer*.

Akoz nou annan en *replacement plan* pou tou sa bann *fire tenders* ki zot annan. Ki bokou. I *over 20* a *25* an. So sa i plizoumwen akoz ou war sa gran *increase* partikilyerman dan son ‘goods and services’ apepre R22 milyon.

E petet lo *table 6* *CFO* ti kapab eksplike akoz son bann *performance target* i reste parey. Mon krwar i plizoumwen konbyen letan i pran pou ariv lo *scene* 12 minit. Mersi.

**MR SPEAKER**

Mersi. *CFO* apre i annan lot kestyon lo la *Lifeguard Services*. Mon pa konnen lekel antre zot ki pou adrese.

**SENIOR ACCOUNTANT**  
**MARIE-HELENE PIERRE**

Dan *Lifeguard* napa *increase* i plito en *decrease* dan son bann depans.

**MR SPEAKER**

Se tou wi? Annou bouze silvouple. Wi Onorab Roucou leklersisman. Ou dernyen pwen.

**HON CLIVE ROUCOU**

Mr Speaker, i paret mwan madanm pa pe konpran mon kestyon. Wi mon war en *decrease*, mon’n demande si, akoz mon war i kontinyen reste 4 lans ki zot reste aktiv lo la. Alors mon pe demande si zot pa krwar plis lans i devret ganny plis kouver? E ladan menm si sa *Lifeguard Services* i zot *Fire Service* oubyen zis i en servis prive ki zot pe kouver par lo la?

**MR SPEAKER**

Mersi Onorab. *Panel*.

**CHIEF FIRE OFFICER**  
**ALBERT ROSE**

Mersi Onorab Roucou pou ou kestyon. Kot in konsern *increase of patrol* lo *beach* par

lifeguard. Parey nou ti dir letan nou ti isi dan Lasamble lannen pase, Nou ti pou annan en *increase of patrol lo beach*. Premyerman ti pou annan la Digue e osi byen ki Anse Royale.

Rezon ki pa'n ariv sa se ki *lifeguard* nou'n sey nou mye pou ganny bann *staff* pou vin travay dan *Lifeguard Services*. E *response* in prese zero. La Digue nou ti pou ouver en lans si ou le Grand Anse, kot nou ti'n demann en bout later pou met nou *container* osi byen ki lezot akseswar ki *lifeguard* i servi. E ziska aprezan nou pa ankor kapab ganny en landrwa kot nou pou met *lifeguard* si ou le san ouver en *post* pou met *lifeguard*.

Anse Royale mon panse kekfwa avek sa louvertir Stasyon *Fire Brigade*, petet sa i ava en loportinite pou kapab ouver en sekirite laba pou *lifeguard*, pou sa lannen ki pe vini. Me i difisil pou ou ganny *staff* pou antre dan *lifeguard* pou lemoman. Zot pa le vini akoz zot preski ganny en *basic salary*. Sa larzan ki zot gannyen zot pa tro, tro ankouraze. Zot pa le tro, tro vini *Lifeguard Services*.

Nou'n lans en kantite lapel, nou'n al dan lekol partou, Praslin, La Digue. E nou pa ganny dimoun ditou pou vini.

Kot i konsern si *lifeguard* i prive? *Lifeguard* pou lemoman i anba SFRSA. Pa ankor annan *lifeguard* prive. Ti annan demann *so far* ziskan aprezan mon pa vreman kapab dir ou ki zistans i ete. Mersi.

### **MR SPEAKER**

Mersi. Mersi CFO. Onorab Gabriel.

### **MINISTER ERROL FONSEKA**

Sorry mon ti anvi zis

### **MR SPEAKER**

Wi Minis i le...

### **MINISTER ERROL FONSEKA**

I annan en kestyon i ti demande lo sa bann *performance indicator*. Ou kestyon ti akoz si in reste parey. In reste parey akoz i pa en gran keksoz ki pou sanze. I pa en keksoz ki pou sanz lo *monetary influence* sa. I zis en *practical time* ki ava *influence* zot bann ler.

Me selman ler mon get *projections* pou 2022/23 i annan en pti *reduction*. Mon pa tro konnen ki mannyer nou'n *arrive at that*, manke i pou vin pli o kontrer. Akoz mannyer trafik i ete dan pei, so *anyway* sa in la. Be sa 3 lannen avan i parey. Me i pa ganny enfliyans-e par Bidze sa. Plis *particle*. Mersi.

**MR SPEAKER**

Mersi Minis. Onorab Gabriel.

**HON CONRAD GABRIEL**

Mersi Mr Chair. Mon *welcome* Minis ek son *panel*. Dabor zis mon ti a kontan *panel* i eklersi nou. Zabitan mon distrik petet lepep an zeneral. Akoz ki zot pa pe kapab deplase dan bann evantyalite kot en dife i deklare? E dir nou dan ki sirkonstans ki'n zot deploy zot bann masin pou asiste? Sa i enn.

Anba zot '*current challenges*', i annan *shortage of substation to provide adequate coverage*. Eski pa ti en bon nide pou etabli en *substation Point Larue* ki ti a kouver rezyon Les, vi ki zot manda i sov lavi, propriete e lanvironnman? So vi ki Anse Royale pe konstri en nouveau *substation* ki pou kouver rezyon petet dan Sid? Sa i en propozisyon. Mersi.

**MR SPEAKER**

Mersi. *Panel*.

**CHIEF FIRE OFFICER**  
**ALBERT ROSE**

Yes, mersi Onorab pou ou kestyon. Kot i konsern *substation* pou Point Larue sa i vreman en pe difisil pou lemoman. Si ou le nou annan en lakor avek *Airport Fire*

*Service* kot letan i annan en dife dan sa *area Point Larue, Cascade* nou alert zot, pou zot kapab *attend meanwhile* ki nou, nou pe vini. Sa i pe mars tre byen. E nou pa pe ganny difikilte dan sa laliny.

Si ou pe koz *deployman, deployment* to *attend emergency*. I depan ki kalite *call* ki nou'n *resevwar*. Si nou'n *resevwar* en *call* ki i annan en dife dan en lakaz oubyen en batiman. So i annan 3 *fire truck* ki ganny de *plwaye*. 2 *fire truck* avek en *water bowser*. Akoz parfwa i annan difikilte pou ganny delo. Si nou annan en *water bowser* ki asiste sa bann *fire truck* letan zot al *attend* en *emergency*.

Si dife dan lakaz nou deploy 2 *fire truck* avek en *water bowser*. Sa i aplik pou nenport distrik. E si *scale of emergency* i pli larz nou anvoy plis masin. Mersi.

**MR SPEAKER**

Mersi. Onorab Esparon.

**HON REGINA ESPARON**

Mersi Mr Chairman. Mr Chairman anba '*wages and salary in-cash*' i annan en ogmantasyon sorti 51 milyon pou vin 83 milyon. Minis ou'n eksplike ki provizyon in ganny fer pou Stasyon Anse Royale.

Lo kote *manpower* eski zot pou deploy *fireman* sorti anvil pou al travay dan sa stasyon Anse Royale? Oubyen i annan provizyon ki'n ganny fer anba sa Bidze pou nouveau *recruitment*? Si wi konbyen *manpower* zot pe anvizaze pou *recruit* pou deservi sa stasyon Anse Royale?

Epi lo kote *hydrant CFO*. Eski i annan sa kordinasyon ant *Fire Brigade* avek Minister Lakaz letan in annan bann nouveau *housing estate* ki pe fer an sa ki konsern akse pou ganny *hydrant* dan sa bann landrwa? Mersi.

### **MR SPEAKER**

Mersi Onorab. *CFO*.

### **CHIEF FIRE OFFICER** **ALBERT ROSE**

Mersi Onorab Esparon pou ou kestyon. Mon pran konsernan. Mon pou pran 2 kestyon apre ‘wages and salaries’ swa ‘wages in-cash,’ HR i ava rann repons. Kot i konsern *staff* Anse Royale. Wi in fer provizyon dan sa Bidze pou *recruit* 25 *staff* pou Anse Royale. Me selman 1er ou *recruit* 25 *staff* i pran 8 a 9 mwan pou ou kapab *train* bann *staff*.

Pa vedir sa 25 ki nou pou *recruit* nou pou pirman atas zot Anse Royale or komansman.

Petet nou pou mix sa bann *staff* avek serten dimoun ki a sorti anvil avek leksperyans pou al laba pou ed zot e ler zot in pare so zot kapab *run* zot stasyon.

E la i en loportinite pou bann zenn Anse Royale. Pou zot kapab komans prepar zot si ou le pou zwenn sa lafors. La i en loportinite pou zot komans vwar ki bann kriter zot bezwen swiv pou zot kapab komans pran bann form laplikasyon. Komans ranpli pou zot kapab ganny *enroll* si ou le dan *Fire Service*.

Kot i konsern *fire hydrant* lo bann *housing estate*. Wi nou annan en kordinasyon avek *Housing* letan pe al, zot pe al fer bann *flat*. Sirtou dernyerman la, pa avan. Nou pe demann zot pou fer nou konnen letan zot pe al fer bann *flat*, pou nou osi kapab donn en *input* konbyen *fire hydrant* i bezwen mete.

Kantite *fire hydrant* ou bezwen mete. *Train* bann dimoun ki dan sa *housing estate* li menm ki pe al reste dan sa bann landrwa. Sey fer en fason donn zot serten *training* dan sa laliny. Mersi.

### **MR SPEAKER**

Mersi. Wi.

### **CHIEF FIRE OFFICER** **ALBERT ROSE**

Mon krwar i ... i tonm anba nou  
*HR. Wages in-cash.*

**MR SPEAKER**

*Yes, carry on please.*

**MR ROY LEMIEL**

Mersi Mr Chair. Mersi Onorab. Onorab Esparon ou kapab redir nou sa kestyon. Nou pa'n tro konpran.

**MR SPEAKER**

Wi Onorab *micro please.*

**HON REGINA ESPARON**

Mersi Mr Chair. Mr Chair mon war en logmantasyon dan *wages and salary in-cash.* In sorti 51milyon in mont 83 milyon. Mon ti pe zis rod en zistikasyon silvouple. Mersi.

**MR ROY LEMIEL**

Mersi. Sa i an relasyon avek promosyon. Ki ti ganny fer an Desanm. In monte dan zot *basic salary.* Mersi.

**MR SPEAKER**

*Ok Onorab. En dernyen pwen leklersisman.*

**HON REGINA ESPARON**

Dernyen pwen Mr Chair. Mr Chair, mon ti ava anvi demann ek *CFO.* Anvi ki i dir mwan zot annan sa bon kordinasyon pou *fire hydrant* avek *Housing* an se

moman, me pou bann *housing estate* ki'n ganny konstri depi avan. Eski i kapab annan en revi pou regarde komksi?

Parski ler mon pe regard lo kote Glacis nou bann *housing estate* napa *fire hydrant* obor zot. Komksi eski i kapab annan sa revi dan sa kordinasyon pou fer revizyon lo plasman sa *fire hydrant* dan bann *housing estate* ki la an egzistans depi avan. Mersi.

**MR SPEAKER**

Mersi. *CFO.*

**CHIEF FIRE OFFICER**  
**ALBERT ROSE**

Mersi Mr Speaker. Mersi Mrs Esparon. E ou pwen in ganny note nou ava sey nou mye pou nou ganny nou *staff* pou fer en *survey* si ou le, dan sa bann *estate* ki ou pe dir. Petet nou ava pran kontak avek ou pou nou vvar kote bann *estate* ki ou pe koze. So nou a kapab fer en *survey* apre nou'n ava donn ou en larepons. Mersi.

**MR SPEAKER**

Mersi. Onorab Samynadin.

**HON KELLY SAMYNADIN**

Mersi Mr Chair. Bonzour Minis avek *panel.* Mon premye kestyon i konsern *risk allowance.* Lenformasyon ki

mon gannyen se ki bann *firefighters* pa pe benefisyé avek sa *allowance*. E zot ti a kontan konnen si dan sa Bidze Gouvernman pe fer provizyon pou zot gannyen? Vi ki ler i arriv en lensidan dife zot lavi i a gran risk.

*From* sa ki mon'n ganny dir Gouvernman lepase ti pe propoze ki bann *firefighters* i pey zot prop lasirans, e ki zot rann sa ki ti pe deza ganny peye dan zot pos. Si nou ti kapab ganny en lesplikasyon lo la silvouple?

Answit i annan en konsern kot i konsern lekipman. Aparaman sak fwa bann nouvo kanmiyon i vini bann lekipman lo la i touzour parey. Konsern bann *fire fighters* i si i annan en provizyon dan Bidze, pou asire ki zot lekipman apropriye pou travay avek, pou asire ki zot ganny lekipman apropriye pou travay avek.

Akoz dan lepase konsern in ganny met devan me aparaman pa'n ganny adrese. Akoz souvan ler zot al lo *scene* lekipman pa pe fonksyonnen oubyen napa. Par egzanp *hydraulic* ki zot servi pou retir dimoun ki'n pri dan transpor. Si nou kapab ganny en lesplikasyon lo la silvouple. Mersi.

### **MR SPEAKER**

Mersi. *Panel.*

### **CHIEF FIRE OFFICER** **ALBERT ROSE**

Mersi Onorab Samynadin pou ou bann pwen. Premye mon a tous *risk allowance*. Si ou le lannen pase ler nou ti pe travay lo nou *Scheme, SFRSA Scheme*. Nou ti enkli *risk allowance* ladan. Me ler ti'n arriv kot *DPA*, *DPA* pa ti aksepte pou donn nou *risk allowance*. I dir *risk allowance* pa donne. E zot ti fer nou pran sa *allowance* ki nou sipoze gannyen abzorb li dan *inducement allowance*.

Sa ki'n arrive. E sa dimoun ki'n dir poudir i pa ganny *risk allowance*, wi i pa'n gannyen. Me selman son *risk allowance* i ganny abzorbe dan son *inducement allowance*.

Kot i konsern nouvo masin ki vini, pa vin avek lekipman neseser. Sa enn mon krwar sa lenformasyon ki ou'n gannyen i pa tro, tro apropriye. I pa tro, tro korek. Tou bann masin ki vini, *Procurement* i travay lo tou bann lekipman ki nou bezwen pou dil avek en sityasyon en *emergency*. Zanmen in deza vin en masin ki pa'n vin avek en lekipman apropriye.

E mon mon'n la en pe letan dan *Fire Service*, mon konn tou bann lekipman ki servi pou en *emergency*. E se sa bann lekipman ki nou rekomande. Si i annan bann nouvo teknolozi bann ki vin lo marse, nou souye e nou vwar si nou bezwen nou rekomande pou nou gannyen.

### **MR SPEAKER**

Mersi CFO.

### **CHIEF FIRE OFFICER** **ALBERT ROSE**

Eskiz mwan *please*. Akoz mon pa'n tyonbo ou trwazyenm pwen silvouple. Si ou ti kapab.

### **HON KELLY SAMYNADIN**

Mon napa en trwazyenm pwen me selman mon annan en kestyon klarifikasiyon kot i konsern sa *inducement allowance* ki ou dir zot *risk allowance* i entegre ladan. Si ou kapab donn nou enn lesplikasyon silvouple lo sa *inducement allowance*? Ki mannyer sa *risk allowance* i entegre dan sa *inducement allowance* *please*?

### **MR SPEAKER**

CFO.

### **CHIEF FIRE OFFICER** **ALBERT ROSE**

Wi. In entegre ladan *according* sa kantite sa amount ki i ti pou gannyen. *Ok i dir PS...*

### **MR SPEAKER**

*Ok PS i a eklersi.*

### **PS DAMIEN THESEE**

Mersi Mr Chair. Ek bann reform ki'n ganny fer lo kad saler. Ti'n ganny war ki i bezwen *streamline* bann kantite *allowance* ki nou annan. E sak post i annan en evalyasyon ki ganny fer e i annan bann kriter konpetans. Oubyen bann kriter spesifik ki ganny *assess* pou donn ou en *level* lo *wage grid*.

E risk i en konponan sa bann kriter ki mete lo *wage grid*. So sanmenm sa ti'n ganny tire. E parey zot pou war si en *firefighter* son louvraz naturelman ou fini konnen ki i *involve*. So dan sa evalyasyon lo risk i pou *score high*. Solman nou konnen i annan bokou demann ki sa zafer *risk allowance* i retournen.

E sanmenm sa ki mon'n dir nou bezwen revwar nou kad saler e si fodre i annan enn evalyasyon pou nou gete ki mannyer i *meet demann*. Akoz ler nou ti fer reform *back then*, tou bann *allowance* ti ganny *merge* dan *basic*. Be selman nou'n war ki la tou dimoun pe re demann son *risk allowance*.

Zot kontan war sa zafer *risk allowance* lo zot *pay slip*.

So mon krwar pou annan en travay ki ganny fer ki, nou satisfer en pe sa bann demann. Me osi edik travayer Gouvernman ki mannyer kad saler Gouvernman i ete. So sa mon krwar i en priyrite ki nou bezwen fer dan ban mwan ki vini. Mersi.

### **MR SPEAKER**

Ok mon krwar ou'n byen satisfe avek sa repons. Nou a kapab kontinyen. E mon apel Onorab Gill.

### **HON CHURCHILL GILL**

Mersi Mr Chair. Bonzour minis ek ou delegasyon. Bonzour tou Manm. Mon premye kestyon se dan '*minor capital outlay*' i annan en sonm R4 milyon pou nouvo lekipman. Eski dan sa bann nouvo lekipman i pou annan lekipman ki pou osi al Praslin?

Mon dezyenm kestyon. Konbyen *allowance* bann zofisyen ki al Praslin i gannyen? E dan sa *allowance* i konpri kwa?

Mon trwazyenm kestyon, eski sa *risk allowance* i osi aplikab pou bann zofisyen ki travay lo stasyon Praslin? Mersi.

### **MR SPEAKER**

Mersi. CFO.

### **CHIEF FIRE OFFICER**

#### **ALBERT ROSE**

Mersi Onorab Gill pou ou kestyon. Mon a pran ou premye kestyon konsernan '*minor capital*' ki pou aste lekipman, si i osi pou annan lekipman ki pou al Praslin. E sa 2 lezot *allowance* ki ou'n koz lo la sa i pou rann par nou *Budget Manager*. Si ou le tou lekipman ki Mahe i annan, i osi byen Praslin i gannyen.

Tou bann lekipman apropriye ki bezwen pou deal avek en sityasyon oubyen en dezas ki arive. Tou lekipman ler nou rod isi pou Mahe, nou rod pou Praslin. Nou rod pou Praslin, La Digue osi byen pou Anse Boileau. Mersi pou ou premye kestyon.

### **MR SPEAKER**

Mersi. Mr Lemiel.

### **BUDGET MANAGER ROY LEMIEL**

Mersi Onorab pou ou kestyon. Bann *staff* ki al travay Praslin ek La Digue *allowance* zot gannyen i R1500 *disturbance allowance*. R2, 500 *island service allowance*. Zot ganny R800 adisyonnelman lo zot *meal allowance*. Inisyalman si

zot pe reste Mahe zot pe ganny R600, letan zot al Praslin zot ganny R800. Apre tou le mwan zot ganny en *posting allowance* R400. Mersi.

### **MR SPEAKER**

An sa ki konsern *risk allowance* si sa in, korek Onorab?

### **BUDGET MANAGER ROY LEMIEL**

Risk parey nou'n dir i tonm, i enkorpor dan sa *inducement allowance*. E parey PS Thesee in dir i ganny, *risk allowance* i ganny pran kont letan nou pe evalye *post staff*.

### **MR SPEAKER**

So i parey pou Praslin. Wi mon krwar sa i konklir.

### **HON CHURCHILL GILL**

Ya kestyон sete si i *applicable* pou bann zofisyе ki baze Praslin?

### **MR SPEAKER**

Mon krwar sa i kler nou. Onorab.

### **BUDGET MANAGER ROY LEMIEL**

Yes, i *across the board*. Yes.

### **MR SPEAKER**

Mersi. Ok nou a kontinyen Onorab Woodcock.

### **HON WAVEL WOODCOCK**

Mersi Mr Speaker. Anba 'approve new spending initiative.' Mon war i annan acquisition of fire truck, mon konpran i pou sa novo stasyon ki pe al ouver Anse Royale. I annan 4 fire truck. Heavy duty truck 7 milyon. En mini fire truck 5 milyon avek en small fire truck 3 milyon.

Dan vizit ki Minis ti fer Praslin ansanm avek ou delegasyon, ti annan koze, ti annan en pe konsern ki bann fireman Praslin ti souleve regardan sa bann fire truck Praslin. Sa 2 fire truck.

E ti annan koze ki dan le fitir ti pou annan *purchase of a new one* mon krwar pou Praslin osi. Eski si ou kapab donn en pe detay lo la e kan ki sa Ile Eve Fire Station pou ganny sa fire truck?

E dezyenmman i ti annan konsern konsernan, regardan training pou bann fireman lo Praslin akoz pou fer bann stimulation, bann training napa landrwa pou fer. E sa en konsern ki ti ganny leve, zot pe fer akote en pti landrwa, akote zot met en dife zot fer sort of en stimulation ki pa neseserman ideal.

Alor ki zot pou fer konsernan training? E osi pou

gard fitness bann *fireman* ki reste lo stasyon, zot napa fasilité *gym* pou zot fer zot bann *training* zot bann legzersis.

E finalman, dapre lenformasyon ki mon'n gannyen lamazorite bann *fireman* Praslin i sorti lo Mahe. I annan en mankman kot i konsern lo *recruitment* bann Pralinwa pou travay kot sa stasyon. Eski i annan en *drive* la, an vi ki nou dan sityasyon pandemik *COVID-19?* Nou pe rod anploy plis Seselwa, eski i annan en *push*, en *drive* pou anploy plis Pralinwa pou travay kot sa *Fire Station?* Mersi bokou.

### **MR SPEAKER**

Mersi Onorab. *Panel.*

### **CHIEF FIRE OFFICER**

#### **ALBERT ROSE**

Mersi Onorab Woodcock pou ou kestyon. Premye *acquisition of fire truck*. Si ou vwar i annan 2 keksoz la. I annan *acquisition of fire truck* pou Anse Royale i annan 2. E osi, si ou le i annan en *replacement program* ki nou *Fire Service* in anvoy kot *Minister* pou, *Minister Finans* pou ranplas bann masin ki la. Si ou le i annan en bann masin i vreman aze. Ki *over 28, 29 years*.

So nou'n demann Minister finans pou *set up* en programm pou ranplas sa bann masin. E si ou le sa bann, sa *replacement program* pe komanse sa lannen. E sa lannen nou ganny, nou pe ganny 2 masin ki pou ganny ranplas sa bann masin ki vye la. Kot nou bezwen tir zot dan laflit. Malgre zot la, me zot pa *very reliable*. Zot kapab pe al dan *emergency* si ou le. Taler ou war zot in ariv en problemm ek zot kot ou bezwen rod en lot masin pou ale.

So in annan 2 masin ki pe *acquire* pou Anse Royale, e i annan 2 ki nou pe gannyen anba *recruitment program*. 2 *heavy duty fire tender* apre 2 *medium fire tender*.

Kot i konsern *gym* pou *staff*. Wi napa en *gym* pou *staff so far* pou lemoman. Kot bann *staff* si nou le parfwa zot al en pti pe an deor pou zot al *train*. Oubyen kot zot al dan en *gym*. Si ou le nou'n lans serten lapel avek serten lorganizasyon kot nou'n anvoy nou *request* pou demann zot pou nou ganny serten lekipman kot pou nou kapab *set-up* en *gym* Praslin. Pou bann *staff* ki travay laba.

E *so far* nou ankor pe esper larepons. E mon sir posibilite larepons pou pozitiv. E osi nou pe prevwar sa lannen pou nou kapab aste en pe

keksoz lo nou menm pou anvoy Praslin. Me avek sa sityasyon ki'n devlope sityasyon *COVID* i, nou finans in vreman en pe limite kot nou pa'n kapab fer li.

Kot i konsern *recruitment* pou Praslin. Si ou le nou dan *Fire Service* nou napa okenn etranze ki travay ladan, tou Seselwa. E nou toulstan ankouraz Seselwa pou *join* sa servis. Sa i pou Seselwa si ou le. Non mon pe koz Seselwa an zeneral.

Si ou le prezan mon pe vin lo Pralinwa la prezan. Si ou le letan nou ti konstri sa stasyon Praslin, avek bi ki *gradually* dimoun Praslin ki ti pou pran sarz zot stasyon. E i fer 5an disi nou annan zis 10 dimoun Praslin si ou le ki'n enterese pou *join* sa servis li menm.

Malgre plizyer lapel, me bann dimoun pa vin devan. Mon pa konnen pou en rezon pou kwa ki zot pa le vini. Bann zenn pa le vini. Posibilite kekfwa zot pa tro kontan travay aswar. Be nou napa bann travay ki zis lizour. E nou travay *24 hours*, 24 lo 24.

E la mon pe lans ankor en lapel. Mon pe lans ankor en lapel tou bann Pralinwa, bann zenn Pralinwaz ki ti a kontan zwenn sa servis. Loportinite i la, zot kapab raport kot stasyon laba zot a pran en form zot a

ranpli. E nou fer bann formalite. Bann ki *succeed* zot ava zwenn sa servis. Mersi.

### **MR SPEAKER**

Mersi *CFO*. Ale terminen silvouple Onorab.

### **HON WAVEL WOODCOCK**

Zis pou *follow-up* akoz ti annan sa konsern kot i konsern *training* sa bann zofisyen. Bann *fireman* lo Praslin. E in annan serten kontrent ki landrwa i pa neseserman ideal. Zot pe *train* la akote o-bor kot sa *Fire Station*.

Alor kot i konsern *training* pou sa bann *staff*, ki zot anvizaze fer?

Apre ou'n mansyon sa bann *truck* ki in annan ki annan 28 a 29an. E ou dir i annan en programm pou ranplas sa bann *veye truck*. Kan, zot annan en *timeframe*? Kekfwa *PS Finans* i kapab dir nou eski i annan en *timeframe* pou zot ranplas sa bann *truck* ki an se moman la ki parey ou pe dir i pa neseserman *reliable*? Mersi.

### **MR SPEAKER**

Mersi. *CFO*.

### **CHIEF FIRE OFFICER** **ALBERT ROSE**

Mersi pou ou kestyon. Si ou le pou Praslin parey ler Minis ti vin Praslin i ti promet ki i pou fer serten travay. Me si ou le i annan en *truck* ki'n arive pou Praslin. I la. Nou pe fer bann formalite, lasirans, *license*, ensidswit. E possibilite ankor dan enn semenn nou pou kapab transfer sa masin Praslin.

E Praslin osi i annan enn ki pa tro *reliable* si ou le parey mon pe dir. Letan nou programm i al an mars kot nou ganny ankor lezot masin, nou pou bezwen tir li dan laflit li osi. Me selman sa enn ki nou pe anvoye la i ava ase pou soutenir pou kapab perform en bon travay Praslin.

Kot i konsern *training* si ou le Praslin nou annan en lofis *training* e nou annan en zofisyel laba ki responsab pou *train* bann *staff*. *Either* zot sorti isi Mahe oubyen Praslin menm ki zot *train*. E *lately* laranzman in ganny fer kot nou'n rod en *container* ankor nou anvoy ladan pou fer bann *training*.

En pe bann *hot exercises* si ou le. E travay pe fer dan sa laliny pou nou kapab remedye sa problem konsernan *training* Praslin. Mersi.

### **MR SPEAKER**

Mersi. Onorab Loizeau.

### **HON NORBERT LOIZEAU**

Mersi Mr Speaker. Bonzour Minis ek ou delegasyon. Mr Speaker mon ti annan mwan 6 kestyon a lafen i reste mwan zis enn.

### **MR SPEAKER**

I bon menm.

### **HON NORBERT LOIZEAU**

Me an form en *statement* osi. Mr Speaker mon anvi demann *Chief* vi ki dan '*current challenges*' zot in admit ki zot annan *inadequate manpower*. Dan *strategic priorities* zot in dir ki zot anvi devlop en bon kalite *workforce*. Mon kontan ki ler mon'n pas lo latab 4 dan '*approve new spending*,' i annan *recruitment* ki pou ganny fer.

An traver sa *recruitment* mon anvi demann *Chief* si zot pe rod dimoun, zot napa, i mank zot *firefighters*, zot pe rode. Aprezan dan sa Bidze la eski, sa *package* ki zot pou gannyen e zot in aranz li en pe pou fer li *attractive*? Pou ki sa zom, sa fanm laba ki anvi antre ler i vini i konnen i pe ganny en bon *package*. Pa parey sa enn?

Akoz nou ler nou ti dan lopozisyon toulstan nou'n lager pou bann *essential workers* parey bann *fireman* i enn. Ki zot ganny byen peye. Eski sa bon

*package* in ganny fer akoz zot travay i *reggae* selman lapey i *slow dance*.

E dezyenmman, si dan sa *package* osi i annan *allowance* pou *housing* pou bann *staff* pou bann *firefighters*. Akoz i annan *firefighters* la ozordi ki pe lwe lakaz, e zot lapey i al tou dan lakaz. E pou en dimoun ki en travayer esansyel, i pa bon pou li. I pa bon pou li fer sa kalite travay. Eski tousala i annan dan sa *package*?

Or si a lavenir zot annan nide pou fer, pou kre bann landrwa parey prizon in fer barak pou met son travayer. Si zot osi zot annan sa plan a lavenir pou fer sa? Mersi.

### **MR SPEAKER**

Mersi Onorab. *Panel*.

### **CHIEF FIRE OFFICER**

#### **ALBERT ROSE**

Sa 2 premye pwen Onorab, *HR* i ava rann. Kot i konsern barak mon ava koz lo la apre.

### **MR SPEAKER**

Wi Mr Lemiel.

### **BUDGET MANAGER ROY LEMIEL**

Mersi Onorab. Onorab *package* pou *firefighter* ler zot antre *as junior firefighters* zot komans lo en saler R7 mil 157, zot ganny

zot en *meal allowance* R600. Apre zot ganny zot sa *inducement allowance* R2, 500. ZOT ganny 5poursan saler *complimentary*. Apre zot ganny 5poursan *on call allowance*. Sa *package* ki zot antre lo la. *Housing allowance* pou bann dimoun, nou pa donne *housing allowance*. Nou espekte bann dimoun ki reste Mahe i annan zot landrwa reste. Me Praslin bann dimoun ki ale zot ganny akomodasyon dan nou stasyon menm. Mersi.

### **MR SPEAKER**

Mersi.

### **CHIEF FIRE OFFICER**

#### **ALBERT ROSE**

Mersi Onorab. Mon krwar nou a koz lo sa zafer barak ki ou pe dir. Mon krwar barak sirtou pou Praslin ek La Digue. Mahe i pa posib parey *HR* in dir, i pa posib pou annan barak pou *staff*. Si ou le La Digue Lapolis pe al fer Stasyon Lapolis. E i pou *set up* bann barak pou bann *staff* ki sorti Mahe pou al travay La Digue. Sa i pou osi byen pou Praslin pli tar.

E *Fire Service* osi pou ganny *allocate* avek serten sa bann barak pou bann *staff* ki ganny poste lo sa 2 zil. Mersi.

### **MR SPEAKER**

Wi Onorab lekel pwen ou le klarifye silvouple. Terminen.

### **HON NORBERT LOIZEAU**

Mersi. Mr Speaker, ler mon'n kalkil sa ki zot in donne, si mon byen i tonm aepre. Ek tou zot *package* i tonm aepre en 10 mil, 11 mil. Kalkil sa pou mwan petet ou pli bon lo matematik. Me selman, mon konpran ki zot dir sa bann *firefighters* isi lo Mahe zot annan landrwa reste. I annan napa en lakaz pou zot, zot pe lwe.

Sa R10 mil la i al dan *rent*. Se sa ki mon pe demann zot sa kestyon. Konsernan ed sa bann dimoun kapab ganny en *proper* landrwa reste.

### **MR SPEAKER**

Ok. Mersi. Lekel ki le klarifye sa? Minis wi.

### **MINISTER ERROL FONSEKA**

Les mwan. Mon anvi fer referans ek sa ki mon ti mansyonna yer menm pou polisy. En keksoz nou bezwen revwar sa. E nou annan lavantaz, nou annan bann *mechanism* ki nou kapab vreman koz ek bann *financial services* prive pou gete.

Parey mon dir ler ou antre dan *law enforcement*, ou pe war en zenn zonm ki vin a 18an 19an petet i annan aepre 40an

*of active service* i kapab donne. Savedir ou annan en dimoun pou 40an ki garanti ou en saler. I pe garanti i pa en naryen fer li. I en boug *professional* ki pe vin travay.

E dan sa peryod i annan bann mekanizm *Insurance Policies, Endowment Policies* bann keksoz koumsa, ki nou bezwen gete si pou kapab antre. Koumsanmenm dimoun i aste lakaz deor. Ou napa larzan ou. Mwan mon premye lakaz mon ti aste pou *save* en pti gin larzan. Mon pa ti ganny lakaz deswit mon ti ganny li ler mon ti 32an.

Selman pou pey en pti gin, en pti gin, en pti gin. Ansanm ek bann sistenm ki ou annan. Akoz, akoz mon ti annan en louvraz. Mon ti annan en louvraz kontinyelman. E ou zenn ou fit, tousala i donn ou en *credit rating*.

Savedir ki mon pe sey dir zot nou bezwen revwar keksoz en pti gin. Mon krwar en laliny ki nou devret ladan, get ladan. Me selman parey ou pe dir Onorab, tousala ou bezwen pou fer, yer mon'n mansyonn sa sityasyon *forget about welfare. Call about wellbeing*.

Ou bezwen get en sityasyon ki sa boug ler i vin travay i santi li stab. I santi li stab. I pa zis donn en gro ta larzan. I pou aranz son bann

sityasyon, i konnen son fanmir isi laba. I annan keksoz ki kapab revwar.

So mon dakor ek ou. Mon pa pe dir ou sa i zis fasil. Me selman i bann keksoz ki nou bezwen get ladan. Mersi.

### **MR SPEAKER**

Mersi Minis. Onorab mon krwar ou'n ganny en repons pou ou kestyon. I annan ankor keksoz ou le klarifye? Dernyen pwen silvouple.

### **HON NORBERT LOIZEAU**

Mon anvi klarifye en pti pwen. Minis i dir ler i ti aste son premye lakaz i ti pe travay ti annan sa bann *insurance*. Be isi mon anvi zis enform Minis ki isi ek sa lapey R10mil la sa *firefighter* pa pou kapab fer parey ou ti fer. Akoz i pe *rent* i annan zanfan pou al lekol. E *by the time* i pou al pran en *loan*. Pri lakaz konmela en lakaz 2 lasanm in ariv pre R3 milyon. I pa pou kapab *afford* sa ki ou pe dir mwan.

### **MR SPEAKER**

Ok mersi. Minis.

### **HON NORBERT LOIZEAU**

Minis i kapab pa reponn selman.

### **MINISTER ERROL FONSEKA**

Non mon e reponn. Non sa i bezwen en programm. En lot programm adisyonnel ki sa ki ou mansyonnen. Ou konpran mwan? Sa en lot *financing engineering* ki ou bezwen fer adisyonnel ek son saler eksetera. Ok mersi.

### **MR SPEAKER**

Mersi. Onorab Uranie.

### **HON ROCKY URANIE**

Mersi Mr Speaker. Bonzour Mr Chair, bonzour *panel*. Koleg Onorab tou Digwa a lekout. Minis pandan ou vizit lannen pase La Digue kot stasyon. Bann zofisyen ti annan en konplent pou fer konsernan zot *uniform*. E mon krwar ou ti dir zot ki ou kapab fer zot ganny pli meyer kalite *uniform*. So mon demann ou ki zistans ou ete ek sa?

E pandan sa menm vizit menm zot ti lev en konsern ki zot bezwen en *training ground*. Zot ti demann en *container* pou zot kapab met dife ladan pou zot, pou ed zot ek zot *training*. E ou ti dir ki zot, menm 2 zot kapab fer zot gannyen o pli vit posib. Me ziska la zot ankor pe esper sa *container* pou zot fer zot *training*.

E apre eski sa bout later ki zot in gannyen pou fer *training* lo la ki trouve dan L'Union

Estate, eski zot pou permanan laba pou fer zot *training*? E eski i annan en *fee* ki zot pe pey L'Union Estate pou sa landrwa?

Apre mon'n tann *Chief* dir ki zot pou fer en *survey* pou get bann *fire hydrant* obor bann *housing estate*. So mon ti a kontan ou pa blyi La Digue ladan akoz dapre *fireman fire hydrant* kot *housing estate* La Digue i tre lwen.

Apre....

### **MR SPEAKER**

Ou'n fer kat pwen deza Onorab.

### **HON ROCKY URANIE**

Ok Mr Speaker dernyen. Apre lo en bon not mon kontan ki'n zot in ganny zot bato *rescue*. Zot byen kontan ki zot in ganny zot bato *rescue*. Me zot pe demande si zot kapab ganny en *jet ski* pou ed zot pli byen avek sa bann *inshore rescue*. Vi ki La Digue i annan bokou bann aktivite maritim ki deroule. Mersi Mr Speaker.

### **MR SPEAKER**

Mersi Onorab. Wi *panel*. I annan *uniform*, *container* for *training*, later L'Union, *survey fire hydrant*, la bato.

### **CHIEF FIRE OFFICER ALBERT ROSE**

Ok mersi Onorab Uranie. Kot i konsern *container*. *Container* pou La Digue *Fire Service* in resevwar. Me selman napa landrwa pou mete *container* La Digue. So dabor mon ti fer sa *container* al Praslin. Nou ti anvoy sa *container* Praslin. Nou ti deside ki letan pou annan bann *training hot exercises*. Staff La Digue pou bouze pou anvoy zot Praslin pou al *conduct* zot bann *training* ki zot sipoze fer.

Kot i konsern sa *training ground* ki ou pe dir, nou pa'n ganny *approval*. Nou ti ganny en let ki nou pa'n ganny aksepte e nou pa'n gannyen sa landrwa, pou fer okenn *training* lo la. E sa propriyeter ti vwar ki sa i en menas. E nou pa'n gannyen pou fer li.

Kot i konsern *fire hydrant* La Digue, zofisyen ansarz La Digue i responsab pou fer sir ki i fer bann *familiarization of fire hydrant* dan tou ban landrwa. E vwar bann landrwa kote i mank *fire hydrant*, kot i bezwen *fire hydrant* e i fer son *request* i anvoy Mahe. E la nou, nou fer bann le neseser avek *PUC* pou fer sir pou enstal bann *fire hydrant* dan bann *area* ki manke.

E kot i konsern *jet ski* mon'n pran ou pwen. Mon a fer mon mye pou fer sir ki nou

kapab *provide* stasyon La Digue avek en *jet ski*, ki a servi pou bann, lo bann lans letan si in ariv en ensidan. E pou lemoman i annan en bato ki nou'n met laba ki kapab servi pou nenport ki lensidan ki'n arrive dan sa landrwa.

E mon krwar mon'n - kot i konsern *uniform*. Mon pa vwar vreman ki mannyer sa *uniform* i pa ideal pou *staff* travay ladan. E nou tou nou pe servi sa. Nou tou nou pe servi menm *uniform*. E sa *staff* li menm li si ou le i pa reste dan sa *uniform* 24 lo 24 li.

*Uniform* i pirman mete letan i pe *fall in* pou li ganny espekte. Tyeke si i normal. Apre sa i ganny triko pou li mete. Bann triko *Fire Service* ki i mete, ki mon krwar sa i normal. Akoz letan ou pou al tenny dife ou pa pou kapab dan en *uniform* apre pou servi en *tunic* lo *uniform*. Ou bezwen rod en triko ki pli fezab pou ou kapab servi en *tunic* lo la.

E mon pa war naryen fransman mal avek sa *uniform*. Sa bann dimoun ki pe konplent *uniform*. Zot ganny sifizan *uniform*. E bann bon kalite *uniform* ki zot gannyen. Mersi.

### **MR SPEAKER**

Mersi CFO. Onorab Porice.

### **HON DOYACE PORICE**

Mersi Mr Speaker. Bonzour a tous. Bonzour *Minister* avek ou delegasyon. Mr Speaker mon annan detrwa kestyon ki'n fini ganny klarifye. Me zis mon ti a kontan felisit lekip *fireman* Baie Ste Anne pou sa travay ki zot ti fer pandan lapli, e pandan sa gro lapli ki ti arrive e dezas, zot in ed nou bokou atraver sa.

Zis an pasan mon ti a kontan konnen si zot ti pe mazin en pti pe pou revwar landrwa kot bann *fireman* i reste Baie Ste Anne, sirtou kot i konsern bann ki sorti Mahe i ganny transfer lo Praslin? Mersi.

### **MR SPEAKER**

Mersi. Panel.

### **CHIEF FIRE OFFICER** **ALBERT ROSE**

Well kot i konsern rezidans pou sa bann *staff* ki mont Praslin, parey mon'n dir oparavan sa stasyon ti fer pou bann dimoun ki, bann *Praslinoise* si oule li menm. Pou travay ladan pou pran kontrol zot stasyon, si oule. E ladan nou ti fer detrwa konpartman detrwa landrwa pour reste pou bann dimoun Mahe tanporer si oule, akoz ti napa dimoun sorti Mahe an eksepsyon kekfwa zofisyen ansarz oubyen 2 dimoun.

Me pour le moman si oule i annan apepre en 30 staff Mahe ki bezwen reste Praslin, akoz nou pa gannyen sa bann dimoun parey mon'n dir avan Praslin ki vin zwenn sa lafors pou pran kontrol zot stasyon.

E parey mon'n dir ou, ler Lapolis pou konstrir bann landrwa pou fer barak pou staff si oule kot posibilite bann dimoun i ava bouze zot ava al dan bann barak. Zot ava al reste dan barak.

Me selman lot landrwa pou zot al reste i pa fasil pou le moman, pou nou kapab tir sa bann dimoun met zot dan en lot landrwa. Sel konsern ki annan se ki ler zot fanmir i monte pou vin vizit zot Praslin se zot bezwen al lwe en landrwa. Akoz zot pa kapab reste la anndan dan sa landrwa akoz i pa otorize pou okenn dimoun anmenn son konpanny dan stasyon *fire brigade*.

E pirman i annan landrwa pou li reste, i annan son lasanm i annan tou son fasilité dan son lasanm tou keksoz, me selman nou pa kapab anmenn son partner si oule. Sa ki sel problem ki nou pe fer fas avek pou le moman. Mersi.

### **MR SPEAKER**

Mersi. Minis.

### **MINISTER ERROL FONSEKA**

Mr Speaker zis pou azout lo la, me selman Onorab Porice nou dernyen vizit, nou'n idantifye en landrwa kot nou kapab annan sa *families visiting accommodation* lo - pa tro lwen ek kot i ete la, *ok so sa in ganny idantifye*. Mersi.

### **MR SPEAKER**

Mersi. Onorab Aglae.

### **HON EGBERT AGLAE**

Mersi Mr Speaker. Bonzour Minis, PS ek ou delegasyon. Mon oule met en pe lanfaz lo sa Bidze la, an sa ki konsern *fire hydrant* akoz Onorab Arissol sorti Anse Boileau in lev sa konsern.

Mon kestyon lo la mwan, eski zot swiv bann norm enternasyonal? Akoz *NFPA* i annan bann rekomandasyon akoz tonm ek zistans sepa *interval* i sipoze annan bann *fire hydrant*, e si i dan bann *residential area* ouswa *commercial area* ant sak bann *building* i sipoze annan.

Eski zot pe swiv sa bann norm enternasyonal ki zot ganny *set*? Dezyenm *ok*, kot i konsern i annan en 370mil mon oule en leklersisman ladan mon en, petet PS Finans osi i bezwen antre. Kot i konsern '*other rates and taxes*' sey donn mwan osi

pou sa zafer *taxes la sey eksplik mwan what is this? Ok?*

Apre lo kote Perseverance mon konnen i annan en pozisyon pou annan en Stasyon Servis Tenny Dife laba, eski sa i ankor lo plan pou materyalize?

E dernyen Mr Speaker lo kote *succession plan* pou zot departman, eski zot pe travay lo en *succession plan?* Akoz mon konnen i annan la ki en kantite letan in la dan sa servis e eski zot annan en *succession plan* pou fer, ki bann lezot osi i kontinyen monte dan sa departman? Mersi.

### **MR SPEAKER**

Mersi. Panel.

### **CHIEF FIRE OFFICER**

#### **ALBERT ROSE**

Mersi Onorab Aglae mon annan de repons ladan. Apre kot i konsern Finans *either Budget Management oubyen Mr These* pou rann.

Wi kot i konsern *fire hydrant* nou swiv norm. Me selman parfwa parey mon'n dir ou ler *PUC* pe al *set-up ouswa* pe al konstrir oubyen pe al met serten *fire hydrant somewhere*, zot pa vreman envit *fire brigade* pou konnen egzakteman kote zot pe al met *fire hydrant*, zis nou war *fire hydrant* in ganny konstrir.

Nou pa ganny envite nou pa konnen parfwa e nou zis nou war *fire hydrant*, nou al tyeke aprezan nou penn nou fer lezot le nesesar avek.

Kot i konsern Perseverance, wi Perseverance *SFRSA* in deza fini ganny en *plot* pou konstrir en stasyon anba. E posibilite *is* i pou komanse 2022, me avek sa sityasyon ki nou ladan kot napa okenn *fund* ki'n ganny *provide* pou komans okenn *capital project*. E sa lannen nou napa okenn *capital project* an eksepsyon sa Anse Royale ki *ongoing*.

Wi later i la Perseverance, me nou pe esper le moman ankor nou kapab fer bann formalite pou fer konstriksyon lo la. Kot i konsern *succession plan*, wi nou annan en *succession plan*, ki'n preske fini pare, i reste zis pou aprouve pou li al anmars. Mersi.

### **MR SPEAKER**

Mersi. Kot i konsern '*rates and taxes*' lekel ki pou adrese PS, Madanm wi.

### **SENIOR ACCOUNTANT**

#### **MARIE-HELENE PIERRE**

Mr Speaker konsernen '*rates and taxes*' i plito pou bann keksoz ki nou *import* la, parey *firefighting equipment* pou bann

dimoun ki fer bann *clearing of goods* apre bann *fleets*.

### **MR SPEAKER**

Wi, ale terminen Onorab Aglae.

### **HON EGBERT AGLAE**

Mersi pou zot larepons. Mon annan zis en - i pa en kestyon petet en konsern mon anvi met devan zot petet zot a rod en fason pou adrese.

Lo size dife ki pran, lo *landfill* ki zot in fer konpran ki zot pa okipe *ok?* E *landfill* i ganny zere par *LWMA*, akoz ki zot pa mandat *LWMA* pou fer ki i ava annan zot deza annan serten lekipman ki zot servi laba lo *landfill* e *train* en pe zot bann *staff* osi laba, ki mon pa konnen si *WASTEA* si lekel me selman i anba *LWMA*, ki si okenn evantyalite dife i komanse zot kapab premyerman okipe pou zot dil ek dife an atandan ki *SFRSA* i vini i antre pou degaz lasasen li osi? Mersi.

### **MR SPEAKER**

Mersi. CFO ou pou adres sa?

### **CHIEF FIRE OFFICER** **ALBERT ROSE**

Wi mon krwar sa i en pwen ki ou'n met devan kot mon menm mon bezwen travay lo la e zwenn *LWMA* revwar ki

mannyer nou kapab ansanm travay. E fer sir ki nou prepare ki letan i ariv en evantyalite parey ki'n arive dernyen fwa noun fini annan dimoun ase kapab pou kapab dil ek sa sityasyon.

E antretan mon krwar zot osi zot pe fer serten travay e i annan bann lekipman ki mon krwar ki zot bezwen komans enstale dan landrwa laba kot letan en dife i arive *at the early stage* ki zot kapab komans debourye. Mersi.

### **MR SPEAKER**

Mersi CFO. Onorab Mondon.

### **HON TERENCE MONDON**

Mersi Mr Chairman. Mr Chairman ou premye kestyon i lo sa size lakaz bann fanmir pou bann *fire fighters* par egzanp dan ka Praslin.

Mon ti anvi demande akoz zot pa pe mazin osi fer bann lakaz, bann *batch* lakaz kot nou bann zonm, fanm dan liniform parey i leka pou bann larne, ki a fasilit zot deplwayman letan i ariv zot bann ka *emergency* osi?

Mon dezyenm kestyon i baze lo sa *lifeguard services*. CFO in eksplike difikilte, pou li ganny dimoun pou antre dan sa servis, akoz kondisyon travay. Petet, eski i pa le moman pou zot devlop en nouveau model ler

nou pe get bann landrwa parey  
bann lans kot i annan sa danze  
toultan parey Intendance?

Ki mon konnen i deza sa bann landrwa koumsa i annan dimoun ki baze lo lans atraver zot bann aktivite, mon konnen zot annan si i en ka spesifik kot sa dimoun i deza pe ede sov lavi bann dimoun ki war zot dan sityasyon pe noye.

E ansanm avek, fer partenarya ansanm avek bann letablisman touristik. Nou konnen touris i touzour *at risk* akoz ou pa fer, devlop en model kot nou kapab servi bann dimoun ki deza la lo lans avek bann letablisman, pou nou kapab donn sa servis ki reste en nesesite dan bann landrwa parey Intendance, Anse Forbans kot i annan bokou touris ki frekante.

E Minis in koz lo *civil duties* e volontarya; petet mon ti a kontan demande si zot in deza komans en konversasyon dan sa laliny sirtou avek Gouvernman Minister Lokal kot nou annan bann servis Brigad o nivo distrik, ki demande ki nou donn plis valer sa servis dan distrik.

E bann dimoun ki ou donn zot komitman, bann dimoun ki deza donn en koudmen, e kot servis tenny dife ti kapab ede donn, fer en

travay ansanm avek Gouvernman Lokal.

Zis an pasan Mr Chairman *CFO* in dir i fer, in eksprimen ki li osi i konsernen avek en batiman ki pe ganny konstrir. Mon kestyon, eski zot pa ganny reprezante o nivo Komite sou-Komite ouswa *Planning Authority*? Mersi Mr Chairman.

### **MR SPEAKER**

Mersi Onorab. Wi *panel*.

### **CHIEF FIRE OFFICER** **ALBERT ROSE**

Mersi Onorab Mondon pou ou kestyon. Mersi Mr Speaker. Mon pran ou dernyen kestyon si oule, nou napa okenn reprezantan ki lo okenn Komite *Planning*.

Malgre i annan en bon pe letan nou'n sey anvoy nou konsern devan, e ziska preznan nou lapel pa ankor ganny ekoute si oule, nou lavwa pa ankor ganny ekoute.

Nou'n toultan demande pou kekfwa annan kek dimoun si oule, ki malgre i pa lo Komite, malgre petet si i lo en Sou-Komite nou kapab donn serten *input* nou osi, me so far ziska preznan nou pa ankor ganny aksepte.

Kot i konsern *lifeguard services*. Wi nou annan serten

bann lantant ek bann lotel si oule, bann lorganizasyon kot bann enstriker *lifeguard* i al *train* bann si oule en *pool* dimoun kot bann lotel. Kot zot ganny prepare si i ariv en problemm lo lans, kot sa bann dimoun i kapab *take-up* sa *matter*, e sov sa bann dimoun.

Sa i *ongoing*, toulstan nou pe *train* bann dimoun, nou pe *train* bann lotel, bann *staff* lotel dan sa laliny pou zot kapab *respond* si i ariv okenn sityasyon lo lans.

Kot i konsern lakaz pou *staff* mon krwar sa i en pwen ki bezwen met devan Gouvernman. Akoz nou pa ti'n mazin lo la, e petet nou a *take-up* ou pwen nou ava anmenn li kot Lotorite konsernen, e apre pli tar nou a kapab fer ou konnen ki pe arrive. Mersi Onorab.

### **MR SPEAKER**

Mersi. I annan en pti pwen lo volontarya lekel ki pou adresé? Minis, ou'n deza adresé sa i en kestyon ki'n deza leve lo la, Minis si ou kapab zis vreman konfirm pou Onorab ki ou lentansyon?

### **MINISTER ERROL FONSEKA**

Wi, parey mon'n dir pli boner mon'n koze, selman *informally*. I pa en keksoz nou'n vreman sa

asize diskite zis *informally* mon'n *throw* sa nide across.

E i en keksoz ki mon'n ganny zoli *feedback* ek lezot dimoun ki krwar nou bezwen *push* sa *forward* osi. Mersi.

### **MR SPEAKER**

Mersi. Onorab Cosgrow. Eskiz mwan *CFO*, i annan en pwen ou pa ankor adresé?

### **CHIEF FIRE OFFICER** **ALBERT ROSE**

Pou ou lenformasyon Onorab Mondon ou'n nonm bann brigad dan bann distrik swa dan bann kominate. Sa i en travay ki *fire service* in toulstan fer, kot nou'n travay avek bann *DA* dan bann distrik si oule o nivo rezyon.

Kot nou pran nou *staff* nou'n anmenn dan bann rezyon pou *train* bann dimoun. Me *at the end of the day* ler ou gete ou war zis 4 dimoun ki vini, 5 dimoun ki vini. Dan Sanmdi nou *spend* nou bann *staff* pou al dan menm landrwa, me bann dimoun pa rann lapel, zot pa vini.

Se sa prezanz ki nou annan serten lenkyetid pou al *recruit* bann Brigad pou zot vin fer travay volonter. Mersi.

### **MR SPEAKER**

Mersi. Onorab Cosgrow.

### **HON WALLACE COSGROW**

Mersi Mr Chair. Bonzour Chair, bonzour Minis bonzour tou manm lo *panel*. Mr Chair permet mwan komansman pou mwan remersi bann zomm ek fanm dan liniform sirtou dan liniform *fire service* pou zot kouraz, zot devosyon.

E si mon kapab dir, si mon kapab servi sa mo Angle *valour*, zot annan kouraz dan *face of danger*. Mr Speaker mon dir sa, akoz mon ti *spend* en pti pe letan avek zot le 19 Septanm lo *landfill* aswar, apre le 20, le 20 Septanm son lannmen menm landrwa ankor e mon ti war en pe zot louvraz ki zot fer, lanvironnman ki zot *operate* ladan.

I pa en lanvironnman fasil sirtou ler ou pe al tenny dife pou met ou lavi a risk, ou lavi an danze, e zot merit tou sipor ki tou nou felisitasyon. Mon dir sa osi Mr Speaker akoz mon'n annan en papa osi ki'n travay pou apepre 30 ekek lannen dan *fire service*, mon annan en frer ki ozordi i pe travay avek zot dan *fire service*.

So Minis in koz lo *wellbeing*, mon tre kontan, mon ti a kontan konnen *Chief* kote dan Bidze konmsi ki nou pe war *wellbeing fire service* pe ganny gete dan sa Bidze ozordi la?

Mon pa pe dir ou i annan tou, me solman ki bann eleman ladan ki nou pou war ki nou bann *fire fighters* i ganny rekonpanse dan en fason apard zot saler dan en fason pou sa travay ki zot fer pou lasosyete? Apre en eski zot annan bann plan pou lavenir pou get dan *wellbeing firefighters*?

Dezyenm pti bout *Chief*, eski en sizesyon sa en, mon'n toultan mazin sa dan mon lespri, i annan bokou bann *fire service* dan lemonn partou ki zot *fire and emergency* ki servis lanbilans i osi ansam avek zot.

Eski ou pa krwar petet ti ava en bon nide vi ki zot annan serten disiplin ki zot travay anba la zot annan serten prensip, ou pa krwar ki ti ava en bon nide ki servis lanbilans i osi tonm anba zot koman *emergency ambulance service*? Mon, en sizesyon petet ou a donn mon ou lopinyon. Mersi.

### **MR SPEAKER**

Ale *panel* wi.

### **CHIEF FIRE OFFICER** **ALBERT ROSE**

Mersi Onorab Cosgrow pou ou pwen e mersi osi pou ou rekonesan pou bann *staff*. E si oule konsernan sa lanbilans ki ou pe koz lo la, lo komansman ti komans *operate New Port* i ti

*Ambulance and Fire Service, si oule*

Me selman apre sa zafer lanbilans in retire in vin pirman zis *fire service*. I pa en move nide ou sizesyon, kot mwan mon'n toulstan krwar ki ti evidaman en lanbilans, *fire brigade* letan ou al kot *emergency* kot ou war ki lavi i *evolve* kot sa lanbilans i akonpanny son *fire tender* kot si i annan bann tranzaksyon pou bann zafer pou al lopital ensidswit.

So ou kapab servi sa lanbilans pou transport sa bann dimoun lopital. Me selman de lot kote osi, ler ou dan lanbilans ou annan serten lenkyetid ki tou *call* ki pou konsern lopital pou *Fire Brigade* pran ki pou get *involve* ladan.

Tou lazournen dimoun pou rod lanbilans, pou rod *Fire Brigade*. Sa i en lot problem ki nou mazin ladan. Ou nide pa mal, nou a sey vwar ki mannyer nou kapab i annan en lanbilans dan nou *fire service* pou osi atann nou bann ire tender letan zot al dan en sityasyon.

E Me selman dan en lot kote nou annan en serten lenkyetid sa zafer *wellbeing*. Mon krwar sa zafer *wellbeing* mon a les avek *HR* pou reponn sa kestyón.

**MR SPEAKER**

Wi, *HR* wi.

**BUDGET MANAGER ROY LEMIEL**

Mersi Mr Chair. Mersi Onorab Cosgrow. Mon pa tro kler lo *wellbeing* selman mon a, apard sale ki bann *staff* in resevwar mon a osi donn zot parey ou okouran i *uniform* i *free*, nou don zot *bus pass* ki *free*, bann ki al Praslin, La Digue zot ganny tiket bato, avyon pou zot vin Mahe, e pou zot fanmir vin war zot Praslin *free*, zot pe osi ganny gratwite, kekfwa sa i a reponn en pe ladres konsern Onorab Loizeau san ki mon ganny en deba lo la.

Zot ganny gratwite 5an, apre d i kontinyen tou le 2an. Premye 5an i ganny gratwite apre sa tou le 2an zot ganny gratwite. Mersi.

**MR SPEAKER**

Mersi. Onorab William.

**HON WAVEN WILLIAM**

Mersi Mr Chairman. Bonzour Minis avek ou lekip. Mr Chairman mon ti annan en pti komanter pou fer vizavi lefe ki letan mon pe regard manda sa departman e an relasyon avek sa ki nou'n diskite yer.

Minis mon krwar poudir i vre i annan sa nesesite pou

revwar en pti pe akoz letan ou pe regard manda SFRSA letan ou pe koz lo *the, from the effect of fires hazardous* akoz *hazardous* mon krwar i annan serten keksoz epi i vin *other incidents*.

Konmsi letan ou pe regarde ou dir be sesel i en pti pei, nou annan serten kantite resours mon krwar i annan tan landrwa nou kapab fer sinerzi, so mon krwar mon pou demande e mon pou met lanfaz lo la ki *the next budget* i vreman annan en serten revizyon pou vvar.

Akoz ki arrive se ki nou vvar ki diplikasyon pe arrive dan serten landrwa. So sa i en pti komanter anpasan. Mon lot entervansyon i lo, lot *strategies* lo pwen 6 avek 7 avek 8.

La ki nou vvar se ki, mon anvi sey fer mon konpran zot pe dir ki zot annan lentansyon retar sa mazin stasyon pou met en lot landrwa. Be preznan letan ou pe regarde poudir be nou en pti lavil, e ler zot pe dir zot annan problem ek zot, avek zot *response time*.

So ki bor egzakteman zot pe mazin bouze akoz si ou pe mazin *response time* pou dizon i annan en sityasyon dan por ouswa dan lavil, e avek nou sityasyon semen ek

konplikasyon trafik ensidswit eski zot in mazin en pti pe lo la?

E mon dernyen pwen ese ki nou'n koz lo *lifeguard* e Mr Rose pe dir ki zot in fer *advert* zot pa zanmen ganny bann travayer. Me ozordi nou annan en ta bann zenn pe rod travay e ki vreman incentive akoz sa i en travayer ase enteresan e nou en Pti Leta Zil nou antoure ek lanmer, nou bann zenn i kontan delo sale, so eski zot in vreman fer evalyasyon pou vvar ki problem?

Akoz i ler mon tann ou dir ki ou pa ganny dimoun konmsi i en pti pe *sad*. Mersi.

### **MR SPEAKER**

Mersi. *Panel*.

### **CHIEF FIRE OFFICER**

#### **ALBERT ROSE**

Mersi Onorab William. Kot i konsern *move* sa stasyon kot i ete pou en lot landrwa. Nou pa ti ankor vreman definir ki landrwa egzakt, nou anvi pozisyonn stasyon li menm.

Kot pou napa *obstruction* si oule, kot nou *response time* parey nou pe dir i pou vreman bon. Me selman parey ou'n nonm por, por pe antre en kantite bann keksoz konmela ki petet parfwa nou menm nou, nou pa konnen ki i antre.

Si demen bomaten i arriv en lensidan parey mon'n dir *Kuwait, Kuwait* ti arrive kot nou pa konnen in arriv en leksplozyon parey pou napa en *fire service, fire service* pou fini degrengole.

So nou, nou'n fini sorti dan sa *Red Zone* kot nou ete si nou kapab ganny en landrwa en pti pe, menm si demen i vin en sounami i tap nou tou. Si nou kapab ganny en lot landrwa apropriye kot nou kapab plant en stasyon kot nou a santi poudir nou pou napa difikilte dan sa laliny.

Kot i konsern *lifeguard services* akoz zot pa oule vini? Mon'n dir avan akoz zot pa oule vini, akoz sa saler ki zot gannyen pa *attractive* pou zot vini. Nou ti'n fer en *Scheme of Service* pou zot, ki *very attractive* kot nou ti pou gannyen bann dimoun.

But si oule bann dimoun ti ankor kot *DPA*, be ki'n arriv se tou *Scheme* pou le moman in tenir. Kot nou pa pou kapab fer naryen pou le moman ziska ler sa *Scheme* i fini pare. So mon asir ou posibilite i annan en kantite dimoun pou enterese en kantite pou vin travay dan *lifeguard*. Mersi. Mon krwar Minis ti annan.

## **MR SPEAKER**

Minis wi.

## **MINISTER ERROL FONSEKA**

Wi, thank you Mr Speaker. Mersi Onorab pou ou bann sizesyon. E mon dakor i annan *some glaring example* lo dizon yer nou'n koz lo *hazmat*. Zot ban *protective clothing* la nou war napa *protective clothing*. So i annan *obvious synergies* ki nou bezwen get ladan, *make all sense of it*. Sa bann disparisyon koumsa nou bezwen revwar sa. *In terms of reduction* nou'n vwar sa kantite sa bout ki lo li, Onorab in koz boner, Onorab Ghislain in koz lo bann lakaz ki, bann batiman ki pe ganny fer ek bann materyo ki pa bon, tousala i osi e i ou war en sityasyon kot ou war en kantite sa bann batiman pe ganny fer, i en konsern pou *DRDM* osi in *their risk assessment*.

So ou pou kapab war sa bann *synergies* ki mannyer nou devret travay ansanm la, so i en keksoz ki nou bezwen vreman revwar.

*In terms of recruitment* i en loportinite sa. *Recruitment* -, ou konnen mon pe ekout zot en pti gin. Ler mon retourn lo sa mo *wellbeing* la, *it's not any monetary*. *It's feeling good about yourself*, ou konpran mwan? *So even in recruitment side* osi nou bezwen *package*

*that kot ou pe vreman entice sa manrmay but you need good instructions, good cultures. I mean it's coaching.*

Ou konnen *it's really getting people together.* So sa bann keksoz *good disiplin,* tousala i enportan. Be sa *instructor* osi fodre sa i dan son leker. Fodre i ladan la, *ok?* Sa bann keksoz koumsa ki pou ed nou lo *recruitment but it's a good opportunity right now.*

### **MR SPEAKER**

Mersi. Nou a *move on.* Onorab Lemiel.

### **HON SYLVANNE LEMIEL**

Mersi Mr Chair. Bonzour Minis avek ou delegasyon. Bonzour tou dimoun.

Premyerman enn, mon ti a kontan remersye Gouvernman ki'n la avan ki'n komans sa proze Anse Royale. E an menm tan osi ki sa proze i kontinyen osi sa lannen ki nou a kapab war son konplisyon an Novanm.

E mon pou zwenn avek CFO pou mwan ankouraz bann zenn Anse Royale e osi dan en *neighbouring district* Au Cap avek Takamaka, pou zot osi vin devan e al fer bann aplikasyon pou zot kapab ganny en travay. Travay in vin a nou loportinite alors annou pran sa sans.

Mon kestyon i se ki, ki bann facilite ki pou annan dan sa batiman? Dezyenmman nou vwar en sonm R9.4milyon ki'n ganny bidzete pou zot kapab fini sa batiman. Eski sa son larzan i ase pou konplet sa batiman net?

E apre sa Novanm nou'n ganny dir letan sa batiman i fini kan, *CFO* kan petet zot pe mazinen ki i ganny *handover?* Ki petet nou bann dimoun i kapab komans travay ladan?

E apre letan nou pe koz bann facilite ki pou annan kot sa *fire station*, eski CFO zot pe mazinen osi ki i pou pre ek lanmer wi, eski zot pe mazinen ki Anse Royale i ganny en zodyak?

Ki si i arive ki i annan dife lo lanmer ki petet sa bann zofisye i kapab gannyen pou servi? Pou le moman sa i mon detrwa kestyon.

### **MR SPEAKER**

Mersi. *Panel.*

### **CHIEF FIRE OFFICER** **ALBERT ROSE**

Mersi Onorab Lemiel pou ou kestyon. Parey ou'n dir si oule Anse Royale i pour preske konplete an Novanm, posibilite avan tou.

Me selman nou pe mazinen an Novanm posib son

laport i a kapab ouver. Ki bann fasilité *in terms of* fasilité mon pa konnen ki ou pe sey koze egzakteman an term fasilité petet si ou ti kapab elabor en pti pe lo la li, menm si oule. Klarifye en pe ki i pe dir an term ...

### **MR SPEAKER**

Ale, i a klarifye en pti pe *CFO*. Wi.

### **HON SYLVANNE LEMIEL**

Mersi Mr Chair. Ki egzakteman pou annan dan sa batiman? Letan nou pe koz fasilité eski pou annan *training room* pou annan dormitwar? Tou sa bann keksoz koumsa ki mon pe koz koman fasilité. Mersi.

### **MR SPEAKER**

Mersi. *CFO* wi.

### **CHIEF FIRE OFFICER**

#### **ALBERT ROSE**

Yes, tou ban fasilité ki ou'n nonmen i pou annan ladan, i pou annan en *watch room*, i pou annan dormitwar pou *staff*, i pou annan en *lofis* pou prevansyon pou antase laba i pou annan en garaz kot nou, parey ou konnen tre byen ki nou pa al dan bann garaz prive nou, nou aranz nou bann *main* nou menm.

Nou *staffi aranz* nou bann mazin e sa i fer ki nou pa fer en ta depans deor dan bann garaz. E i pou annan en *training tower* kot ler i annan bann pti *small training* kot *staff* pou *train* ladan. Apre i pou annan bann *lofis*, *lofis zofisyé* ensidswit. Apre i pou annan a *plane shed* kot bann transpor pou ganny *allocate* mete.

Kot i konsern zodyak pou sa landrwa wi nou dan en fasilité osi ladan kot dan sa *building* kot pou nou met en bato e nou konnen en bato nou anvizaze osi rod en bato ki pou deservi si pou annan en pti problemm avan.

E mon panse ki a sa moman osi *lifeguard* nou ava kapab prepar li pou annan en group ki ava baze Anse Royale, e i ava *take up* bann problemm lo lans si oule.

Mon pa konnen si mon'n reponn tou ou kestyón, ouswa si i annan enn ki mon'n manke? Anr ou pe koz *in terms of handing over*. Posibilité *handing over* i kapab komans an Out an Zilyet/Out me selman i kapab annan bann lezot travay ki pou bezwen ganny fer.

Si sa larzan ki nou'n mete i ase? Non i pa pou ase, akoz i annan bann lezot ki ler sa plan in fer ki pa'n prevwar si oule.

Par egzanp nou bezwen rod larzan pou met *tiles*, nou bezwen rod enn de bann keksoz ki nou bezwen rod larzan pou kapab konplent li, i pa pou ase sa larzan e nou pou bezwen tap laport ankor pou no kapab ganny ankor en pti larzan pou nou kapab konplet. Mersi.

### **MR SPEAKER**

Mersi. Mon krwar in reponn tou kestyon. Onorab Henrie.

### **HON GERVAIS HENRIE**

Mersi Mr Speaker. Bonzour tou dimoun. Mr Speaker dabor mon oule felisit sa lorganizasyon ki la devan nou sa *calling* toulstan i bat mon en pti pe, *SFRSA* felisitasyon akoz zot, zot enn bann Antite servis piblik ki proaktiv dan lesans ki *out of the blue*, dan lakour nou war en pti spot lo televizyon ki *remind* nou tenny karo, pa kit kastrol lo dife.

E sa i bann keksoz ki piblik Seselwa i bezwen pou redwir risk dezas dan lakour. Alors felisitasyon pou sa *keep at it*, selman mon ava fer en propozisyon.

Apard sa zafer la lo televizyon mon krwar i enportan ki zot fer en pti *unit kantmenm 5* dimoun ki *knock on the doors* dan bann *housing*

*estate* dan bann distrik ki vini ki i koz ek dimoun.

Akoz ler ou koz ek mwan *face-to-face* ou pou pli kapab ankouraz mwan pou met en *fire extinguisher* dan mon lakaz, en *fire alarm*, pou mon pran lasirans pou mon lakaz an ka dife i brile.

Sa i bann pti lesон ki toulstan mon dir nou bann kominote i manke alor mon ti ava apresye zot kontinyen fer sa.

E petet Mr Speaker mon a osi propoze si zot pe mazinen ki mannyer zot kapab *raise* larzan an deor zot Bidze *why not* mazin kre en *NGO friends of* zot lorganizasyon ki bann *former fire fighters* i kapab *join*, bann zenn ki enterese.

E zot kapab *raise* larzan avek bann lorganizasyon enternasyonal, e menm anba *National Grant* pou bann programm e zot kapab zisteman fer sa kalite travay pou edik popilasyon vizavi prevansyon bann dezas. Sa i mon premye soumisyon.

Dezyenmman Mr Speaker mon oule pran kot Onorab William in kite letan nou pe koz Manda *SFRSA* i koz lo proteksyon pour protez esov lavi, propriete e *the environment from the effects of*

*fire hazardous and other incident.*

Mon war i annan en landrwa kot i revwar Manda DRDM e zisteman akoz yer n ou'n komans en konversasyon Mr Speaker petet nou ti aba kontan ganny lopinyon Mr Rose, *Chief Rose*.

Li osi i krwar i annan en sans, i annan en sinerzi, i annan en potansyel, ki zot kapab vin sa elarzi en pe zot manda ki zot vin sa antite, ki osi kordin tou sa bann travay pou anpes tou sa bann risk;- akoz zot, zot annan *experience, boots on the ground, so si ou war i annan en posibilite ki sa i kapab arive?* Mersi Mr Speaker.

### **MR SPEAKER**

Mersi. Panel, wi *chief*.

### **CHIEF FIRE OFFICER**

#### **ALBERT ROSE**

Mersi Onorab Henrie pou kestyon, pou ou remersiman *as well*. Si oule kot ou premye pwen, *sensitization programs* oule sa i dan nou plan stratezi, kot nou non selman parey ou dir endik dimoun lo televizyon e nou osi anvi al *door-to-door* vwar bann dimoun eksplik zot en pti morso lo si nou annan en dife si oule prevansyon.

E nou osi annan bann *leaflet* ki nou annan kot nou

kapab donn zot *either* pou met dan lakwizin, annan bann pti konsey lo la, ki ou merit fer, ki ou pa fer.

Kekfwa letan i ava antre dan son lakwizin petet zet en lizye lo la, i ava anpes li fer bann keksoz kekfwa ki pa sipoze fer.

Sa i dan nou plan, i dan nou plan stratezi pou nou kapab fer li, me selman zis mon swete ki bann dimoun pa servi letan nou pe fer *door-to-door* zot pa servi sa koman en move pratik kot demen i vin en. Zot krwar nou pe fer en lot keksoz.

### **MR SPEAKER**

Lo size *synergy* avek DRDM?

### **CHIEF FIRE OFFICER**

#### **ALBERT ROSE**

Mon pa konnen si Minis ki pou diskrit lo la, konsernan sa *synergy*. Well, nou napa problemm si nou kapab annan bann pwen parey ou pe dir me selman i annan en keksoz ki nou bezwen asize diskite, nou bezwen annan en bon deba, en bon diskisyon lo la.

Non selman ki nou dir wi, me selman nou bezwen evalye e vwar ki lenpak ki pou annan ankor lo sa servis li menm e si demen bomaten i ava anvi *enlarge* nou manda, nou bezwen vwar si pa pou koz en lenpak lo bann servis.

*Otherwise si ou napa, nou napa difikilte ek sa nou.*

Akoz nou manda si oule protez e sov lavi si oule protez propriete dimoun kont destriksyon dife, protez lanvironnman asiste dan ban lezot ka imaniter si oule tel ki dezas ensidswit. So i *ok* napa problemm pou nou, me selman nou pou bezwen diskite asize e vvar ki mannyer nou kordin li si oule sa bann keksoz la. Mersin bokou.

### **MR SPEAKER**

Mersi CFO. Onorab Pillay.

### **HON SEBASTIEN PILLAY**

Mersi Mr Chairman. Bonzour Minister avek ou delegasyon e bonzour tou koleg Onorab. Mr Chairman tou dimoun in fini felisit SFRSA, so mon pa pou fer ki ankor enn fwa, mon krwar zot konnen ki travay ki zot fer e zot bann Zofisy e bann dimoun ki byen devotee.

Me *at the same time* petet i annan serten kestyon pertinan ki mon krwar nou bezwen sey adrese atraver Bidze ki zot pe gannyen. Lo nou kote latab e menm ler mon asiz lot kote nou'n toultan siport zot Bidze. Nou'n toultan siport zot Bidze dan tou fason posib akoz nou krwar poudir louvraz ki zot fer i

vreman e vreman enportan pou nou.

Me selman la nou bezwen *move past* siport zot Bidze e regard *wellbeing* zot bann zofisy ki travay ek zot bann lorganizasyon. E si ou war en kantite kestyon pe monte lo *allowance* oubyen pe monte lo sa bann size i akoz zisteman i akoz bann zofisy pe *text* ouswa pe anvoy mesaz en pti pe partou.

So dan sa Bidze ki ou gannyen la, eski ou annan en, mon konnen Minis pa kontan tann sa mo *welfare*. Me nou ava apel li en *Wellbeing Officer* ki la pou zwenn avek sa bann zofisy pou koz ek zot, nou konnen lafors defans i annan enn e ki i apel en *welfare*.

Minis petet ou ava anmenn sa menm *mind set* laba pou koz lo en *wellbeing* e mon kontan sa mo *wellbeing* akoz *wellbeing* ou pa koz zis lo *welfare* ou koz lo son *total package, holistic package*, e sa boug ki pe fer sa.

So eski ou annan anba *nominal roll* Bidze pou en dimoun ki son bann Zofisy i kapab al kot li? E koz ek li lo sa bann konsern, parey nou bann Onorab Samynadin, Onorab Aglae, Onorab Gill ki tou bann dimoun in *raise* vizavi bann

Zofisyé ki lo sa Lazans akoz zot pe *text* nou pou le moman la.

Nou bezwen met sa devan ou, akoz nou pa oule kasyet poudir nou pe ganny sa ban lenformasyon *from* sa bann dimoun *ok?* E i napa naryen mal akoz zot probableman sa bann dimoun in santi poudir zot bezwen ganny en *outlet* pou zot kapab fer pase zot konserne i neseser. Sa i mon premye kestyon.

Mon dezyenm kestyon Minister mon konnen sa ti'n ganny *raise*, me mon krwar i en pwen ki pertinan akoz mon'n asiz lo lot kote latab pandan plizyer lannen.

E mon bezwen fer serten meakoulpa, e aksepte poudir petet nou ti'n kapab fer en keksoz diferaman. E sa en keksoz ki nou ti'n kapab fer diferaman se ki le nou annan bann dimoun ki antre dan bann *service* parey *nursing* Minister, Lapolis e *SFRSA included*, bann servis ki demann en kantite lo pwennvi personnel sa dimoun, an retour i annan serten benefis ki sa i vin avek.

*Enticement* pou li vin dan sa servis e enn bann *enticement* pli enportan ki nou pe swar ozordi se posibilite pou sa dimoun kapab ganny en lakaz. Mon pa pe dir ki nou pou donn li en lakaz, me regard lo en

programm sipor ki sa dimoun i kapab ganny pa asiste, me i fasilit letan ki sa dimoun pou kapab ganny en landrwa.

Mon krwar ki sa i en keksoz enportan ki nou kapab komans konsidere. Akoz lontan Minis ou ava apel byen ki en kantite dimoun ti antre dan Lapolis akoz zisteman sa. En kantite dimoun ti *join* serten servis akoz zisteman sa, en kantite Seselwa ti *join* larme Angle akoz zisteman sa.

So i annan nou bezwen regard dan sa potansyel. I pa neseserman fasil pou reponn atraver sa Bidze ki la akoz sa i *lock tight*, me selman sa i en keksoz ki bezwen ganny koz lo la.

Mr Chair mon dernyen pwen i vin lo bann lekipman ki ler nou *provide* avek *SFRSA* atraver bann Bidze. Mon rapel enn ki mwan mon ti lager personnelman e ki Lasamble ti siport mwan lo la e ki sa *aerial platform*. Mon ti a kontan konnen ki kondisyon sa *aerial platform* ozordi si i ankor *in good working order*?

Pou asire ki bann lekipman i bon, mon konn ki zot lekipman i bann lekipman ki byen sofistike ki zot bezwen ki i ganny *Maintain* dan en bon fason;- e ki pou asire ki nou pa pe war nou dan en sityasyon

kot nou pou bezwen al fer bann depans adisyonnel vizavi bann *maintenance* ki sipoze ganny fer. Mersi Mr Chairman.

### **MR SPEAKER**

Mersi Onorab. *Panel.*

### **CHIEF FIRE OFFICER**

#### **ALBERT ROSE**

Ok, mersi Mr Speaker. Mersi Onorab Pillay pou ou kestyon, mon pou pran en dan sa 3 kestyon kot i konsern *platform aerial* ladan. Sa veikil li menm i ankor vreman an bonn sante, i ankor byen normal selman nou annan serten pti difikilte *right now*.

Problenm se ki sa masin li menm son *servicing date in due*, i annan aepre 4 mwan disi, 5 mwan disi. E konpannyen kot nou'n aste sa mazin i annan *lockdown* e zot pa kapab sorti dan pei, pou zot vin fer servis lo sa masin.

E nou, nou menm nou vi ki sa masin i ankor anba garanti, nou pa oule servi li vatevyen partou, apre si i arriv en problenm avek sa dimoun pou, sa konpannyen pou dir i pa responsab pou sa. I tou bann lekipman *servicing* in fini antre dan pei i la, i annan aepre 4mwan pase, si oule Langleter, Angloco, Langleter.

Kot napa dimoun ki pe bouze mon krwar Langleter. E sa dimoun i donn nou garanti ki an Me, oubyen Zen *staff* pou ariv isi pou vin fer servis lo sa masin. E mon repete nou pa kapab servi li pou le moman akoz i anba garanti e si en keksoz i arive avek nou pou perdi tou e sa konpannyen pa pou oule aksepte. Mersi.

### **MR SPEAKER**

Mersi lezot kestyon Minis pou klarifye, wi.

### **MINISTER ERROL FONSEKA**

Yes Mr Speaker. Mersi bokou Onorab Pillay pou ou bann sizesyon. Zis enn de pti *area*, letan nou kalkil *wellbeing*, en nenport dimoun ki ansarz en group dimoun, i annan en responsabilite *duty of care*. Ou pa bezwen annan en dimoun pou fer sa, tou dimoun ki ansarz dimoun i bezwen annan sa responsabilite *duty of care*.

*In terms of* en direct dimoun bann parey ou'n mansyonnen, sa i bann rol *Human Resources Manager*, *Human Resources Manager* is the direct point of contact ki en travayer i kapab anmenn son bann sityasyon.

E menm even advice bann zenn manrmay, mannyer zot pou ek zot minimum wage ki zot

annan difikilte selman ou *still* koman *introduce* bann *slight* fason ki zot kapab *manage* zot bann larzan *whatever salaries they get*. So i sa bann sistem i la, zis nou bezwen konpran li e fer sa bann pti rol *extra* ki la, ki la pou devlop sa bann *wellbeing* sa bann dimoun.

So tou sa bann keksoz ki ou'n mansyonnen bann lazans parey *Nursing* ou'n dir *Nursing*, Lapolis, *SFRSA*, bann zafer *Police Housing* lontan tousala i bann *incentive* ki *great ideas*, me selman finalman mon plifere en dimoun annan en *avenue* pou li ganny son prop landrwa, si ou kapab ed li komanse antre dan sa *market*. Mersi Mr Speaker.

### **MR SPEAKER**

Mersi. Onorab nou a terminen silvouple.

### **HON SEBASTIEN PILLAY**

Mersi Mr Chairman. Mr Chairman byen vitman. Minister i sa i egzakteman ki mo pe dir ou, mon pa pe al demann Gouvernman pou promot en sityasyon konstrir ban gran, gran barak or *whatever* partou me i plito ki sa dimoun i ganny sa *avenue* pou li kapab ganny sa ki i pe rode, e ki mon krwar i neseser.

Mersi Minis pou ou bann larepons e mersi *SFRSA* pou reponn mon bann kestyon. Nou swet annan Zofisyen *all the best* pandan sa lannen avek zot travay. Mersi Mr Chairman.

### **MR SPEAKER**

Mersi. Avek sa nou a pare pou pran vot lo Bidze pour *Seychelles Fire & Rescue Services Agency* ki lo paz 297 ziska 305 pou en total 100milyon R249mil.

Manm ki an faver silvouple lev lanmen? Mersi, okenn ki kont? Non, Bidze pou *Seychelles Fire & Rescue Services Agency* ki lo paz 297 ziska 305 pou en total 100milyon R249mil in ganny 32 vot pour, 0 vot kont e 0 abstansyon. Bidze in aprouve a limanite.

Ma dir tou bann *panel* mersi pou zot prezans e zot partisipasyon e nou a *adjourn* e nou a repran 11.40. Apepre 30minit *break*. Mersi.

**(BREAK)**

### **MINISTRY OF EDUCATION**

### **MR SPEAKER**

*Dr Justin Valentin Minis* pou Lekidasyon, *Dr Odile Decomarmond* Sekreter Prensipal pou *Early Childhood*

*Primary and Secondary Education, Dr Linda Barallon Sekreter Prensipal pou Tertiary Education and Human Resource Development, Mrs Linda Monthy Financial Controller.*

Nou pe pran Bidze Minister Ledikasyon ki lo paz 307 ziska 323 pou en total 1bilyon 43milyon R293mil. Minis mon ava envit ou entrodwir ou Bidze silvouple.

### **MINISTER JUSTIN VALENTIN**

Mersi Mr Chairman. Bonzour Mr Chairman, *Leader Zafer Gouvernman, Leader Lopozisyon, tou Manm Lasanble, lezot travayer Lasanble e tou bann dimoun ki pe ekout mwan.* I mon devwar e plezir pou mwan ansanm avek mon lekip vin dan Lasanble pou diskit nou Bidze e relans nou bann aktivite finansyel sa lannen.

Mr Chairman sa Gouvernman i aspire pou siport e soutenir en sanzman mazer dan sistem ledikasyon dan Sesel. Nou reste angaze pou fer ki tou etidyan Seselwa i benefisyé omwen 11an ledikasyon modern e o nivo ki reflekte konteks e sityasyon sa 21enm syek.

Sa i vedir ki nou, nou tou dan Sekter Ledikasyon nou anvi vwar en sistem

ledikasyon pli relevan pou etidyan sa zenerasyon. Gouvernman i aspire pou vwar plis etidyan menm tou etidyan attend bann lobzektif e target akademik e non akademik dan zot bann diferan programm.

An plis ki sa nou ti a kontan vwar pis etidyan termin zot letid, dan bann sant profesyonnel avek plis konpetans ki neseser pou zot grandi e epanouir dan sa profesyon ki zot ion swazir.

Mr Chairman nou ti a voudre egzekit en plan ledikasyon pli modern ki Sesel in deza vwar, me domaz nou dezir e volonte pou ganny retarde akoz nou sistem finansyel pei.

Dan Minister Ledikasyon, nou'n konpran sa sityasyon e nou pe aziste nou zisteman pou pa les sa sityasyon finansyel pei detri nou vizyon e nou laspirasyon e mon pou fer li mon devwar pou fer nou bann travayer e nou bann parti prenan konpran byen sa bann sityasyon ki nou ladan.

Mr Chairman parey mon'n dir Bidze Minister Ledikasyon i pa neseserman sa Bidze ki nou ti'n demande dan son totalite. Nou'n aksepte sa bann koupir an sipor sityasyon finansyel pei.

Mon konnen ki bann Manm Onorab pou koz bokou lo zot

bann sityasyon dan bann lekol, dan zot distrik pou zot ziridiksyon. Nou okouran sa bann reparasyon ki merit fer. Me ansanm avek bann Zofisyen Minister Finans, nou ti fini fer en desizyon.

Dabor pou nou pa komans bann nouveau proze kapital me plito swazir 2021 pou konplet bann proze ki'n deza komanse. Nou remarke ki menm sa, nou annan sepandan environ R6milyon pou bann pti proze, e la nou'n deside pou nou re evalye priyorite e rezourd bann problemm ki pli imedya e pli neseser.

Enn bann pli gran defi Minister Ledikasyon se gaspiyaz o nivo lekol e bann sant, sirtou ban move itilizasyon resours. Pou nou kapab pli byen zer sa Bidze, nou pou bezwen fer bann kanpanny ki edik tou dimoun dan sistenm lo lafason pou redwir gaspiyaz e vin mwen neglizans.

An plis ki sa Mr Chairman mwan mon for lo evalyasyon. Nou'n dakor pou bann *Leaders* dan ledikasyon fer en gran evalyasyon lo nou performans, sirtou lo lafason la ki nou pe al ko0mans sa nouveau letap ansanm fer evalyasyon ki dan lepase nou'n servi finans.

Nou pou bezwen revwar tou bann rapor odit ki egziste dan nou Minister bann rapor lenspeksyon lekol pou nou koriz bann fot e amelyor servis amelyor sa biznes *comme dir* koze.

Nou'n deza lans lapel ek tou nou bann *staff* pour ki dezormen nou lo en misyon pou donn sa pei sa ki konsern ledikasyon, an se ki konsern ledikasyon *the best possible deal*.

Mr Chairman mon tim i eksite, nou anvi ganny nou Bidze, travay lo bann febles, e fer marse ledikasyon dan Sesel. Alor nou pe met nou disponib pou enterakte lo nou Bidze avek bann Manm Onorab. Mersi Mr Chairman.

### **MR SPEAKER**

Mersi Minis. Nou ava pare pou bann kestyon bann Manm. Mon a verifye mon lalis silvouple.

Mon annan Onorab William, Samynadin, Arissol, Romain, Adelaide, Labrosse, Monthy, Roucou, Hoareau, Woodcock, Esparon, Zialor, Bistoquet, Mondon, Labonte, Bastienne, Loze, Uranie, Aglae, Lemiell e Pillay. Korek sa? Pa bon, *ok* tenir zis en pti kou silvouple, Onorab Ghislain, Onorab Cosgrow e Onorab Vidot.

Mon'n azoute. Mersi. Nou a komanse mon a komans avek Onorab William.

### **HON WAVEN WILLIAM**

Mersi Mr Chairman. Bonzour Minis avek ou lekip. Mr Chairman mon ti anvi demann Minis par lefe ki lekol Grand Anse Mahe i avek konsey, zot in fer plizyer demann vizavi annan en Asistan *Librarian*, i annan en *library* me solman *library* i fermen akoz napa Asistan *Librarian* e sa i en zouti enportan pou bann zanfan lekol.

So mon anvi konnen depi tou sa letan akoz ki lekol Grand Anse Mahe pa ankor kapab ganny en *school librarian* e ki demars ouswa ki retar, zot pe gannyen pou zot kapab fourni sa?

Dezyenmman, avek sa sityasyon *COVID* nou'n vwar poudir bann zanfan in bezwen fer zot lesion atraver lezot mwayen, atraver nouveau teknolozi. So eski Minister pe mazin entrodwir *ICT* dan *syllabus* a lavenir?

E finalman Mr Chairman mon anvi, wi avek *COVID* osi tou. I annan bann zanfan ki en pti pe, mwen fortinen ouswa mwen kapab avek zot laprantisaz e zot in ganny defavorize akoz zot pa'n kapab

ganny akse avek bann zouti teknolozi.

Eski la larantre i annan bann lorganizasyon spesyal pe ganny fer, pou zot kapab *catch up* avek zot bann letid? Mersi Mr Chairman.

### **MR SPEAKER**

Mersi. *Panel silvouple* sinal, lev lanmen pou sa ki pou reponn. Minis wi.

### **MINISTER JUSTIN VALENTIN**

Mersi Onorab pou ou kestyon, ou annan 3 kestyon, lo sa ki konsern *librarian*, an se ki konsern *librarian*, mon pou les Dr Decomarmond reponn sa plitar.

Lo kote *ICT* dan lekol, dan nou plan ledikasyon zisteman teknolozi i en plan ki a latet nou devlopman. Mon nouveau plan ki mon pe prezant e mon ti a kontan en zour retourne dan Lasanble prezant mon plan Ledikasyon.

I pou neseser pour ki nou vwar lafason ki nou itiliz *ICT* ki fer ki tou bann ansennyan, tou etidyan i kapab konpran e ki mannyer zot pou entegre *ICT* dan zot laprantisaz.

An se ki konsern eski bann etidyan ki'n mwen fortinen eski zot pou kapab *catch-up*? Annefe pandan sa bann letan kot nou ti'n demann bann etidyan dan

sa letan COVID pou zot reste dan lakour, ti annan pa zis mwayen teknolozi ki ti an mars.

Nou ti demann bann paran pou pran kontak avek lekol zisteman, pou zot kapab al kot lekol rod zot bann dokiman pou zot bann zanfan. E bann zanfan byensir bann konteks dan lakour ki pa ti kapab resevwar, resevwar *internet* nou ti ekspekte ki bann paran in al kot lekol in al far sa, e akoz zisteman nou pa ti anvi defavoriz okenn etidyan.

E an plis ki sa lo televizyon nou ti esey nou mye, pour ki tanzantan laplipar ditan ti annan bann lesson, bann programm lo televizyon lasenn limero 3, SBC 3 e ki'n permet bann etidyan kapab swiv.

E byensir letan zanfan pou retour lekol i ava annan sa ki nou apel en *recap*, sa ki'n pase e mon, nou ekspekte byensir bann ansennyan pou *fill the gap* kot i neseser.

### **MR SPEAKER**

Mersi Minis. Nou a pas lo Dr Barallon.

### **PS LINDA BARALLON**

Wi, mersi Minister. Mersi Chairman e mersi Onorab pou ou kestyon. Kot i konsern *Assistant Librarian* nou konnen

poudir napa provizyon lannen pase e lannen avan.

Prezan lannen pase letan nou ti pe dan prosesis pou fer rekritman bann parey ou ti konnen ti annan *freeze*, e la nou pe sper nou Bidze pou nou pou bezwen fer lefe ki ti napa provizyon ditou pou en *Assistant Librarian* nou bezwen fer kreasyon pozisyon. E la nou pe regarde avek nou Bidze ki mannyer nou pou kapab fer sa pou asiste. Mersi.

### **MR SPEAKER**

Mersi. Wi Onorab terminen.

### **HON WAVEN WILLIAM**

Yes, mersi Mr Chairman pou ou pasyans. Mon ti a kontan demann avek Dokter par lefe ki i annan detrwa sa bann *post* ki ti ganny *freeze*, par egzant mon konnen lekol La Misère i annan byen bezwen pou en dimoun lo kote *management*.

E i annan Grand Anse osi i annan serten dimoun ki'n fini ganny dir poudir i pou gannyen, epi in ganny bann let poudir be zot pa pou ganny pran.

Eski ou pe konfirmen poudir tou sa bann *post* la, ki bann dimoun in fini fer *interview* wi in ganny *freeze* zot pou ganny apele e pou ganny en plas travay? Akoz zot la, pou le moman zot dan lensertitid e zot

pa konnen ki bor egzakteman zot pou ale. Mersi.

### **MR SPEAKER**

Dr Barallon.

### **PS LINDA BARALLON**

Wi Onorab nou'n fini regarde sa bann pozisyon e i annan sa bann dimoun ki'n fini ganny apele. E la nou pe zis esper nou aprouvasyon Bidze pou nou regarde ki kantite nou pou kapab pran e la nou pe regard bezwen, dapre bezwen lekol. Mersi.

### **MR SPEAKER**

Mersi. Onorab Adelaide.

### **HON FRANCOIS ADELAIDE**

Mersi Mr Chair. Bonzour Minis avek ou delegasyon. Mon byen kontan pou war zot mon annan 3 pti pwen, premyerman mon oule demann avek *panel* nou ti annan sa zafer *school autonomy* pou bann lekol, so ki zistans ou'n arive ek sa e ki bann lekol in *fully autonomy* ouswa zot ankor 50, 40 poursan?

Dezyenm kestyon en pti gin lo lekol Baie Lazare, i annan sa *hall* kot lakres ki mon'n koz lo la detrwa lannen pase, ki ti annan en problemm ek son bann lafnet, so mon'n war travay in komanse me solman

mon war apre in tenir en kou i pa pe terminen.

So petet en pti leklersisman lo la. Apre mon pe get bann *cleaning agency* mon pa satisfe sirtou, mon pa konn partou, me Baie Lazare akoz nou war zot vin zis en kou ler pou netwaye apre landrwa i ganny kote sal.

So eski en *maintenance* dimoun dan lekol menm, pa ti a fer sa travay pi byen ki pou la toulezour ki dan plas en *cleaning contractor*?

Mon dernyen pti pwen se mon'n anvoy en *email* kot Minister Ledikasyon ek kot Minister Lagrikiltir, Minister Ledikasyon ti fer mon konpran poudir i annan en *MOU* ki zot ti sinyen avek en lakonpannyen Sinwan lo laferm Anse La Mouche so, mon war sa landrwa in dezerte.

Mon'n demann lenformasyon pou mon konnen ki pe arive mon pa ankor gannyen. Eski i kot zot sa *MOU* zot ti sinyen, ouswa i Minister Lagrikiltir? Nou mon konnen kote mon pou *channel* mon *email*. Mersi.

### **MR SPEAKER**

Mersi. Wi, zis lev lanmen silvouple. Wi Minis.

### **MINISTER JUSTIN VALENTIN**

Mersi Mr Chair. E mersi Onorab pou ou kestyon. Lo kote lotonomi lekol, i nou lentansyon donn lekol zot lotonomi annefe *full* lotonomi me sa i pa en prosesis ki pou kapab fer deswit e i pa en prosesis ki pou kapab akonpli dan en pti peryod letan.

Akoz ou konnen byen lekol in plizoumwen dan lepase fonksyonn lo en fason vreman depandan lo sistem lo *Headquarters*. Pou nou kapab les zot lo zot menm byensir i pou bezwen absoliman ki nou ed zot dan sa prosedir atrap zot lanmen pou zot kapab fer fas avek sa.

E i annan en programm an plas ki nou pe travay lo la ki gradyelman, i pou annan en prosesis gradyel pou fer ki zot pou ganny zot lotonomi.

Lo lekol Baie Lazare la rezon petet ki akoz sa konstriksyon in arete mon pou demann petet PS Decomarmond pou reponn sa.

*Cleaning Agency*, senserman nou osi nou pa'n neseserman satisfe avek tou *Cleaning Agencies*. i annan ki pe, non, non, mon retir sa. nou pa neseserman satisfe avek lafason ki bann *Cleaning Agencies* pe fer dan bann lekol.

I annan *Cleaning Agencies* byensir ki pe travay formidab kot zot bann lekol me i annan

nou pa neseserman satisfe avek sa ki zot pe fer.

Nou, nou ti a kontan nou osi. Nou ti a kontan nou osi ki lekol i annan kontrol lo son bann *cleaners*, son bann dimoun i netway son lekol ale akoz en osi i konsern depans, i konsern depans.

Akoz byensir kalkil ki mon annan *Cleaning Agency*, i konsonm apepre 5poursan nou Bidze nou ti a kontan annan nou prop *Cleaning Agency* or nou ti a kontan annan nou prop *cleaners* dan bann lekol.

Donk nou pe revwar, nou pe revwar kot i annan bann defayans e nou pe demann lekol pou zisteman get byen ki pe arive e donn nou bann lendikasyon pou nou kapab pran aksyon nesesar pour ki lekol nou koz ek sa bann *Cleaning Agencies* pou ki lekol evantyelman i ganny byen ekipe e zot ganny byen netwaye pou benefis zanfan dan tou laspe.

Lo laferm Anse La Mouche mon pe gete si ou pe koz lekol *SIAH* i ete a ler aktyel. Ki pe arive a ler aktyel, akoz i ezerte, semi-dezer, lekol *SIA* in bouz kot lekol Grand Anse Mahe, an atandan ki sa lespas i ganny konstriksyon en nouveau lekol.

I annan en nouveau lekol ki an demars pou konstrir. Ki pe arive la a ler aktyel se ki, sa

lekol pe ganny, pou ganny konstrir par en fon enternasyonal. E keksoz ti'n kapab bouz pli devan, me akoz *COVID*, bann *funding agencies* pa'n ganny sans desann Sesel pou fer bann, pou kontiny bann formalite.

Me osi to ki tou keksoz i retourn normal i pou annan en konstriksyon en nouvo lekol *SIAH* ki pou ganny fer lo sa laplas ki ou a pe koz lo la.

### **MR SPEAKER**

Mersi. Dr Barallon, lekel ki pou pran dernyen pwen? Renovasyon lekol Baie Lazare.

### **PS LINDA BARALLON**

Mersi Mr Chair. Parey ou konnen i ti annan sa gran travay renovasyon ki ti'n komanse pou tir karya ek tou sa bann lezot konponan ki ti annan kot lekol Baie Lazare. Malerezman nou'n ganny problemm avek kontrakter kot son kalite travay avek lespas ki i ti pe sipoze rann nou louvraz ti en problemm.

E la pou le moman sa i avek *procurement* e in ganny avoye kot Biro *Attorney* Zeneral pou kapab determinen si nou pou zis pey li sa travay ki in fer ziska prezan apre rod en lot kontrakter pou nou kapab fini louvraz.

Me parkont sa *hall*, sa *hall* la nou pe tir en pti larzan anba nou '*maintenance*' pou nou kapab aranz li akoz lekol pou bezwen pou Lendi. Mersi.

### **MR SPEAKER**

Mersi. Wi, terminen.

### **HON FRANCOIS ADELAIDE**

Zis en pti leklersisman lo sa *MOU* la, aparaman ki mannyer mon'n ganny en konpran Ledikasyon ti siny en *MOU* avek en lakonpannyen Sinwan anba kot sa zarden. Mon oule konnen si sa *MOU* i kot zot ouswa i kot Minister Lagrikiltir?

Akoz mon'n avoy 2 *email* apepre 2 mwan pase mon pa ankor ganny okenn repons zis pou mon kapab adrese, akoz ki i fer sa later nou pe promouvwar Seselwa pou plante. E mon pa konnen akoz en lakonpannyen sinwan in gannyen pou plante? So mon i oule konnen ki i annan san sa *MOU* pou nou kapab *sort out*, me nou ava gete. Mersi.

### **MR SPEAKER**

Mersi. *Panel, yes.*

### **MINISTER JUSTIN VALENTIN**

PS Barallon i anvi dir en keksoz lo la. Mersi.

### **PS LINDA BARALLON**

Mersi Mr Chairman. Mersi Onorab. Sa size *MOU* avek sa later ki obor *SIAH* ki bann sinwan pe okipe mon rapel nou ti vin dan Lasanble dan sizyem Lasanble ek Minister Lagrikiltir pou diskit lo leta devlopman sa *MOU* me sa ti ganny *led* par Lagrikiltir, *ok?*

Nou dan nou posesyon nou napa en kopi sa *MOU*, me selman Onorab nou kapab regarde avek nou partner *where we are* e ki mannyer sa pe ganny zere. Sa nou kapab al rode. Mersi.

### **MR SPEAKER**

Mersi. Onorab Loze.

### **HON JOHAN LOZE**

Mersi Mr Speaker. Mr Speaker ki mon anvi demann *panel* se la ki lekol pe reouver, *still koman* en prekosyon.

Eski zot pe *plan* envestir dan en plan *distance learning*, pou si an ka la sityasyon i retourn ankor parey kot zanfan i bezwen al dan laprantisaz kot lakour? Si zot annan okenn plan pou vin avek en fason pli annord, pou nou bann zanfan kot lakour nobou fer zot letid a zistans?

E mon dernyen kestyion se nou pe ouver lekol le 15, re louvertir lekol i le 15 e nou tou nou konnen ki sityasyon pos,

bann paran Seselwa, lafanmir Seselwa ka i ariv le 15.

Eski zot annan okenn fason pou ede siport bann paran, bann zanfan ki vwar zot son difikilte la dan sa letan le mwan fay la? Mersi Mr Speaker.

### **MR SPEAKER**

Mersi. *Panel*. wi Minis.

### **MINISTER JUSTIN VALENTIN**

Mersi Mr Chair. E mersi Onorab pou ou kestyion. Parey mon'n dir pli boner *ICT* i en lobzektif enportan lo mon azanda e mon krwar bokou dimoun dan Minister Ledikasyon in rekonnet sa e *ICT* i lo nou plan, sepandan i pa pou depan zis lo Minister Ledikasyon ki i fer ki *distance learning* atraver dizon teknolozi i en realite byensir.

Me nou pou *lead* sa plan nou pou *lead* sa filozofi, e *distance learning*, zisteman i pa pou neseserman vedir ki ou keksoz i ganny fer par *internet*, sa osi i en kanpanny ki nou pou bezwen fer bann dimoun konpran, i annan televizyon ki nou kapab servi.

I vre ki sa lannen i pa'n lafason ki nou ti a voudre i ete, me selman mon rekonnet ki i annan en gran amelyorasyon la kalite, lafason ki sa voyaz nou'n

atak bann laprantisaz pandan sa letan COVID.

I annan bokou ansennyan ki'n vin devan, e zot menm zot in aprann servi teknolozi pou zot kapab avans annavans.

E lo plan SIT lo plan SIT zisteman *blended learning*, i en topik, i en temm ki zot pe met dan laprantisaz ki fer ki ansennyan ki pe ganny *train* dan Sesel finalman, i ganny plis sa model tradisyonnal, i ganny osi bann model, bann model ki en pe pli resan pou zot kapab vwar ki mannyer laprantisaz i kapab ariv kot bann zanfan, san neseserman servi sistem tradisyonnal.

E trwazyenm pwen ki konsern louvertir lekol, annefe si ou realize si zot realize lekol ti'n devret komanse depi le 18 Zanvye. Alor preparasyon tou dimoun dan an en pti ti pou re komans lekol depi le 18 Zanvye.

Savedir pou mwan kaye bolpenn, bann keksoz koumsa ti pou'n devret fini an plas me in ganny zis sa letan ki'n ganny retarde. Alors mon konnen bokou paran ti'n met zot pare pou komans lekol le 18 Zanvye, me i annan osi kot lekol *Dedicated Fund* ki bann zanfan, bann paran annefe i kapab *apply*.

E sa i kouver goute bomaten, *morning snacks*, i

kouver *lunch*, i kapab kouver osi *stationary* e i kapab kouver osi dan en serten konteks liniform.

Alor mwan ki mon kontan donn sa konsey bann paran, pran kontak ek zot lekol, koz avek zot lekol e zot lekol pou aktyelman diriz zot ver lafason ki zot pou fer. E si *PS* ti anvi azout keksoz lo la i ti pou petet amplifie en pti pe plis.

### **MR SPEAKER**

Wi. *PS, FC.*

### **FINANCIAL CONTROLLER** **LINDA MONTHY**

Mersi Mr Chair. Mersi Onorab pou ou kestyion lo kote lekol, bann etidyan ki zot paran i war zot pa kapab asiste.

Ok nou annan sa *Dedicated Fund* ki sorti kot *Social Protection* ki sa lannen i ava Bidze Minister Ledikasyon ki ganny zer par bann lekol, sa bann paran ki anba benefis sosyal lekol idantife zot bann zanfan e i asiste zot bann zanfan osi.

E sa paran i bezwen ampli form kot lekol e i ganny aprouve par Lazans Proteksyon Sosyal e *endorse by District Administrator*. Mersi.

### **MR SPEAKER**

Mersi. Onorab ou bann kestyon mon krwar in ganny reponn, mersi. Adrese, ou annan ankor klarifikasyon ou bezwen? Wi Onorab.

### **HON JOHAN LOZE**

Mersi Mr Speaker. Mr Speaker mon ti zis oule port a latansyon Minis, le 18 Zanye sityasyon ti diferan nou ti annan bokou plis fanmir lo URS, lo SETS, lo *welfare*. Fanmir ki ti pe ganny *popup* par sistem Social Welfare e Social Safety Net dan pei.

Mon pe zis met a ou latansyon ki ou pou bezwen met pare e *être prepare for an influx of* plis paran petet ki pou vin fer demann, akoz zot *genuinely* dan bezwen. Se sa la diferans ant le 18 zanye avek ozordi le 15 lafen kot nou ete la. Mersi Mr Speaker.

### **MR SPEAKER**

Mersi Onorab. Mon krwar Minis a note. Nou a pase lo Onorab Zialor.

### **HON NADDY ZIALOR**

Mersi Mr Chair. Bonzour *panel*. avek ou permisyon Minister mon'n tann ou pe koz lo sa novo dimansyon ki zot anvi anmenn Minister Ledikasyon so si ou kapab donn nou en pti git ki plan Minister Ledikasyon i

annan *when it comes to Exceptional Schools* pou elev en pti git zot nivo.

E i e lekol ki bezwen bokou lasistans *in terms of adapted equipments* pou bann zanfan *special needs* e *special need* across lekol primer segonder li menm.

Apre ki pozisyon Minister baze lo larepons ki Minis Lafanmir ti dir nou pou enkorpor *VTC as a professional center?* *In terms of recruitment*, in annan bokou dimoun ki'n lo URS dan Minister Ledikasyon li menm.

So mon kestyon se vi ki zot in dir ki in annan serten *post* ki pe ganny *unfreeze* sa lannen, ki kantite resipyen URS ki zot pe mazin abzorbe? Epi si ou kapab dir nou dan ou Bidze si sa *Laptop Scheme* pou bann *teachers* i ankor egziste? Mersi.

### **MR SPEAKER**

Mersi. Wi *panel*. wi Minis.

### **MINISTER JUSTIN VALENTIN**

Mersi Mr Chair. E mersi Onorab pou ou kestyon. Onorab Lekol Eksepsyonnell i en lekol ki mwan personnelman mon'n vizit li, akoz mon anvi ki sa lekol definitivman i reisi dan son misyon.

En keksoz lo nou plan ki nou pe mazinen pour Lekol

Eksepsyonnel ou pou realize ki mon krwar ki anver apepre le 03 Desanm ler zot ti pe selebre Lazournen Enternasyonal pou Dezabilite e mon ti fer li mon devwar pour fer ki 2 ansennyan i al dan 'Bonzour Sesel' pou zot koz lo sa lekol.

Akoz mon anvi bann nouvo zenerasyon ansennyan i ganny entrodwir ek sa lekol. Akoz, akoz bann ansennyan i annan en bon pe ki pe ariv lo laz pou *retire* e mon anvi ki nou ganny ansennyen pou ariv dan sa lekol.

Alors Lekol Eksepsyonnel i lo nou plan e mon'n deza osi koz avek enn de ansennyen pou zot komans prepar bann *training programs* ki egzakteman ki pou adres bann konsern imedya bann ansennyan ki pou travay avek bann zanfan kot Lekol Eksepsyonnel.

E apre byensir i annan en konstriksyon en nouvo blok laba ki pe ganny fer, de nouvo laklas ki fer ki pou kapab aranz sityasyon fer ki konfor bann zanfan ki lekol kot lekol eksepsyonnel i amelyore dan bokou sans.

Lo kote *Vocational Training School* mon panse ki PS Barallon ouswa PS Decomarmond ava annan keksoz pou dir.

### **MR SPEAKER**

Lev lanmen silvouple. Wi PS Barallon.

### **PS LINDA BARALLON**

Meri Mr Chair. Mersi Onorab Zialor. Wi nou'n ekoute i annan en pe bann 'falet' ki'n ganny diskite me Minister Ledikasyon nou pa ankor antre dan sa diskisyon avek lafanmir pou regard en pti kou vreman rezon det sa VTC - sa *Vocational Training Centre* e ki zon relevans avek bann sant profesyonnel.

E nou krwar ki tou zanfan in ganny en sans pou li devlope e pou li epanouir.

E sa i ava en diskisyon pou nou antreprann pou nou donn valer sa sant *either* l'integrasyon or ki kolaborasyon nou'n deza annan avek bann sant profesyonnel dan diskisyon avek SQA ek bann Lotorite pou nou vvar devlopman sa VTC. Sa nou kapab pran sa demars pou nou kapab diskite donn plis valer. Mersi.

### **MR SPEAKER**

Mersi. Wi Minis.

### **MINISTER JUSTIN VALENTIN**

An kontinyasyon avek sa pwen lo Lekol Sant Vokasyonnel, mon

osi anvi dir bann Onorab ki nou anvi koman en target dan nou, nouvo plan Minister Ledikasyon, nou osi anvi vwar bann sant profesyonnel ki akademik ki, pwen akademik i pa neseserman *the entry requirement*, si zot konpran byen ki mon pe sey dir.

Akoz sa bann zanfan wi ki anvi bouz lo en lot letap me selman zot nivo akademik pa neseser.

Me bann sant profesyonnel nou an vi ki i annan omwen 1 oubyen 2 sa bann sant, ki kapab akey bann zanfan apre S5 ki zot nivo akademik pa neseserman byen, me ki zot annan lezot potansyel formidab ki zot kapab epanouir e grandi. Alors nou santiman e nou leker osi i pou tou bann zanfan reisir san okenn difikilte.

Lo kote URS ou'n demann sa kestyon e mon krwar nou kapab a sa moman reponn sa kestyon, sif ki nou annan se ki dan sistem ledikasyon ti annan omwen 224 partisipan lo URS e Finans ki nou'n, menm si nou Bidze pa ankor ganny aprouve me nou'n fer en kalkilasyon.

*Given* ki sa Bidze i aprouve nou pou kapab o nivo lekol abzorb 63 URS, *given* sa Bidze ki nou'n gannyen e *given* ki i

aprouve parey i ete nou pou kapab abzorb 63, ladan zis an vitman koman en kalkilasyon;

44 *teachers assistant* i ava annan 4 bann *work supervisors*, i annan 8 bann *general assistant*, en *library* nou kapab *recruit* 2 *warden* epi 3 lezot. So sa 63 nou kapab. E o nivo bann *training centres* nou annan lespas, lespas pou met omwen 17, 17 ki kapab ganny *train* pou vin bann ansennyan ouswa bann e asistan ansennyan. Vwala leta *URS* dan Minister Ledikasyon.

### **MR SPEAKER**

Ti annan *Laptop Scheme* mon krwar Minis mon pa konnen lekel ki pou pran sa.

### **MINISTER JUSTIN VALENTIN**

E FC Mr Chairman i anvi reponn lo *Laptop Scheme*.

### **MR SPEAKER**

Wi madanm.

### **FINANCIAL CONTROLLER LINDA MONTHY**

Mersi Mr Chair. Konsernan *Laptop Scheme* mon a donn en pti fason ki mannyer *Laptop Scheme* i marse. Minister Ledikasyon bann *teachers* i *apply* pou zot ganny en *laptop*, e ledikasyon i fer *tender* i envit bann dimoun ki vann *computer*

pou *apply* lo sa *tender* zot *tender* tou zot *bid* e ledikasyon i aste *computer* avek sa bann *vendor* e apre bann *teachers* i *apply* pou zot ganny sa *computer*.

I distribye avek zot e prezan siny en *authorisation form* pou tir lo zot saler *by monthly instalment*. E ler sa group in fini peye zot tou ki sa larzan i re antre dan kont, la Ledikasyon i lans en lot *tender* avek sa menm sa larzan pou kapab aste en lot *batch*.

E mon ti a kontan dir ki bann *teachers* ki ti lo sa enn avan in fini peye me selman Ledikasyon pa ankor lans en lot *tender*, pou en lot group *teachers apply*. Mersi.

### **MR SPEAKER**

Mon konnen i annan en kantite manm ki'n *plan* travay Komite pou midi edmi, alor menm si nou'n al la en pe kourt nou a pran en poz la e nou a repran 2er apre midi. Alor *panel* mon dir zot mersi pou le moman e nou a revwar zot 2er. Mersi.

**(BREAK)**

### **MINISTRY OF EDUCATION** **(cont)**

### **MR SPEAKER**

Bonn apre midi tou dimoun. Nou a repran avek kestyon lo Bidze Minister Ledikasyon. E mon ava regarde lekel ki la Onorab Labrosse.

### **HON RICHARD LABROSSE**

Bonn apre midi Minis bonn apre midi *panel*. Mr Speaker mon premye kestyon mon'n tann Onorab Loze bomaten in al en pti pe lo sa laliny konsern teknolozi.

Me mon pou anforsi en pe ek Minis lo sa kestyon akoz mon konnen ki resaman ti annan en group zenn ti pe devlop en 'App' pou fer aprantisaz. Mon ti a kontan konnen si ou Minister kekfwa i okouran lo la si zot okouran ki direksyon sa pou ale ?

Mon dezyenm kestyon i lo 'current challenge's, mon'n vwar ki zot challenges zot pe gannyen pou kit bann profesyonnel dan lansennyman. E la mon ki ti'n u nouveau Minis deor ler ou'n pran sa pozisyon ki bann nouveau stratezi ki ou pe vin avek pou fer ki nou bann Seselwa reste lo sa lansennyman dan sa karyer ?

Apre mon pe regard osi mon trwazyenm kestyon i konsern lo *TVET* avek bann ledikasyon vokasyonnel e nou vwar ki i annan bann zenn ki

parfwa zot napa sa lakademi me selman zot annan sa lanvi dan bann louvraz vokasyonnel mon rapel kot lekol plaisirance segonder lontan ti annan sa programm ki ti ed byen kot bann zenn ti sorti byen.

Mon ti a kontan konnen ki lanfaz Minister pe mete lo la e osi dan menm laliny mon vwar ki tou le Desanm or tou le lannen i annan bann *graduate* ki sorti dan bann *Post Segonder* parey Lagrikiltir, *Maritime* e menm letid *SIT Providence* laba.

Eski Minister i *monitor* ansanm avek Gouvernman Lokal pou vwar si sa bann zenn i vreman antre dan sa bann lanplwa ki zot in lekol? Akoz mon vwar ki i annan bokou demann dan lanplwa me selman dan sa bann sekter tou le Desanm nou pe vwar la kantite *graduate* ki pe sorti dan sa bann sekter? Mersi Mr Speaker.

### **MR SPEAKER**

Mersi Onorab. Wi Minis.

### **MINISTER JUSTIN VALENTIN**

Mersi Mr Chair e mersi Onorab pou ou kestyon. An se ki konsern laprantisaz avek teknolozi ;- parey mon'n dir sa i en priorite Minister Ledikasyon.

E nou pe met bokou lanfaz en kantite bann novo, anfen i annan bokou zenn ki pe vin avek bann novo nide, tou sa bann zenn ki pe vin ek novo nide in deza pran kontak avek nou, e nou an konsiltasyon avek zot pou nou servi zot bann prodwi ki zot pe fer.

Dezyenm pwen pou pe koz lo defi ki bann profesyonnel dan lansennyman. Annefe sa i en defi, wi en defi. E i annan bokou rezon akoz zenn anfen akoz bann sitwayen Seselwa si oule, pa oule zwenn sa profesyon. Be parey mon pe dir mon dan mon konpanny ki mon pe fer la nou pe al ver bann zenn, bann zenn sirtou dan bann sant profesyonnel menm SALS.

E nou pe donn zot, nou pe montre zot bann lavantaz, lavantaz akoz petet zot devret zwenn lansennyman. E pour nou, nou pe war bann novo nide ki pe arive, e bann novo dimoun ki pe eksprim lentere pou antre dan lansennyman.

Sa i fer nou enteresan, ankourazan. E byensir *teacher* i annan en *Scheme of Service* ki responsab e nou ti a voudre byensir fer en pli meyer *Scheme of Service*, me pou le moman sa *Scheme of Service* ki nou annan i rezonnab e i pe ede osi pou atir

en pe bann zwenn profesyonnel dan lansennyman.

*TVET* mon repete nou donn bokou lanfaz lo vokasyonnel. E parey mon ti dir dan a en moman nou ti a voudre osi annan bann sant profesyonnel ki akey bann etidyan ki pa neseserman an doue akademikman.

Vokasyonnel i en temm tre enportan i sorti tre byen lo nou programm Minister Ledikasyon. I annan osi demars pou nou komans en *vocational school* me ankor sa in ganny retarde akoz sityasyon finans dan pei.

Me osi to ki nou sityasyon finans i amelyore sa konsep *vocational training school* ki'n ariv en zistans tre avanse pou reganny konsidere. Me pou le moman ki nou fer, ou kontinyen met lanfaz lo bann lekol dan bann lekol ki *technical education* i reste lo *curriculum* e i ganny aforsi.

Ou dernyen pwen, ki arive avek bann zenn ki dizon fini zot bann sant profesyonnel, eski zot reste dan sa lanplwa kot zot ganny formasyon? La osi i en defi en, pa tou zenn ki swazir pou reste dan sa lanplwa.

Ou konnen akoz annandler pou *être* fran, annandler zenn pa pe neseserman swazir sa lanplwa petet akoz zot ki anvi, i annan

bann presyon paran ki ganny mete lo zot pou zot fer, ou konnen pou zot, annou fer dan '*inverted comma*' pou zot ganny lekol.

E ler zot fini ganny lekol zot lekol me i annan petet ki fer plezir paran zot lekol me apre ler zot fini zot a neseserman kontinyen san sa bann landrwa, sa i en faktor. Sa nou'n remarke i annan en faktor avek sa.

E apre i annan en dezyenm faktor osi, ler zot in fini lekol zot war lezot lavenir, pei i dinamik, pei i dinamik i sanze, konteks e dinamik i sanze. Ou war bann zenn pe bouz dan lezot lavenir e nou byensir ou pa kapab anpes bann zenn bouz dan lezot lavenir.

Me *ANHRD* i annan en programm kot, byensir *ANHRD* pou vin la, a enn sa bann prosen zour ki pe vini kot i pou osi koz lo sa ki nou apel en *graduation* en *Graduate Destination survey* kot i gete kot bann etidyan in ale, e si zot in al kot zot ti devret pe ale.

Be nou ankor ou keksoz i depan lo sa i nou apel *careers guidance* e lafason ki etidyan i ganny enstrir pou antre dan en profesyon i neseser i *matter* en kantite. E lanfaz nou devret osi pe mete at *secondary level* pou

fer sir ki zanfan etidyan i konpran dan ki laliny ki zot pe ale e koumsa zot reste dan sa profesyon pour soutenir devlopman pei. Mersi Mr Chair.

### **MR SPEAKER**

Onorab in mank keksoz?

### **HON RICHARD LABROSSE**

Wi Mr Speaker. Minis mersi bokou pou ou bann detay byen detaye me selman ler ou'n donn mon larepons la mon pe mazinen la, eski avek Minister Lanplwa zot annan en konversasyon konmsi pou zot konnen kantite manrmay zot pou pran?

Akoz ki mon pe sey dir la nou pa anvi war nou dan en sityasyon kot nou pran nou 200 manrmay pou al lekol Otelyer, apre ler sa 200 manrmay i fini lekol swa nou war zot pe asize pa pe ganny en louvraz, swa nou war zot pe fer lot louvraz ki zot pa'n lekol dan sa domenn.

Eski i annan en konversasyon ek lanplwa pou dir nou kwa ki nou bezwen plis plo marse lanplwa pou zot kapab balanse zot osi ler zot pe?

### **MR SPEAKER**

Mersi Onorab.

### **HON RICHARD LABROSSE**

Ok mersi.

### **MR SPEAKER**

Minis.

### **MINISTER JUSTIN VALENTIN**

Mersi Mr Chair e mersi Onorab. wi nou an konversasyon annefe en Minis ki mon zwenn *on a one-to-one basis* plis depi ler mon'n vini konmsi bann tet-a-tet i Minis Lanplwa.

E zisteman nou anvi ki Ledikasyon ek Lanplwa i mars ansanm senkroniz byen ansanm pou nou evantyelman *attend* sa bi resours devlopman resours imen ki nou anvi *attend* dan Sesel.

### **MR SPEAKER**

Mersi Minis. Onorab Lemiel.

### **HON SYLVIANNE LEMIEL**

Mersi Mr Speaker. Bonn apre midi Minis avek ou delegasyon. Premyerman enn mon ti a kontan remersye pou sa novo lakres ki depi lannen pase e pe ganny konstrir Anse Royale e nou vwar en sonm R9.4milyon ki'n ganny mete ankor dan Bidze sa lannen. Eski sa sonm larzan li menm i pou ase, sifi pou fini sa lakres?

Dezyenmman ki bann facilite ki zot pou annan dan sa lakres? Otan ki i modern ki kalite facilite pou annan ladan ?

Apre an menm tan Minis mon ti a kontan konnen an vi ki ou moman e ki Minister li menm pe anvizaze anmenn bann sanzman dan mon kapab dir bann sanzman mazer ou'n nonmen ki pou annan dan Ledikasyon. Eski Minister i annan okenn nouveau plan ki i pe al enplimante? E si wi, ki lenpak ki sa pou annan lo zot Bidze?

Mon ti a kontan pou konnen ki si zot ankor pe anploy bann konsiltan? Mon vwar larzan in annan ladan pou bann konsiltan, konbyen konsiltan i annan ki pe travay avek zot Minister? Lekel sa bann konsiltan? Konbyen larzan zot pe gannyen?

E dernyerman mon ti a kontan konnen petet zot bann lekol eski i *fully-staffed* pou le moman? E si non, petet ki bann demars ki zot pe fer pou zot kapab ganny bann Seselwa, bann *teachers* Seselwa pou kapab met zot dan lanplwa? Mersi.

### **MR SPEAKER**

Mersi Onorab. Minis wi.

### **MINISTER JUSTIN VALENTIN**

Mersi Mr Chair. Mersi Onorab pou ou kestyion. Nouvo lakres Anse Royale wi, nouvo lakres Anse Royale i baze lo en nouveau,

bann nouveau standar ki nou Minister Ledikasyon in adopte ki pou dezormen bann lekol lakres i ganny konstrir lo la, bann i annan omwen 3 facilite enteresan ki annan dan sa lakres ki bann lezot lakres napa.

I annan dabor en *ramp* e sa i pou permet akse pou bann etidyan ki ‘otreman kapab’, i pou annan osi en *multi purpose court* dan sa *multi purpose room* dan sa lakres. Ki fer ki pou ede petet pou bann pti zanfan fer zot ledikasyon fizik.

E ler lapli i tonbe zot kapab servi sa lasal. E an lot keksoz modern ki pou annan ladan i pou annan en pti *Library* pou bann zanfan e ki sa dan bann lezot lakres pou le moman kapab.

E preznan kestyion se ki, e si larzan ki'n ganny bidzete pou ase? Annefe larzan ki ti'n ganny bidzete ti pou ase, me *still* i pou determin lo konteks, konteks nasyonal ki mannyer toleran i sanze.

Me pou le moman, pou le moman definitivman mon napa lenformasyon ki si zanmen sa bann dinamik pei i kontinyen sanze, ki kantite larzan ou pou bezwen petet bezwen an plis? Pou le moman a ler aktyel mon napa sa lenformasyon.

Me selman baze lo plan aktyel si keksoz ti pou mars parey i ti pou ete wi ti pou annan larzan.

Lo novo plan ;- lo novo plan sa keksoz enteresan eski novo plan Ledikasyon pou annan okenn lenpak lo Bidze? Ou konnen i annan plizer faz sa bann plan ki nou pe fer byen kalkile, plizer faz pou nou devlop, e pou nou fer nou bann plan en realite.

I annan bann faz, petet i annan bann faz ki lo komansman, petet ler mon pou gete la ki ou komans apartir dizon Mars pou ale, petet ziska an Zilyet, i pou annan bann faz ki pa pou neseserman bezwen tro bokou resours finansyel.

Ou konnen bann faz kot en pe bann ledikasyon entern, eksplik bann dimoun i mannyer keksoz pou ale demen i annan bann sanzman ki petet ou pe deplas en dimoun ti li la met li en lot bor. Me i mars avek son resours i mars avek son Bidze pou napa neseserman en gran lenpak lo Bidze akoz i pe fer sa byen kalkile li.

Nou konnen i en problem finans nou konnen i annan en problem finans nou pa kapab tro anbisye pou pa vin realis, akoz si nou fer sa nou osi nou menm nou pa pou bann bon edikater.

Alor nou pa kapab fer sa bann gran soz, me selman byensir nou pou bezwen bouz ledikasyon. Alors ki nou pe fer nou pe bouz li dan nou mezir elwannyen. Alor nou pou fer sir nou pa ede kre bann trou vin ki pa neseser egziste.

Lo lot kestyon i konsern, eski lekol la i *fully-staffed*, mon krwar PS, mon ti a kontan ou reponn sa kestyon pou donn en pe leta bann *staffing* dan lekol. Mersi.

### **MR SPEAKER**

Mersi. PS wi.

### **PS LINDA BARALLON**

Mersi Minister. Mersi Mr Chair. Lo kote primer paret mon ti'n mansyonnen pli boner i annan nou bann *interview* ki nou'n fer ki nou pe zis esper finaliz Bidze la pou nou, e tou dimoun an pozisyon si tou keksoz i mars byen nou riske *fully-staffed* akoz nou'n pran sa bann URS pou nou kapab anploye.

Prezan si URS par egzanp nou pe met li dan pozisyon *teacher assistant*, nou'n get bann *teacher assistant* ki lontan i la ki annan sa kalifikasyon pou nou'n bouz li pli o konmsi pou fer li vin en *supply teacher*, ki apre i aba antre lo *training* atraver son

*BLM* pou li kapab li osi antre dan *teaching profession proper*.

Lo kote segonder nou ankor annan serten mankman, serten mankman akoz nou pan kapab fer vini premyerman *expatriate* avek bann difikilte. Apre nou annan bann *expatriate* ki pa pe renouvre zot Kontra. Apre nou pe fer osi sa legzersis kot nou gete bann *expatriate* ki zot performans pa a laoter pou nou kapab gradyelman ranplas zot.

E pour sa i annan sa legzersis ki nou'n komanse avek bann *returning graduates*, kot nou annan en komite ki'n ganny mete lo nivo Minister Ledikasyon ki pe kapab travay avek sa bann dimoun e regarde lekel ki annan lentere, pou *join lansennyman* e pran pou kapab prepar sa *course PGC* pou zot kapab ranplas bann dimoun sirtou bann mankman lo nivo primer avek segonder. Mersi.

### **MR SPEAKER**

Kontinyen Minis wi.

### **MINISTER JUSTIN VALENTIN**

Mersi Mr Chair. An se ki konsern konsiltan Onorab in demann konbyen konsiltan i annan. Pou le moman avek Minister Ledikasyon i annan 2 konsiltan, enn ki lo sa ki nou apel en *service agreement* e ki

tre prosennman i pe *retire*. E apre nou annan en lot ki konsiltan pou bann proze ki annan pou fer, konbyen sonm zot gannyen egzakteman? Mon kapab prodwi sa lenformasyon apre. Mersi Mr Chair.

### **MR SPEAKER**

I reste en pwen. Wi Onorab Lemiel, zis klarifye.

### **HON SYLVANNE LEMIEL**

Mersi Mr Chair. Dan larepons ki *PS* in donnen i annan bann dimoun ki petet zot ti *teacher* zot. Petet zot in ale *or* zot pou ganny dir ou bezwen arete akoz ou ti annan serten kondisyon medikal.

Me dan sa letan kot nou ete la kekfwa sa si mon i war ki ankor pe asize e i santi li in rekipere i *ok li*, i anvi retournen Minis, eski zot pe la lans en lapel ankouraz sa bann dimoun pou retournen olye ki nou *recruit aletranze*?

Eski zot pou ankouraze sa bann dimoun la, parey mon dir zot ti annan en problem medikal, zot ti ganny dir arete akoz sa problem medikal me dokter pan zanmen sertifye zot ou pa kapab travay.

Eski zot ankouraze la, lans en lapel pou dir sa bann dimoun vini vin devan la vin

*apply zot kapab successful pou tournen? Mersi.*

### **MR SPEAKER**

Mersi.

### **PS LINDA BARALLON**

Mersi Onorab. Ordinerman si en dimoun i annan en problem medikal nou, nou esper papye sorti kot Lasante. Nou, nou pa pou kapab fer sa dimoun arete si nou napa levidans poudir sa dimoun i annan en problem medikal.

Savedir pou nou repran en dimoun koumsa, nou bezwen pran en dimoun sorti kot Minister Lasante pou dir poudir kondisyon sa dimoun in amelyor. E in annan an ka kot in annan an dimoun son kondisyon in amelyore alors nou'n demann li en papye medikal pou nou kapab repre li. Ok?

### **MR SPEAKER**

Mersi. Nou a *move on*. Onorab Esparon.

### **HON REGINA ESPARON**

Mersi Mr Chair. Mr Chair ler mon pe regard Bidze lo kote *rehabilitation of school* mon pa pe war okenn alokasyon. E lo kote letan mon pe get Bidze lekol Glacis, osi mon pa pe war gran zafer ladan.

Me selman i annan sa problemm kot lekol Glacis lannen pase ti ganny en renovasyon lo bann *railings* ek sistem elektrik, ki ti en defayans akoz nou i ganny sa lekol avek Gouvernman Sinwan malgre nou ti byen kontan. Me selman Minis arba problem i annan problem. La an se moman lekol in fermen pou 4 mwan.

E ler bann *teachers* in retourn lekol i annan karya ki pe anvaire lekol kot bann *frame* laport pe ganny manze e evidaman si i kontinyen i pou tonbe. E i annan problemm kot bann biro osi pe ganny afekte avek salen ki pe rouye dan sa lekol.

Mon konnen poudir dan lepase mon'n dir ki parler nou ganny kado, me selman nou soufer apre ki nou ganny sa kado. E petet mon ti sizere ki letan nou ganny bann *Grant* koumsa ki Gouvernman i pran son larzan, li i annan sa *oversight* ki mannyer sa larzan i ganny depanse, *quality* keksoz ki ti ganny servi pou fer sa bann lekol i ganny met an kont, parske si nou ganny bann *poor quality*, i pa pou *last* nou lontan.

E se sa ki pe arrive ek lekol Glaci, parske nou ti war poudir *railing* ti zis en pti bout baget ki

ti annan *copper* lo la, me en serten letan ki son anndan ki manze ti zoli an deor me anndan pa ti bon.

E elektrisite osi sa voltaz kouran ki nou servi isi avek sa kalite lekipman ki zot ti anmennen i pa ti tonm dakor alor mon ti bezwen ganny refer.

Dezyenmman Mr Chair, bomaten letan *PS Barallon* in reponn kestyon Onorab Naidu lo *VTC*, e prenon kont ki letan *PSD Bonne* ti reponn kestyon Lendi *regarding VTC* in met mwan dan dout. E in osi met bann *teachers motivational training centre* dan dout. Parski avan sa zot ti tonm anba *NCFD* me la in nepli annan *Board*.

E Minister Ledikasyon i dir ki diskisyon pa ankor ganny fer. Sa bann dimoun i santi zot dan en *vacuum*, zot pa konnen kote zot debout, zot in demann en miting avek *PS Bonne* avek Minis Zialor zot pa ankor gannyen.

La Minister Ledikasyon pe dir napa sa diskisyon, pou gete ki mannyer pou konport zot anba ou Minister mon pa konnen. Nou ti ava zis kontan en pe laklerte lo la Minis silvouple. Mersi.

## **MR SPEAKER**

Mersi Onorab. *Panel* lekel ki pou reponn *please?* PS Decomarmond, ale.

### **PS ODILE DECOMARMOND**

Mersi Mr Chair. Onorab mersi pou ou kestyon. Wi parey ou'n eksplike nou'n depans en kantite pou nou fer renovasyon lo lekol Glacis. Dabor avek sa ban ranplasman *railing* in kout nou pres R4milyon parey ou konnen e osi travay elektrisite ki nou'n fer, in ariv en gro sonm osi.

E la nou okouran poudir i annan sa lenfestasyon karya. Nou *project officer* in ale lo *site* in fini fer en kalkilasyon.

Malerezman pou le moman nou pou napa larzan. I vin en pti pe parey sityasyon Baie Lazare kot nou pou bezwen ranplas preske tou sa bann laport lafnet e tousala, e sa i riske ariv nou plis ki R2milyon.

E nou'n fini fer nou *scope of work*, savedir la nou kapab regarde kote nou kapab ganny en pti larzan pou sey avek bann bout ki pli avarye. Apre ki gradyelman nou a kapab kekfwa ganny larzan kekfwa atraver milye lannen, pou nou gete ki mannyer nou kapab aziste pou nou sey travay larestan Glacis. Mersi.

**MR SPEAKER**

Ti annan son lot kestyon lo VCT mon pa konnen. Wi.

**PS LINDA BARALLON**

Bonn apre midi Mr Chair. Bonn apre midi Onorab. Wi nou pe ranforsi nou larepons bomaten poudir wi nou pa ankor fer sa diskisyoOn be nou la, si la fanmir i oule vin diskite lo fitir sa bann etidyan.

E sa bann *staff*, nou pou la pou fer sa bann diskisyon konstriktiv pou benefis sa bann ansennyan ek sa bann *staff*. Nou ava atann sa bann diskisyon pou nou *move forward*. Mersi Onorab.

**MR SPEAKER**

Wi Onorab, terminen silvouple.

**HON REGINA ESPARON**

Mersi Mr Chair. Mr Chair petet mon ti ava demann avek PS Barallon lekel ki pou inisyé sa diskisyon?

I pou bezwen ant Minister ek Minister parske Minister Lafanmir i dir i sipoze tonm anba Ledikasyon, e Ledikasyon i dir ki zot pa ankor ganny sa.

I bezwen annan en keksoz ki ganny fer to *breach the gap* la pou annan sa diskisyon.

Akoz si sak Minister i dir enn i vini, lot i vini, me personn pa pe vini finalman sa bann

dimoun kot VTC pou war zot dan en *vacuum*. Mersi.

**MR SPEAKER**

Wi, Minis i a reponn. Wi Minis.

**MINISTER JUSTIN VALENTIN**

Mersi Mr Chair. Mersi Onorab. Mon pou fer li mon devwar mon ava kontakte mon bann lezot koleg Minis, e nou ava komans en diskisyon e nou a rod le meyer solisyon. Mersi.

**MR SPEAKER**

Mersi. Onorab Romain.

**HON GEORGES ROMAIN**

Mersi Mr Chair. Bonn apre midi Minis avek ou *panel*. Mr Chair ler mon get Bidze Minister Ledikasyon, so far mon war en pli gro Bidze ki vin devan nou pou aprouve e par lao R1bilyon e ler mon regarde mon pou tous *more or less* dan '*other use of goods and services*'.

Ler mon get lo kote sekirite and enforcement mon war i annan 42milyon ki'n ganny allocate la.

E ler mon regarde mon'n fer en pti kalkil la mon war i annan koriz mwan Minis mon krwar i annan pou aepre en 19 lekol, i kapab annan en pe plis oubyen mwens mon pa konnen e mon vwar par lannen i tonm 3milyon, R3.5milyon.

E si mon diviz li par 12 R3.5milyon e si mon diviz li par kantite lekol apepre R185mil apepre par mwan.

Mon ti ava kontan konnen lekel sa bann *security firm* ki pe *provide* sa *service*. Sa i enn?

Apre dezyenmman osi lo kote *school meal fees*, lo kote manze pou manrmay lekol, mon vwar ki i annan R13milyon pour anba sa ladan ankor, e ankor mon pou al lo la ankor mon war i tonm apepre par lao R1milyon par mwan.

E ki mon pe demann Minis lo sa size *in the past* mon'n deza tann en size Manm dan sizyem Lasamble ti diskit konmkwa ti en pe gaspiyaz. Manrmay i pran manze zot pa manze, manrmay mon krwar i pran manze zot pa manze i ti en pti pe gaspiyaz.

Alor mon pe regarde ki in ganny fer lo sa size, si tou keksoz pe al byen? E mon ti a kontan dir ou Minis oubyen *PS* i kapab *confirm* sa ki zot pe servi byen sa larzan?

Apre dernyen mon vwar i an lo kote mon'n tann Prezidan koze ki in dir tou bann *Board Members* si zot kapab fer sa louvraz volonter? E ki zi zot fer sa byensir mon krwar i ti pe koz apepre R36milyon ki kapab fer *savings* lo la.

E parkont mon'n vwar la anba Bidze la mon'n vwar

*actually* i annan en *increase*, mon vvar avan i ti R4.2milyon la mon war i vin R5.5milyon, alors mon pe regarde si Minis in ganny sans koz ek sa bann Manm *Board* pou gete si zot kapab fer sa louvraz volonter lo sa size oubyen si ou Minis i annan keksoz ki oule dir nou lo la? Mersi Mr Chair.

### **MR SPEAKER**

Mersi Onorab. Minis wi.

### **MINISTER JUSTIN VALENTIN**

Mersi Mr Chair. Mersi Onorab pou kestyon. Zis pou, Onorab zis pou petet aranz en pti pe *figures*, lekol i annan bokou pis, bokou lenstitisyon i annan bokou plis ki sa i annan 36 lenstitisyon lekol, 36 lekol i annan 700 profesyonnel e apre byensir i annan *main headquarters* osi ki pe ganny gete avek sekirite.

Ou konnen bann kestyon ki ou pe demande i vreman relevan avek diskisyon ki pe pase a ler aktyel dan Minister Ledikasyon. An se ki konsern sekirite nou rekonnet, nou rekonnet ki sekirite parey bomaten mon ti dir a Manm parey avek Lazans *Cleaning* sekirite i osi en landrwa kot nou anvi ou osi fer en koupir.

Akoz ou'n nonm li an term *figures*, mwan mon pou nonm li

an term poursantaz i environ 5poursan nou Bidze, 5poursan nou Bidze. E nou osi nou war poudir sa i bokou e byensir sa i bann laranzman ki'n ganny fer dan lepase.

E la avek sa novo, sa novo ou a les mwan servi sa lekspresyon ‘sa novo laspirasyon’, sa novo lelan petet nou kapab rod en meyer solisyon. Akoz nou, nou anvi, nou anvi evantyelman larzan ledikasyon i ganny depans plis danm bann materyo ki annan lenpak direkteman dan laprantisaz e dan lansennyman.

Alor nou pou rod fason fer *saving* sa bann pwen. Ou osi koz lo *school meal*, ankor i bann landrwa kot nou kapab konsidere. Nou *school health programme* i azour avek sa diskisyon *school meal, tuck shop* ki mannyer pou fer sir ki zanfan i ganny le meyer swen nitritif ler zot kot lekol. Alors sa osi i dan konversasyon dan nou bann diferan deliberasyon ki nou pe fer a ler aktyel lo nivo Minister.

Mon pa konnen si *PS* i anvi azout keksoz lo sa, i pe sinal mwan ki mon dir tou, mersi bokou. Ah, *Board Chair, Board Chair* osi ou konnen les mwan dir, akoz mon osi a en moman mon'n deza en *Board*

*Chair* ou konnen *Chair* bann dimoun ki dan bann lekol sirtou lo bann *Board* zot in fer sa louvraz pou omwen 10an pou nanryen.

Mon krwar sa dernyen 2an ki zot pe ganny en reminerasyon pou sa. E i konplike en pe sa louvraz i konplike bann *Board Chair* bann dimoun ki travay lo bann *Council Lekol*, i depans bokou lenerzi pou ariv kot lekol monte desann dan zot prop transpor. Lekol i servi zot en kantite akoz lekol i bezwen zot e zot la laplipar ditan.

Wi nou kapab al ver zot, e mon konnen nou pou al ver zot pou demann zot pou fer sa louvraz lo petet en to en pe pli ba zot pou fer, mon konnen zot pou fer sa volonte ki sa bann dimoun i annan.

Me pou le moman onnetman nou pa ti ankor demann zot sa kestyon eski zot pare pou fer sa pou naryen? Nou pa ankor demann zot sa kestyon.

Me i ava vin parti konversasyon. I a vin parti konversasyon o firamezir nou avanse. Mersi bokou.

### **MR SPEAKER**

Mersi. Onorab Ghislain.

### **HON CHANTAL GHISLAIN**

Mersi Mr Chair e bonn apre midi Minis avek ou delegasyon. Bonn apre midi tou dimoun ki pe ekoute. Mr Chair, Minis atraver ou Mr Chair parfwa ler nou antre dan politik nou, i demande ki nou bezwen annan keksoz ki nou bezwen for.

Me i annan moman osi kot nou bezwen leker i tonbe pou lezot dimoun. Mr Speaker ler mon pe regard *Dedicated Fund* R4.2milyon, lannen pase ti R4.2milyon parey, prenon kont ki menm Minis in dir poudir ki letan i ti pe reponn kestyon Onorab Loze, in dir ki bann dimoun ki santi zot dan bezwen zot kapab vin *either* dan *Dedicated Fund*.

Minis mon kestyon lo sa zafer R4.2milyon, lannen pase i ti koumsa nou sityasyon ti en lot fason, dimoun ti pe travay, bann ki pa ti pe travay ti pe ganny en *full lapey*.

Prenon kont sa kantite paran ki ti lo *URS* zot in koupe R3500, bann ki ti lo *FA4JR* i kapab 2 fanmir ki annan tou lede tousala in koupe, eski ou krwar sa R42milyon pou sifi, 4.2 *sorry* R4.2milyon pou sifi pou tou zanfan ki bezwen *Dedicated Fund* i gannyen?

Apre si mon'n byen konpran Minis lo *Dedicated Fund* ou'n dir poudir bann, i ti anba Sosyal in al anba kot lekol

and prezan bann paran ler i pou fer bann aplikasyon kot lekol i pou bezwen retourne kot Sosyal pou fer evalyasyon.

Pou mwan mon pe regard sa koumsa mon santi sa paran ek sa zanfan la, ou a krwar i pou bezwen al mandyan sa pti morso *breakfast* ek sa bout *uniform* kot Sosyal prenon kont sa kantite *layers* keksoz ki zot in mete pou evite ki dimoun i ganny asiste anba *welfare* ek servis sosyal!

Minis ler ou'n reponn kestyon Onorab Loze osi pli boner, mon'n war konmsi i annan en diferans ant keksoz ki ou krwar, ki zot dan zot Minister zot krwar i ete avek la realite la ater.

Ouer lekol le 15 e notis in ganny donnez zis 5 zour avan lekol i ouver, e letan mon pe regard sa mon vvar li i en diskriminasyon ant bann paran ki eze, e pe defavoriz bann ki napa!

Premyerman menm si ou'n dir poudir depi le 18 Zanyye paran ti'n devret pare, Minis be ou blye poudir depi Zanyye nou dan *lockdown* lekol i, tou laboutik ti fermen, napa paran ki ti'n pare! Lapey in ganny peye depi le 28 li, e le 15 ou pe dir li son piti i bezwen al lekol, ou konpran sa diskriminasyon e defavorize ki

nou defavoriz bann ki eze ek bann ki napa?

**MR SPEAKER**

Ale ou'n terminen Onorab?  
*Move-on please?*

**HON CHANTAL GHISLAIN**

Mersi Mr Speaker.

**MR SPEAKER**

Mersi. Minis.

**MINISTER JUSTIN VALENTIN**

Mersi Mr Speaker. Mersi Onorab pou ou kestyon. Mon pou reponn ou kestyon sirtou lo *Dedicated Fund*. Eski sa R4.2milyon i pou ase? I a ganny servi, nou pa konn la, i a ganny servi e o firamezir i a servi nou etidye sirkonstans, nou dan en ladministrasyon ki koze e diskite e mwan mon krwar, e mon krwar ki bokou nou bann koleg i krwar ki keksoz i ganny aziste an konsekans.

Dezyenm pwen lo eski lekol ti devret ouver le 15? Mon krwar Mr Speaker senserman sa *text* diskriminasyon i riske pa relevan ek sa konteks. Akoz mon pa krwar dan sa sistem ledikasyon diskriminen. E nou tou nou pe sey nou mye pou sa pa arive ankor nou demann bann lekol pou koz, bann paran pou koz avek lekol. Nou'n kre sa

*channel* pou paran e lekol diskite.

E ankor o firamezir nou a vvar ki arive, me selman mon krwar nou devret ouver lekol, nou devret komanse, nou devret komanse, akoz ou bezwen realize menm an deor i annan en ta paran ki pe kriye zot be ouver lekol, ouver lekol. Kan lekol pou ouver? I annan sa bann tapaz osi.

Alors mwan ek nou lekip nou'n, anfen nou'n kalkile, nou'n kalkile e nou anti poudir la i apropriye e nou'n lans en lapel e lekol pe ouver. E ankor, e ankor mwan mon krwar dan sa zafer gete ki arive e aziste an konsekans. Mersi bokou Mr Speaker.

**MR SPEAKER**

Mersi. Onorab, ale fer li vitman me selman sa *pattern klarifikasiyon* pe al tro souvan. Ale Onorab.

**HON CHANTAL GHISLAIN**

Mr Chair eski Minis i kapab lefet ki in dir poudir i annan sa dyalog, kan ki bann paran ti ganny sa dyalog avek lekol, Minister zafer reouvertir lekol?

*And lefe i reste ki zot in ganny zis 5 zour notis pou lekol ouver, and apre ki kantite letan i pou pran pou en paran letan in fer en laplikasyon avek lekol*

pou *Dedicated Fund* pou li ganny sa pti morso *breakfast* ek sa pti bout *uniform* la, avan ler i sorti kot lekol i al kot sosyal apre i retournen.

Akoz lontan mon krwar ou konn byen Minis ou ti deza koman enn bann dimoun ki ti lo *Parents Council* kot lekol, ou konn byen ki mannyer sa bann zafer ti marse, ler i ti kot lekol sa bann zafer ti marse byen li. Eski ti annan labi ladan?

Mon pa tro krwar, zot ti a bezwen dir poudir ti annan. Sanmenm sa ki mon pe sey dir poudir sa bout la konbyen letan zot pou pran zot pe met *layers and layers, and* sa paran i napa. Larealite avek sa ki zot krwar i ete i pa parey silvouple. Mersi. Annan en pti pe konpasyon pou lezot. Mersi.

### **MR SPEAKER**

Mersi. Minis.

### **MINISTER JUSTIN VALENTIN**

Mersi Mr Speaker. Mersi Onorab. Mon'n dir si paran i annan apre ki nou'n fer sa lanons yer si paran i annan problemm zot konnen kot pou koze, zot annan zot lekol kot zot zanfan i ale.

E byensir ziska la apre midi la napa okenn lekol ki pe rapport i annan okenn *issues* lo sa ki konsern reouvertir lekol.

Ziska la nou pa ankor ganny okenn bann konplent mazer. Mersi.

### **MR SPEAKER**

Mersi Minis. Nou ava kontinyen. Onorab Bastienne.

### **HON DESHEILA BASTIENNE**

Mersi Mr Chair. Bonn apre midi Mr Chair bonn apre midi Minis ek ou *panel* ankor enn fwa. Mr Chair anba ‘*major achievements*’ dernyen *bullet point* i site kot Minister Ledikasyon in *rehabilitate e amelyor school infrastructure* pou *safety* ek *quality teaching and learning*.

Parkont lekol segonder Perseverance li i ankor pe pas atraver serten problemm, ziska eski dan sa Bidze i annan okenn alokasyon spesifik pou amelyor laplenn kot zanfan, kot etidyan i kapab fer zot *PE lesson* vi ki ziska la ozordi zot ankor pe fer *PE* lo en *tarmac, so?*

E osi ki plan sa Minister Ledikasyon an relasyon avek sa Bidze pou asire ki sa lezot fasilite neseser i ganny met an plas kot lekol segonder, primer i ganny, eskize i ganny met an plas kot lekol segonder menm tel ki i annan mankman *air condition* dan *staffroom* e kot zot santi zot enkonfortab e napa osi en *hall* apropriye pou fer miting.

Mon lot pwen i pou lekol primer e sa Minis in tous lo la konsernan *URS* kot i konnen ki poudir ti annan enn de bann dimoun anba programm *URS* kot lekol primer, mon espere dan sa group ki pou reste lekol primer i ava sanse pou ganny enn de sa bann dimoun akoz zot bezwen.

Apre mon lot kestyon anba programm 2, anba '*education development bullet point* 3, elabor lo programm *TVET for further promotion and development of TVET at all levels*.

Mon ti a kontan demann Minis si sa programm pou enkli lekol primer? E apre Minis, apre kot lekol zot en pti pe konsernen mon'n ganny en pti *text* en *Headteacher* en pti pe konsernen konsernan bann lekipman ki sipoze sorti kot Minister Lasante, pou donn bann lekol pou zot prepar zot pou Lendi.

Alor mon pe gete i Minister Ledikasyon osi pe siport bann lekol pe fer bann *intense follow-up* be Minister Lasante pour ki sa bann lekipman i arive pou zot met annord pou zot kapab resevwar zanfan Lendi. Mersi.

### **MR SPEAKER**

Mersi Onorab. Minis.

### **MINISTER JUSTIN VALENTIN**

Mersi Mr Chair. Mersi Onorab pou ou kestyon. Ou bann kestyon *PS* in sinal mwan ki, *PS Decomarmond* in sinal mwan ki i kapab reponn sa bann kestyon. Mersi.

### **MR SPEAKER**

Wi, *PS*.

### **PS ODILE DECOMARMOND**

Mersi Mr Chair. Onorab mersi pou ou kestyon. Pour lekol Perseverance Segonder wi ti annan serten bann pti louvraz ki pa ti ankor fini fer. E sa i ankor pe ganny kouver kantmenm ou pa pe vwar sa larzan i *feature* la, son Bidze ti ankor avek *MHILT* akoz sa proze ti en proze *BADEA*.

E lo kote savedir ti annan ban laranzman avek kontrakter pou sa bann pti louvraz ki ou pe fer referans avek.

Lo kote laplenn parkont i annan sa laplenn ki an negosyasyon avek *Cricket Committee*, i annan en lagreman ki ti'n ganny sinyen ant *cricket* ek Minister Ledikasyon. Kot in donn permisyon e aktyelman la a ler aktyel *well* vakans ziska dernyen term lekol Perseverance ti pe servi sa laplenn pou fer zot ledikasyon fizik.

Kekfwa i annan serten group ki ankor al laba e selman nou ti pe servi la. Provizyon pe ganny fer dan Bidze, me selman sa lannen i pa'n posib i pa pou kapab donn zot *multipurpose court* deryer laba kot sa *tuck-shop* i ete. Me sa nou ava met li preznan, nou pou bezwen anvoy li ziska ler en lot Bidze kantmenm lannen prosenn oubyen dezyenm lanmwatye.

Kot i konsern *aircon* i annan en pti provizyon ki nou pe fer me selman i pa neseserman i pou ganny tou sa ki i bezwen akoz sa nou pou bezwen prioritiz, partaze ant bann lekol kot i annan bann nesesite.

*Hall* pou miting ti pou annan son *hall* pou miting si i ti napa sa bann gran group manrmay ki'n sorti kot lekol Belonie pou vin laba ki'n fer li servi tou bann lezot lasal. Me sa i ava a ler aktyel zot pa pe fer bann gran, gran *miting*, so nou ekspekte ki o firanmezir nou a kapab fer sa provizyon pou son *hall* pou son miting.

Ou'n koz lo *TVET*. Parey ou konnen larzan ki nou'n mete dan *TVET* i fer osi provizyon pou sa bann zanfan segonder, lo segonder s4 avek S5 ki zot, zot annan bann plasman dan lendistri, S4 i annan li 3 zour da lendistri, S5 i annan li 2 zour

dan lendistri e 3 zour dan lendistri e 2 zour kot lekol.

E sa larzan in ganny fer pou pey zot, zot lasirans letan zot dan lendistri pou pey osi tou bann lezot kou ki vin avek.

Kot i konsern primer zot swiv zot *curriculum technology and enterprise*. Savedir son teknik, son *curriculum teknikal* zot swiv depi dan primer savedir i annan provizyon e tou lekol i ekipe avek en lasal pou fer en *workshop* pou fer zot *technical education*, e zot annan bann ansennyen ki pe fer sa bann size avek sa bann zanfan primer.

Lekipman kot lasante i annan serten lekipman ki nou menm nou, nou pe fer provizyon par egzanp kot i konsern termomet pou re louvertir lekol e sa nou ekspekte don lekol demen.

Kot i konsern lasante nou pe esper zis *PPEs* bann *protective gears* pou nou kapab donn lekol e sa nou annan nou *health officer* ki pe pran kontak ek lasante pe fer sa bann swivi. Mersi bokou.

### **MR SPEAKER**

Mersi. Nou a pran Onorab Michel Roucou.

### **HON MICHEL ROUCOU**

Mersi Mr Chair. Bonn apre midi ankor, bonn apre midi tou bann zabitan Mont Fleuri ki pe regard nou. Minis *welcome* avek ou 2 PS.

Minis avan mon demann kestyon mon oule zis donn mon sipor nou de *Headteacher* primer avek segonder sirtou nou *Head Teacher* Primer *welcome* kontinyen sa bon travay ki zot pe fer.

Mon annan 3 kestyon, mon kestyon i al en pti pe lo kote *maintenance*, vi ki dan lepase nou'n war poudir in annan bokou en pti pe neglizans sirtou lo kote primer.

Kot ou war poudir parey dan kot lakres ler en *toilet* i kase, i tarde pou ganny repare. Parey nou konnen se ki sa bann manrmay zot pti, pti e kot sa ki kapab met zot a risk tou. Pour vi ki la nou pe dil ek sa sityasyon *COVID*.

Mon pe demande ki nou pe fer ki sa bann sityasyon koumsa i ganny dil avek vitman? E mon dezyenm kestyon i lo kote *petty cash* avek *stationary*. Pour vi ki dan lepase nou'n war se ki *stationary* dan bann lekol tanzantan i manke kot bann *teacher* i bezwen al atraver bann paran pou demann en *sponsor* pou zot kapab rod bann tel dokiman parey papye.

E lo kote *petty cash* osi tou sa osi mon'n aprann ki bann lekol i ganny sitan pti git ki sa pa al plis ki en semenn.

Mon trwazyenm kestyon, pour vi ki bann ansyen *teacher* pe ganny demande pou retourn pou zwenn ledikasyon ankor, eski Minister in zwenn ek sa bann *teacher* pou zot ganny en pti pe plis leksplikasyon ki zot pe vin *teach*, ki lekol zot pe ale ek bann lezot keksoz ki zot ti a voudre konnen? Mersi.

### **MR SPEAKER**

Mersi. *Panel*.

### **MINISTER JUSTIN VALENTIN**

Mersi Mr Chair. Mersi Onorab. Onorab ou dernyen kestyon nou pa'n konpran li tre byen. Si ou ti pou kapab repet sa dernyen kestyon silvouple?

### **MR SPEAKER**

Si mon kapab repeete pou ou, pou fer pli vit. *Retired teachers* si ou'n annan diskisyon avek ot pou gete ki zot pou fer? Korek Onorab? Yes.

### **HON MICHEL ROUCOU**

Wi bann ansyen *teacher* ki pe ganny demande pou zot retournen, retourn dan ledikasyon. Eski Minister in zwenn zot pou dir zot en pti pe ki lekol ki zot pe ale ki zot pe al

fer e lekel bann lezot keksoz ankor ki annan pou fer ek *teacher?* Mersi.

**MR SPEAKER**

Mersi Onorab. Wi PS Decomarmond.

**PS ODILE DECOMARMOND**

Mersi Mr Chair. Mersi Onorab mon pou pran ou kestyon lo *maintenance* apre lo sa bann *teachers* ki ou pe koz lo la.

Pou *maintenance* nou ti annan parey ou konnen kot lekol Mont Fleuri sa, en *maintenance contractor*, kot letan ti annan en keksoz ki ti kase i ti ganny demande pou li fer sa travay.

Me selman nou ti pe vwar ki nou ti pe refer menm louvraz tou letan. Dan sa ka preznan nou bezwen arete sa kontrakter e letan i ariv en keksoz nou, nou'n bezwen pran li an men.

Nou'n seye met lorganizasyon otan ki nou kapab ki nou'n met en *project officer* atase avek en group lekol en fason ki letan i annan en keksoz ki arive sa lekol li i konnen lekel son *project officer* ki atase avek li e i sipoze i zis *call* sa *project officer* pou zot vin regarde pou fer sa travay.

Parkont si i annan en pti pti louvraz ki lekol li, akoz lekol li i annan en Bidze *maintenance*

li osi, si i annan en pti, pti louvraz ki lekol i kapab antretenir zot menm zot, zot annan zot, zot bann pti lalis bann pti kontrakter ki zot kapab kontakte a otan ki si i ariv plis ki R20mil zot konnen zot bezwen fer en prosedir *procurement*. Me selman zot osi zot kapab fer provizyon pou sa bann pti louvraz.

Kot i konsern *teachers*, ordinerman si en *teacher in retire*, apre i anvi retournen letan i retournen i annan 2 fason pou li retournen i annan 3 fason *actually*.

Swa i vin koman en *part timer*, swa i vin koman sa ki nou apel en *relief teacher*, oubyen i ganny demande pou li re anploye si i krwar i ankor kapab donn son servis ankor.

E dan tou le twa ka nou *interview* sa bann dimoun, ankor e nou met li lo rikord e nou dir li ki lekol i pe ale. So prosedir i ganny fer dapre nou PSO. Mersi.

**MR SPEAKER**

Wi.

**FINANCIAL ACCOUNTANT**  
**LINDA BARALLON**

Mersi Mr Chair. Onorab mon pou reponn ou, ou kestyon *with regards to petty cash* avek *stationary* ok? *Petty cash* dan

lekol i ganny donnen, i annan en limit *petty cash* e *petty cash* i ganny donnen pou aste bann keksoz *emergency* ki lekol pa kapab angaz li dan son fason pou li aste anba rekizisyon ok?

I zis pou bann pti depans. Ou pa pran *petty cash* pou ou aste nenport kwa i zis *emergencies*. E i annan en limit lo *petty cash*, akoz dan lepase i annan bann, en kantite *petty cash* in perdi dan lekol. Vol in pase en kantite konsernan *petty cash* i konsernen.

E si sa lekol li i santi ki i krwar sa *petty cash* pa ase i fer laplikasyon avek *Chief Accountant Trezor*. E si i krwar i zistifye zon lagreman i ganny aprouve. Me selman trezor osi nou pe dekouraz annan kantite *petty cash* kot lekol pou sa rezon spesifik ki nou'n ganny dir.

Nou konsider plis *petty cash* pou Praslin La Digue en pti pe akoz zot zistans avek Mahe pou zot *travel* pou bann vizit ouswa miting ki zot vin fer zot bezwen pey bato e sa nou konsider *increase* zot *petty cash* en pti gin.

*With regards to stationary* lekol i aste sa *stationary* an servan son Bidze ki li i annan e osi i servi *central store* kot i aste *stationary in bulk* ok? Lekol i

servi rekizisyon pou li *request stationary from central store*.

E nou ankouraz lekol *as much as possible* pou servi *stationary from central store* be zot *stationary* ki kot *central store* dapre zot i pa lo zot nivo ki zot ti anvi lo kote *quality*.

Lo kote ledikasyon *central store* i fer li son devwar pou al verifye lo *market* e rod pli *best quality* ki i kapab pou satisfer demann lekol. Mersi.

### **MR SPEAKER**

Mersi. Onorab Aglae.

### **HON EGBERT AGLAE**

Mersi Mr Chair. Bonn apre midi Minis, *PS* ek delegasyon. Minis mon premye kestyon i annan konsern la akoz dapre lanons ki zot ti fer dan zot kominike pou napa servis *childminding*. E paran pe demande sirtou ban ki fini travay en pe tar ki petet laranzman pou zot zanfan? Sa i enn, akoz zot annan konsern lo la.

Eski zot in antre an diskisyon avek Gouvernman sirtou bann pou annan bann *flexible working hours* petet ki ava donn sans bann paran pou al kolekte zot bann zanfan boner?

Dezyenm, Minis Finans dan son adres, ti fer mansyon R20milyon pe ganny mete dan

Bidze pou aste sirtou parey latab ek sez, mon ti a kontan petet Minis ki pozisyon lekol ki konsern sa bann *furnitures* latab ek sez, eski i annan en nesesite la ki al envestir sa kantite larzan kan i annan lezot problemm ki bezwen larzan en pti pe pli irzans pou dil avek?

Trwazyenm 8.5milyon, 8.1milyon pe ganny mete dan reparasyon zot *Headquarters* Ledikasyon eski i annan lirzans pou fer sa kalite depans an se moman la an giz sityasyon?

E dernyen Minis i annan 4konsern baze lo sa ki prezidan ti dir osi kot zot pe ankouraz bann etidyan sirtou lo nivo liniversite pou pran en karyer dan ledikasyon.

Eski zot pou osi zot pe pran kont pou kapab annan sa balans ant bann *teachers* ki deza pe esper pou al fer en degre osi bann ki annan *diploma* konn sa nivo Degre. EsKi zot plan i osi pi konsider da bann *teachers* akoz zot enkyet ki sa bann ki pou vin nouvo pou pran sa bann loportinite ki zot, zot pe espere en pe letan? Mersi.

### **MR SPEAKER**

Mersi. Minis wi.

### **MINISTER JUSTIN VALENTIN**

Mersi Mr Chair. Mersi Onorab pou ou kestyon. Mr Chair mon krwar lo komansman letan mon ti pe fer mon lentrodiksyon, mon ti pe koz bann, nou ti pe koz lo lotonomi e nou ti dir ki lotonomi i en prosesis.

E i kler ki an mezir bann dimoun i reste nou bann diferan lanons i montre ou poudir i annan sa prosesis pou pran en pe letan, e i neseser osi bokou, bokou ledikasyon pou ed dimoun fer sa tranzisyon.

Par egzanp lo servis *childminding*, e en lanons ki ti ganny fer osi yer sete dir avek bann paran, anfen dir ek bann lekol koz avek zot paran, bann paran ki annan problemm koz avek zot lekol.

Zot bezwen fer sa dyalog e kot lekol i annan lafors, i annan paran, i annan ansennyan i kapab konpran e zot kapab etidye sa sirkonstans e rod solisyon kot lekol.

E sa i pou ed en kantite tir sa depandans, lobzektif se tir sa depandans lo *Headquarters*. Akoz nou anvi donn lekol zot lafors ki zot annan. Alors mon osi fer en lapel pou sa lanons yer, bann paran koz avek zot lekol kot zot zanfan i ete.

E bann lekol antre dan diskisyon, rod bann solisyon ki, akoz sak lekol i spesifik, sak lekol i spesifik e zot annan bann

solisyon ki zot kapab fer lo zot nivo. Sa i konsern premye pwen.

E an se ki konsern *flexible hours*, i vre i annan en ta landrwa pe koz lo *flexible hours* a ler aktyel. E sanmenm sa ki nou dir nou pa pou kapab met en Lalwa zeneral, i enportan ki sa dyalog ant paran ki annan sa problemm spesifik i koz ek lekol.

E lekol i antre an konversasyon e ansanm zot rod bann solisyon. Zot pou gannyen bann solisyon me selman fodre zot koz ek kanmarad. Vwala sa mesaz.

Mon ti a kontan petet *PS* akoz i annan bann enteraksyon ki pase i kapab koz lo sa R20milyon pou *furnitures*. E vitman lo sa 8.1milyon ou konnen i annan enn de keksoz ki pe arive kot Minister Ledikasyon par egzanp, i menm annan distrik, pou tir sa bann twatir *asbestos* ki en problemm.

E sa i bezwen ganny fer alors sa travay in komanse, e osi i annan ou konnen lespas kot Minister Ledikasyon.

E mwan koman Minis Ledikasyon mon pou fer li mon devwar osi pou envit bann Onorab pou annan bann vizit; par egzanp bann vizit kot nou osi ki nou a ganny sans konpran osi konteks ki bann dimoun i travay ladan.

So nou annan en *building*, en *still building* ki ti'n deza ganny bidzete, e sa *still building* pou zisteman ede abrit bann zofisyen, parske landrwa in komans sere e avarye, sak *building* i avarye total.

I en total e ki i annan dimoun pe malad, pe malad akoz *fungus* e mon krwar i neseser nou fer, nou osi get lasante bann travayer ammezir nou - menm si nou pe fer ser ten privasyon nou osi get lasante bann travayer.

En lot pwen ki enportan ki ou'n leve se bann etidyan ki pe ganny demande pou antre dan ledikasyon. E osi *versus* bann dimoun ki deza dan ledikasyon pou gete si zot pa pou ganny kit deryer an term *training?* Non. Bann etidyan ki pe ganny demande pou vin dan ledikasyon bann *graduates* nou pa pou kapab zis met zot dan ledikasyon. Mwan koman Minis Ledikasyon mon nepli krwar ki ou pran en group marmay ou larg dan lekol ou dir li dezormen ou en *teacher, teach*.

Se pour sela ki i annan sa formasyon, lenformasyon *PGC* ki i donn ou *the basic post graduate certificate in education*, i fon ou en *basic* pou kapab ganny inisyé avek sa profesyon.

E byensir bann *teachers* ki deza dan sistenm ledikasyon, i annan plan pou zot ganny *training*. Mwan mon en dimoun ki krwar dan *training* en kantite e mon byen sir mon bann koleg osi obor mwan la, nou pou fer nou mye i nou pa kit bann *teachers* deryer.

Annefe mwan, si mon kapab fer en target ki tou *teachers* ki dan sistenm i ganny en *Degree* mon krwar ki sa ti pou en fantastik target. E pour kwa pa nou pou get mwayen e posibilite, e pou gete si lannen prosen ou dizon si lannen an pre nou pa kapab met sa osi koman en target.

Nou krwar dan lansennyman, nou krwar dan ekip *teachers*. Mersi bokou.

### **MR SPEAKER**

Ti annan kestyon ki ti reakte lo *furniture* e mon krwar madanm, wi *PS*.

### **PS ODILE DECOMARMOND**

Mersi Mr Chair. Kot i konsern *furniture* sa larzan ki ou war nou'n gannyen e sa ti baze lo *low consumption analysis*. Letan nou ti fer demann kot pou nou Bidze, nou ti servi mou *consumption analysis* pou nou kapab demann Bidze pou tou sa bann diferan programm pou

*Petite Enfance* pou primer avek pou segonder.

Me selman la avek nou sirkonstans, nou pe re prioritiz nou bezwen, e sa osi nou pe fer en travay osi anba sa ki petet ou'n trouve dan nou Bidze sa ki nou apel *line of credit* ki nou pe gannyen avek *L'Inde*. E nou pe fer provizyon.

Savedir sa larzan nou pou servi zis priyorte pou bann vreman bezwen - parey nou konnen kot serten lekol kot *furniture* in vreman avarye ki ou bezwen ranplase.

Sa nou pou bezwen rode e larestan larzan nou pou regarde ki mannyer nou kapab servi li sirtou si nou bezwen pou renovasyon lekol.

### **MR SPEAKER**

Mersi. Onorab Aglae, ki pwen ki pa'n reponn?

### **HON EGBERT AGLAE**

Mr. En klarifikasiyon lo sa size *childminding* ki Minis in fer sorti. Akoz i enportan Mr Speaker sa akoz paran i konsernen. Ok. Petet Minis mon konpran ou byen ou'n met bann largiman ki ou'n donn lotonomi lekol pou zot pran desizyon. Me par egzanp *PTA* pa ankor zwenn avek ni *Headteachers* avek sa bann

sanzman ki'n arive nouveau *Headteachers*.

So sa dyalog ki ou pe mete ki paran i bezwen fer la. sa *body* li menm li i pou napa i pou napa en gran *say ladan*. Akoz petet pa ti pran ou a dir *ok*, nou pou *fase out* dan 1 mwan ouswa nou pou fer serten reazisteman la direksyon ki nou anvi ale avek size *childminding* ankor dan en mwan. Ki donn letan pou annan sa bann dyalog ki ou, ou pe sizere.

Akoz si *by Lendi la*, pou napa gran dyalog ki pou ganny arive la pou serten group ki pe antre. So petet serten konsiderasyon *along that line* i devret ganny fer. Mersi.

### **MR SPEAKER**

*Ok mersi. Panel wi. Minis wi.*

### **MINISTER JUSTIN VALENTIN**

Mersi Mr Chair. Mersi Onorab pou pou sa largiman. Petet kot sa lekol ki ou konnen. Bann PTAs pa ankor zwenn petet. Me i annan lezot lekol ankor ki possibleman zot in zwenn. I annan ki mon konnen in zwenn. I annan ki mon konnen pe zwenn. Pou dir avek en lekol en telefonn, mon napa en fason kit mon zanfan, ki bann solisyon mon krwar i pa bezwen *meeting* sa. Sa i kapab ganny fer en kout telefonn. Sa

konversasyon ki nou pe dir i pa en konversasyon konplike. I zis apres lekol met ou problem devan. En kout telefonn, en *meeting*. So, mon krwar i annan keksoz ki pe fer, me petet nou pa okouran ki pe ganny fer.

Mwan mon krwar paran pe koze avek lekol, e lekol pe koze avek paran. Mersi bokou Minis.

### **MR SPEAKER**

Mersi Minis. nou a *move on*. Onorab Bistoquet.

### **HON ROSIE BISTOQUET**

Mersi Mr Chair. Bonn apre midi Mr Chair. Bonn apre midi Minis ek ou delegasyon. Annefe Minis pou mwan reasir ou. En kantite paran pe *text* zot e kontan zot zanfan pe retour lekol. E akoz zot ti'n dir zot ti'n ganny en pe fatige. Sirtou sa *online* travay ki zot bezwen fer dan lakour.

Sel keksoz ki zot pe dir se fer sir ki *guideline COVID* i ganny byen mentenir kot lekol, pou fer sir ki zot zanfan pa ganny sa lenfeksyon.

Mwan mon kestyon Mr Speaker, mon pou tourn en pti pe kot *Human Resources*. Minis konbyen *teachers* ou annan dan lekol, dan tou lekol? Konbyen ladan ki Seselwa? Konbyen ki etranze?

Konbyen ler mon pe get depans ki ou pou fer sa lannen avek *housing*, i aepre 1.2 milyon. Mon pe gete ladan sirtou pou *expat*, konbyen zot pe depanse avek *expatriates*? Seselwa sirtou kot i konsern *teaching*?

Mon lot kestyon i konsern *professional centers*. Sirtou letan mon'n tann Onorab Adelaide in koz lo *MOUs* avek bann *professional centers* sirtou kot Lagrikiltir. Mon krwar mon'n deza koz lo sa kestyon Minis. Mon konpran zot pe ganny serten difikilte avek sa bann kalite sant. Sirtou lagrikiltir la mon'n tandé.

Mon okouran poudir i annan 2 *professional centers* sirtou NIHSS avek SHTA ki'n *move out*. Eski ou krwar Minis dan le fitir pou tir en pe sa ankonbreman lo Minister Ledikasyon pou li kapab konsantre pli ou mwen dan ledikasyon avanse pou nou bann zanfan? Eski ou krwar bann *professional centers* i kapab antre anba zot *parent Ministry* pou kapab ed en pti pe?

Apre Onorab Romain in koz lo manze lekol. I annan sa *Policy* manz manze lekol ki ti met an mars ansanm avek Lasante mon konnen aepre 1an 2an pase. Ki pe arive avek

sa Polisi? Vi ki i annan en antite zanfan ladan pa ti pe manz kot lekol? Mersi Mr Speaker.

### **MR SPEAKER**

Mersi. Panel. Wi Minis.

### **MINISTER JUSTIN VALENTIN**

Mersi Mr Chair. Mersi Onorab pou ou kestyon. Onorab pou mwan petet mon krwar lobzektif ou kestyon kot i konsern kantite *teachers expat* e avek Seselwa. Pou mwan relye sa direkteman avek Bidze, mon pou dir ou ki 7poursan nou Bidze i ganny *allocate* avek saler bann *expat*. Saler bann *expat*.

Nou rekonnet ki *expat*, *expatriate teachers* i met bokou, bokou presyon lo sistèm akoz ou bezwen, pou li dabor ou bezwen donn li son saler. I annan serten *allowance* ki zot gannyen. E osi zot ganny lakaz. E nou, nou pe lwe aepre 300. 350 lakaz e ki sa osi i pran aepre 4poursan nou Bidze. I bokou, i bokou. Nou rekonnet sa.

E nou sanmenm sa nou pe dir nou bezwen ankouraz bann Seselwa. E mon dir osi bann etidyan ki doue akademikman, e osi ki annan bann lafors, ki pa neseserman akademik, ki kapab zwenn bann sant profesyonnel pou zot kapab

zwenn lansennyman dan en serten sans.

E mon ti a kontan depi lakres ziska dizon S4, menm bann ansenyan. Ou konnen dan tou nivo. Bann etidyan ki kontan lekol, ki ti kontan lekol. E ki akademikman zot solid, pou zot zwenn sa profesyon. E mon pou fer bokou, bokou, bokou kanpanny pou mwan kapab reisi sa misyon. Akoz nou bezwen etidyan ki vin ansenyan dan sistem Sesel.

Sa diskisyon sant profesyon, sant profesyonnel anba *parent Ministers* i en diskisyon ki annan bokou. Sakenn i annan bokou lopinyon. Sakenn i annan bokou lopinyon, i depan dan ki fason ou pe get sa. Wi dan en kote nou ti kapab dir sak sant profesyon i al kot son *parent Minister*. Me si ou pou sa largiman en pti pe pli devan ou gete dizon liniversite ki ou pou fer prezan.

Eski sak *parent Ministers* pou annan en liniversite. Konpran i depan ki mannyer ou anmenn sa largiman. Me pou lemoman i annan serten febles. I annan serten febles ki serten sant profesyon - petet i annan ki pe travay an izolasyon avek lendistri.

E nou, nou devwar - mwan mon devwar koman

nouvo Minis Ledikasyon se anmenn sa dyalog ki fer ki evantyelman bann sant profesyonnel, ki montre bann kou ki relevan. Ki adres konsern lendistri e nou kapab prezan an servan bann sant profesyonnel kapab batir Resours Imen pou Sesel.

Ou trwazyenm kestyon i adres manze lekol. Ankor, nou'n dir pli boner ki, manze lekol nou bezwen, i en pe - Sa konversasyon lo manze lekol, li osi nou bezwen etidye li avek swen. Petet mon pou demann PS pou dir konbyen manze lekol i koute. E petet pou nou kapab konpran sa sityasyon. E apre nou kapab kontiny sa konversasyon. PS.

### **MR SPEAKER**

Wi PS carry on.

### **PS            ODILE            DE COMMANDMOND**

Mersi Mr Chair. Pou bann zanfan primer zot pe pey R5 par zour pou zot manze lekol. E pou bann zanfan segonder zot pe pey R6 par zour pou manze lekol. E bann ansenyan zot, zot pey R15. E si nou elabor lo sa *Policy* ki Onorab pe koze. *Minister* nou'n deza ganny en *meeting* avek Lasante pou reget *Policy* 2008.

E i annan en Komite la ki pe travay lo la, e byento zot ava, nou kapab prezant li avek sa 2 Minister, pou nou kapab vin lo en lagreman pou nou kapab enplimant sa novo *Policy* lo nitrisyon pou lekol. Mersi.

### **MR SPEAKER**

Mersi. Onorab wi ki pwen.

### **HON ROSIE BISTOQUET**

Mersi Mr Chair. An repons sa ki mon'n gannyen la pou apre midi konsernan manze. Konbyen *teachers* ki pe manz lekol, konbyen zanfan ki pe manz lekol? Non, akoz mon pe get depans. Depans mon konpran poudir dapre *Auditors Report* i annan en kantite gaspiyaz ki pe arive. Bann zanfan pa pe manz lekol, menm Praslin, La Digue osi i annan en problem. Sa ki mon pe demande.

Apre Minis ou ti reponn mon konsernan, ou pe fer tou sa ki ou kapab pou fer bann zanfan, bann etidyan pou antre, pran sa profesyon, swa sa karyer *teaching*. Selman an menm tan ler ou'n koze pli boner, ti annan en group ki anba *URS* ki ti annan 224. Ladan zis 63 ki'n ganny abzorb par Minister Ledikasyon.

E dan sa group mon pa konnen ki zot ti apel zot lekor

swa Minister Ledikasyon ti apel zot *assistant teacher*. I annan ki mon konnen ki'n *apply* ki'n gannyen. I annan ki zot annan serten febles lo serten size, be sa bann dimoun in ganny dir zot pa pe kapab *apply* pou naryen. Alor zot pe fer en lot debrouy, an atandan zot pe esey fer fason pou zot *upgrade*.

So si i annan en lankourazman konsernan sa bann ki ti deza la ki ti apel zot lekor *assistant teacher*. Mersi Minis.

### **MR SPEAKER**

Ale terminen. Mersi. *Panel*. Wi madanm.

### **FINANCIAL CONTROLLER LINDA MONTHY**

Mersi Onorab pou kestyon. Lo *school meal*, i annan 7,696 etidyan ki pran *school meal*. E 57 *teachers*.

### **MR SPEAKER**

Mersi. I annan lot pwen, ou pou adrese pwen lo *URS teachers* ki pe ganny anploye? Ou'n deza adres sa selman mon pa konnen si ou kapab klarifye vitman pou Onorab.

### **MINISTER JUSTIN VALENTIN**

Mersi Mr Chair. Vitman parey nou ti dir taler. I annan 63 *teachers*. E 63 partisipan *URS*

ki pe ganny abzorb. E an plis ki sa, pou bann ki'n demontre potansyel pou zot vin en *teachers* pou zot ganny *train*. I annan 17. I annan 17, ladan i annan ki pe vin *teachers* dan *mainstream*. I annan ki pe vin *day care assistant*.

E i osi annan 13 ladan ki pe eksprimen e zot kalifye pou zot vin bann *teacher assistant*. Mersi.

### **MR SPEAKER**

Mersi. Onorab Naidu.

### **HON SATHYA NAIDU**

Mersi Mr Chair. Bonn apre midi Minis avek ou delegasyon. Mr Chair mon ti oule konnen eski, Minis plito. Kan eski konstriksyon an se ki konsern Lekol Belonie Segonder pou konplet? E menm kestyon i aplik vizavi Lekol La Rosière.

Lo size *teachers training*. Mon swe se ki i annan en konponan *child phycology*. Akoz i annan en bon pe etidyan ki annan bann problem. Bann *learning disorders* tel ki *ADHD, Dyslexia and it goes unnoticed*.

Lo kote revi an sa ki konsern *curriculum*, kan eski dernyen fwa in annan en revi mazer? Lo kote bann size zot in dir ki zot anvizaze met lanfaz lo *numeracy and literacy*. Mon swe se ki *Social Studies* i osi ganny

sa lenportans ki i merit gannyen. Espesyalman mon rapel ki Minis Hassan dan son larepons pou Bidze ti'n dir, ki i devret annan en transformasyon mazer an sa ki konsern *mindset*.

E mon krwar ki *Social Studies* i kapab vin en size ekstrememan kle, pou adres konportman bann zanfan. E mon oule konnen kwa ki zot pou fer vizavi sa size an partikilye? Mersi.

### **MR SPEAKER**

Mersi. Panel. Wi Minis.

### **MINISTER JUSTIN VALENTIN**

Mersi Mr Chair. Mersi Onorab pou kestyon. Mon pou pran direkteman lo *training* e *curriculum*, e mon ti a kontan si PS ti a reponn lo konstriksyon Lekol Belonie e Lekol La Rosière.

Onorab mon kontan ou pe anmenn ou konsern vizavi sa ki pe pase kot lekol. An term formasyon bann ansenyan. Wi, *Educational Studies* i en konponan ki deza la dan formasyon, bann ansenyan. Byensir i annan ankor bann lezot, o fir an mezir sosyete i devlope i annan bann lezot bann diferan kalite. Konnen bann diferan kalite tenm ki nou

pou bezwen osi anmennen dan formasyon bann ansenyan.

E sa bann keksoz ki ou pe zisteman i annan bann *workshop* ki ganny aranze. Me byensir i bezwen annan bann konsolidasyon osi. I bezwen annan bann konsolidasyon, e mon krwar nou pou al dan sa laliny.

*Curriculum* ki dernyen fwa in *review*? Mon pa pou kapab reponn sa kestyon. *PS* pou kapab reponn akoz mon pa'n neseserman avek Ledikasyon pou konn sa. Me selman sa ki mwan mon pe dir an term nouveau programm ledikasyon kot nou pe ale. Kot nou pe ale *curriculum* i bezwen osi enn sa bann keksoz ki ganny revwar.

En *curriculum* ki met etidyan dan sa 21enm syek ki nou ladan. Ou konpran mwan? Nou bezwen enn sa *curriculum*. En *curriculum* ki relevan, en *curriculum* ki *make sense* pou bann etidyan sa zenerasyon. Mon krwar ladan. *PS* mon ti a kontan.

### **MR SPEAKER**

*PS please.*

**PS** **ODILE**  
**DECOMMARDMOND**  
Mersi Mr Chair. Mersi *Minister*. Onorab pou kote Lekol Belonie nou sipoze fini sa nouveau blok

lafen sa lannen. Sa i dapre nou Bidze ki nou'n gannyen. Me parkont si i annan sanzman dan kou, la i riske met nou en pti pe retar. Me selman an prensip nou sipoze sa nouveau blok.

Kot i konsern lekol La Rosière, parey nou'n deza eksplike a plizyer repriz, nou'n ganny retar akoz letan in fer sa *tender* nou annan kontrakter *Kuwait* osi ki pa'n kapab voyaz pou vin isi. Sa ki'n met nou retar. Savedir si tou keksoz i ok la. Ki zot kapab voyaz e pou vini. Bann prosedir *tender* i ava fini fer. Bann *bid* i ava fini antre e petet trwazyenm kar sa lannen *building* i ava kapab konmanse pou La Rosière. Mersi.

### **MR SPEAKER**

Onorab Uranie.

### **HON ROCKY URANIE**

Mersi Mr Chairman. Bonzour Minis. Bonzour *PS* ek ou delegasyon. Bonzour tou bann ansenyan, etidyan ki pe fer zefor spesyal dan sa moman difisil pou zot sey *cope* avek sa nouveau normal. E bann zofisyen Minister Ledikasyon ki pe travay tre dir anba plizyer lannen pou kit sa Minister lo en serten standard.

Minis, mon kestyon i ki mannyer renovasyon pe ale lo Lekol La Digue? E dan Bidze avan ti deza annan en bout larzan ki ti'n mete pou premye faz konstriksyon nouvo lekol La Digue. Ki zistans sa i ete?

Apre mon dakor ek Minis ler i dir fodre nou bouz, nou servi teknolozi. E la mon vin lo kestyon relasyon avek *Computer Room*. Ki dernyen fwa zot ti sanz sa bann *computers* dan *Computer Room*, sirtou La Digue? E konbyen zot peye pou ganny bann *license software* ki kapab ganny servi dan sa bann *Computer Room*?

E apre i annan en ansenyan i anvoy mwan en *text* la, i dir mwan li plis ki 10an i dan ledikasyon. I pe fer bokou *training* “*Petite Enfance*” ti me zot pa ganny gete pou al *training* pli lwen? Sa zis an pasan pou gete ki kapab fer pou zot. Mersi Mr Chair.

### **MR SPEAKER**

Mersi. *Panel Wi PS De Commarmond.*

### **PS ODILE DECOMMARDMOND**

Mersi Mr Chair. Mersi Onorab pou ou kestyon. Pou konstriksyon lekol La Digue, parey nou'n deza eksplike oparavan. Lekol La Digue son

rekonstriksyon pe ganny fer lo menm sit. E vre ti annan larzan ki ti'n ganny mete dan Bidze, me selman sa larzan lefe ki nou pa'n kapab met li dan Bidze sa lannen. Initil nou ti pou komanse ki nou pa ti pou kapab fini li.

Nou ti pou komanse nou ti pou aret dan semen. Dan sa ka, nou'n pran, nou'n fini fer tou le neseser. Plan in aprouve tou keksoz, me selman la nou pe zis esper finansman pou nou kommans rekonstriksyon.

Parkont an atandan ki nou'n fer, nou'n fer renovasyon. Avan sa nou ti'n fer renovasyon lo kote segonder. La nou pe fer renovasyon lo kote primer avek lakres. Pou nou fer sir ki latmosfer i konvenab pou bann zanfan kapab etidye. E nou pe fer osi provizyon pou en pe *furniture* pou zot lakres avek primer sirtou. Pou nou kapab aranz zot lanvironnman lekol.

Kot i konsern *Computer Room* nou ti ranplas *computer* 2016. Sa ti annan 20 *computer*, e nou ti donn osi en *set laptop* pou lekol. Nou konnen poudir nou'n deza vizite *Computer Room*, nou'n deza idantifye bann difikilte. E nou espekte ki depi ler nou'n vizite, nou espekte ki keksoz in aranze akoz ti zis annan seren koneksyon problem pou

*internet.* Me zot *computer* ti pe marse.

Lo kote *training*. *Training* pou bann *Primary*, avek *Early Childhood*. Sa nou ti'n deza, i dan plan. I dan plan, e nou pe, lefe ki nou'n ganny retar an vi bann pri. La nou pe travay avek Liniversite pou kapab fini finaliz zot *B.Ed.* pou *Primary* avek *Early Childhood*. Ki i tou keksoz i mars byen depandan lo Bidze nou kapab komans avek premye group petet ver lafen sa lannen. Oubyen boner lannen prosenn. Mersi.

### **MR SPEAKER**

Ti annan en lot pwen Onorab Uranie?

### **HON ROCKY URANIE**

Lo kote *license software* ki zot servi dan sa bann *Computer Room*?

### **MR SPEAKER**

Wi Minis *carry-on*.

### **MINISTER JUSTIN VALENTIN**

Mersi Mr Chair. Mersi Onorab. Pou annefe *license* pou *Microsoft* ki nou peye. Nou pey R1.3milyon par an. Epi osi nou'n entrodwir en programm pou devlop laprantisaz langaz Angle. E nou pey en *licence* pou tou zanfan primer. Nou pe pey

en *licence* environ R2milyon par lannen. Mersi.

### **MR SPEAKER**

Mersi. Ou'n fini? Ok. Nou pou pran en poz la, e nou a repran 4 er. Mersi.

**(BREAK)**

### **MR SPEAKER**

Mon ava apel Onorab Phillip Arissol.

### **HON PHILLIP ARISSOL**

Mersi Mr Chair. Bonn apre midi tou dimoun. Eski *panel* i kapab dir Lasanble si zot satisfe avek performans bann *expatriate teachers* dan pei? Eski zot fer okenn evalyasyon pou *monitor* zot travay an zeneral? Epi eski Lasanble i, eski *panel* i kapab dir Lasanble si i annan bann novo Lagreman ki'n sinyen, ou ki pou ganny sinyen ek bann *internet providers*, pou bes en pe kou sa servis kot bann lekol?

Apre Minis mon ti a kontan konnen si i annan *vacancies* pou ansenyan an se moman? Vi ki i annan bann zenn ki'n termin zot letid e in fer laplikasyon an partikilye enn, ki'n terminen ek en Diploma dan Lar. In fer son laplikasyon e in ganny dir ki napa *vacancy* la an se moman.

Mon dernyen Minis, mon war dan *breakdown* pou formal *Early Childhood Care and Education*, konpilsyon renovasyon lo Lakres Anse Louis an 2020. Eski Minister i annan plan pou met en pe zouzou dan *playground* kot sa lakres? Mersi

### **MR SPEAKER**

Mersi Onorab. *Panel.* Wi Minis.

### **MINISTER JUSTIN VALENTIN**

Mersi Mr Chair. Mersi Onorab pou kestyon. Mon pou pran ou premye kestyon ki konsern nou satisfakssyon avek performans bann etranze dan pei. Apre le trwa lezot kestyon i adres direkteman sa ki pase kot lekol. Mon krwar PS i pou dan, PS De Commarmond i pou dan en bon pozisyon pou reponn sa kestyon.

An se ki konsern performans bann etranze dan en lekol, i vre i annan bann etranze ki annan bann defi kiltir, serten baryer langaz, me nou, nou pa neseserman petet satisfe parey nou ti ava anvi. E mwan letan mon'n komanse, mon'n vini, mon'n dir annou gete ki kalite sipor nou pou gete ki kalite sipor nou pou donnen pou nou fer sir ki bann *expatriate*. Bann etranze ki travay avek nou i arriv sa nivo,

petet ler nou dir nivo, zot osi kapab fer fas avek sa transformasyon kiltirel ki zot pe pas ladan.

E enn petet bann pli gran defi se sa transformasyon kiltirel ki zot pe pas ladan. E se pou sa rezon ki nou dir osi bann etidyan fodre nou, zot osi petet zot konpran bann etranze ki pe travay avek nou. Akoz zisteman zot pe fer en gran sakrifis pou sorti dan zot pei pou vin kot nou. Nou bezwen zwenn kanmarad lanmwatye semen pou nou kapab fer sa *journey*, sa vwayaz ansanm pli byen efektiv.

### **MR SPEAKER**

Nou a kontinyen. *PS* De Commarmond. Wi.

### **PS ODILE DECOMMARDMOND**

Mersi Mr Chair. Mersi Onorab pou ou kestyon. Kot i konsern *vacancies*, nou pe, kontrer la nou pe met plis lanfaz lo Seselwa. Akoz nou annan bann *expatriate* ki pe ale, bann ki zot performans pa ti alaoter, oubyen bann ki pa pe renouvre zot Kontra. E nou pe pran bann Seselwa ki nou war i *meet* kriter pou lanplwa.

Kot i konsern *art*, nou napa *vacancy* pou le moman, ni lo nivo primer, ni lo nivo

segonder. Sa nou kapab konfirmen. E kot i konsern Lakres Anse Louis, nou annan, sa lannen nou napa larzan anba nou Bidze, pou nou kapab fini fer Lakres Anse Louis.

I annan ban pti larzan *maintenance* ki nou pou kapab fer serten travay kot lakres Anse Louis. E kot i konsern bann zouzou sa nou fer li ordinerman anba bann *special project*. E sa zot pe, i annan dimoun ki pe komans inisyé pou fer sir i ganny son bann zouzou sa lannen. Mersi.

### **MR SPEAKER**

Mersi. Klarifikasyon. Mersi.

### **HON PHILLIP ARISSOL**

I annan en kestyon zot pa'n reponn. Kot i konsern *internet providers*?

### **MR SPEAKER**

Mersi. *Panel*. Minis. yes wi.

### **PS ODILE DE COMMARDMOND**

Wi, Minister. Mr Chair, pou *internet provider* nou ti annan en Lagreman avek 3 *internet providers*. E sa Lagreman la, nou si poze zwenn avek sa bann *internet providers* pou re negosye sa Lagreman. E la a ler aktyel nou pe revwar kondisyon ki ti annan dan sa bann

Lagreman pou fer sir ki i annan kapasite. E sa ki nou bezwen prezan al refer sa bann negosyasyon avan ler nou renouvle Lagreman. Mersi.

### **MR SPEAKER**

Minis wi.

### **MINISTER JUSTIN VALENTIN**

Mersi Mr Chair. E zis pou anonse ki i annan enn an partikilye en *internet provider* ki pe travay avek nou zisteman avek bann ansenyan, e bann etidyan pou donn nou en *package* sirtou pou *data*. Konmsa nou kapab amelyor laprantisaz an ser van *internet*. Mersi.

### **MR SPEAKER**

Mersi. Onorab John Hoareau.

### **HON JOHN HOAREAU**

Mersi Mr Chair. Mr Chair mon demann ou lendilzans pou mwan kapab demann kestyon ki Onorab Philip Monthy in kit avek mwan? Eski i posib pou mwan demann son kestyon apre mon a demann pou mwan?

### **MR SPEAKER**

Ki kantite ou annan?

### **HON JOHN HOAREAU**

Well i annan 2 kestyon li.

**MR SPEAKER**

I annan 2. Ale demande.

**HON JOHN HOAREAU**

**(question of Philip Monthy)**

Ok mersi. Onorab Monthy ti le konnen vi ki i annan 35 milyon ki'n ganny mete dan Bidze pou *housing rent for teachers*. Eski zot pe mazinen pou envestir dan bann lakaz pou *teachers* parey ti leka dan lepase? Sa i premye.

E son dezyenm kestyon, se ki, ki zistans legzersis pou idantifye bann *teachers* etranze ki pa pe teach, ki pe *teach* bann size paret *ICT* pou zot ranplas zot avek bann *teachers* Seselwa ki kapab *teach* sa bann size? Mersi.

**MR SPEAKER**

Byen Mersi. Minis ou a pran son bann kestyon premye wi.

**MINISTER JUSTIN VALENTIN**

Mersi Mr Chair. Mersi Onorab. Parey nou dir, nou konsernen avek lakantite lakaz ki nou lwe. E taler nou ti dir nou nannan omwen 350 lakaz,330 lakaz ki nou pe lwe, e sa i bokou.

I vre i ti ava nou swe annan nou prop fasilité. Me pou lemoman, sa pa, pou fer nou fasilité i pa ankor antre dan nou konversasyon. Me ki nou pe fer

pou kapab redwir en pe kou. A ler aktyel bann zofisyé ki travay avek bann akomodasyon pe demann parey in ganny anonse lo nivo Nasional, pe demann bann *landlord* pou zot kapab fer desann fer desann en pe zot pri. Sa pe marse dan en bon pe sans.

I annan bann negosyasyon ki pe antre. E nou pe war en pe ekleraz lo sa. Me parey mon'n dir, an se ki konsern fer nou prop batiman, nou pa ankor antre dan sa konversasyon a ler aktyel.

An se ki konsern *ICT*. Ankor sa i zeneral pou ranplas bann etranze dan sistèm. Wi nou lentansyon ranplas bann etranze pou akoz sa rezon kiltirel parey mon ti pe dir pli boner. Nou pa pou kapab fini ranplas tou, akoz dabor nou bezwen donn formasyon, donn formasyon nou bann ansenyan.

E la nou pe dir ki petet bann landrwa kot nou krwar spesifikman i devret sa pou Seselwa. Sa i kapab en travay ki nou ava fer pou nou kapab dir be ok sa bann *particular field*, sa nou pou les pou Seselwa. Alors nou bezwen osi komans mazin formasyon avan nou antre dan sa laliny. E sa i en sizesyon ki nou *tien en kont*. Mersi Mr Chair.

**MR SPEAKER**

Onorab Hoareau wi.

**HON JOHN HOAREAU**

Mon premye kestyon Mr Speaker, se lo size semen pou ganny akse avek Lekol Beau Vallon Primer. Eski sa i ganny *feature* dan okenn proze sa lannen Minister Ledikasyon?

Dezyenmman, mon ti a kontan konnen si bann *professional center* si zot tou zot in ganny *full accreditation*? E si nou, akoz? E lekel bann ki pa ankor gannyen?

Trwazyenmman, Mr Speaker, mon le sitye sa kestyon en pti pe. Nou pe donn Minister Ledikasyon R1.043 bilyon, ki ler ou diviz li par lakantite etidyan ki zot kliyan, i apepre R45 mil par zanfan. San al dan bann detay lo kou pou zer en sistenm ledikasyon, an konparezon avek pou zer en lekol prive, en lekol.

Mon le demann Minister Ledikasyon, vi ki bann rezulta ki zot pe prodwir lo kote akademik, i montre ki zis 69 poursan zot bann zanfan i ganny 'C' e pli o. An konparezon avek lekol prive ki 94 poursan. *IGCSE* pou zot i 38.9 poursan, e pou bann lekol Endepandan i 86.3 poursan. Lakantite marmay ki asiz *IGCSE* i, lakantite marmay osi ki asiz

*IGCSE* i annan en gran *discrepancy*.

E lakantite *IGCSE* ki fer par zanfan i annan en gran *discrepancy*. Enn i 3, *whereas* lot i 7 *IGCSEs*. Mon le konnen ki ou pou fer dan en *nutshell*; pa donn mwan tou detay posib, me selman ki ou pou fer avek sa Bidze ki ou'n gannyen, pou amelyor sa bann rezulta dan sa lannen ki pe vini pou donn *value for money*?

E finalman, mon ti a kontan demann Minister Ledikasyon, si i pa ankor ler pou zot get dan possibilite fer en *virtual library*, ki i ava kout zot mwens pou depans lo liv, lo *text books* avek lezot *educational books*. Ki i ava konpri a proze, i ava konpri tou bann liv ki marmay i servi depi primer ziskan segonder. I ava lo en sistenm *virtual library*. Mersi.

**MR SPEAKER**

Mersi. Wi Minis.

**MINISTER JUSTIN VALENTIN**

Mersi Mr Chair. Mersi Onorab pou kestyon. Ou premye kestyon lo semen *access* pou al kot Lekol Primer Beau Vallon. *PS* pou reponn sa kestyon. Be mwan mon a pran lezot, *PS* De Commarmond pou reponn sa premye kestyon. *PS* Barallon i annan larepons pou kestyon

sant profesyonnel si zot ganny akredite. E mwan, mon a pran sa 2 lezot kestyon ki konsern performans e *virtual library*.

### **MR SPEAKER**

Yes, lekel i konmanse? PS De Commarmond wi. *Carry on.*

### **PS ODILE DE COMMARDMOND**

Mersi Mr Chair. Mersi Onorab. Onorab, parey ou okouran, en kantite negosyasyon in ganny fer pou sa dezyenm akse. Selman retar in arive an vi difikilte kot dimoun in *encroach* lo later Minister Ledikasyon. kot nou sipoze pase, fer sa semen pou al lo sa kot Lekol Primer.

E se sa ki'n met nou retar akoz nou pa ankor kapab fini *sort out*. E si nou nobou, byensir nou pa'n ganny larzan prezan sa lannen pou nou fer li. Me selman parkont plan i la pou nou, sa plan ki nou annan i pou pas lo nou later ki'n ganny *encroach*. So i annan serten lot negosyasyon ki nou bezwen fer. Akoz nou ti anvi mentenir nou pozisyon, akoz sa pozisyon i pou fer nou travay en pti pe pli bon marse pou nou. Mersi.

### **MR SPEAKER**

*Next. PS Barallon.*

### **PS LINDA BARALLON**

Mersi Mr Chair. Mersi Onorab. Sa ki konsern akreditasyon bann lenstitisyon parey bann pos-segonder. Sa i ganny fer par Kalifikasyon Lotorite Sesel SQA. E sa i en prosesis, e pou lemoman nou annan bann ki ganny *full* akreditasyon. I annan bann ki dan staz *provisional* kalifikasyon. Apre i annan en group ki dan staz sa prosesis, ki zot pe pas ladan. Apre i annan en group ki pa ankor antre dan faz prosesis.

Nou kontan pou dir ki nou annan parey *TGIM*, *SBSA*, *SIAD*, *SMA* bann ki ganny *fully* akredite. Nou annan en bann ki provizyonnel parey *NIHSS*. Apre nou annan bann ki dan faz ki pou an retour parey *SIT* ek lezot lenstitisyon. E i annan ki pa ankor antre dan faz parey *Lagrikiltir*, *SITE*, e *SIDOL*. Mersi.

### **MR SPEAKER**

*Yes Minister.*

### **MINISTER JUSTIN VALENTIN**

Mersi Mr Chair. Onorab ou kestyon lo performans vizavi Bidze. I en kestyon enteresan. An gro sa kestyon pe demann nou, eski nou satisfe avek sa performans ki pe arive par rapor avek groser sa Bidze? Non nou pa satisfe. Nou pa

satisfie. Me pou fer sa konparezon direk ant Lekol Prive e Lekol Leta, i riske en pe an danze. Akoz i annan bokou fakter ki antre dan sa zwe.

Alor mon pa pou petet reponn li dan sa fason, sa konparezon direk. Me selman nou kapab dir, ki nou kapab fer imedyatman? Imedyatman, e byensir ou konnen pou transform ledikasyon, pou transform performans. I pa neseserman en keksoz ki pou ariv di zour a lannmen.

I en prosesis ki nou bezwen fer li en pe, rezulta i ganny dwa pa arive dan 2an. Me imedyatman ki dan mon plan mon, e sa mon'n komans partaze avek bann koleg. Nou bezwen annan nou sa ki nou apel dan sistem, en *Attainment Leader*. Ouswa en *Attainment Manager*, e sa i dan en sak lekol i bezwen annan enn sa.

Ki poz kestyon bann ansenyan lo bann performans ki pe arive. Bann performans sirtou lo bann *formative assessment*. Nou kapab demann zot bann kestyon ki pe arive? Akoz sa i koumsa? Ki ou pe fer pou fe sa arive? Konnen bann kestyon.

So en *Attainment Leader*, i pou pran kontrol lo performans lo *achievement* pou li kapab

travay ek bann *teachers*. Poz bann *teachers* bann kestyon ki fer li reflesir lo bann laklas. Reflesir menm lo son *assessment* ki i prepare. Sa i en keksoz imedya ki nou pou fer.

Me o fir a mezir i annan lezot keksoz ki nou bezwen aziste. Nou bezwen menm, ou pou sirprann, menm dan sa *equation* pou fer performans monte, i menm annan nitrisyon. Nitrisyon ki nou bezwen koz lo la. I menm osi annan zanfan li menm li, eski ki kalite vizyon i vin avek. I vin avek dan lekol. Ki kalite distraksyon.

So i annan plizyer keksoz ki nou kapab anmenn dan sa *equation*, pou nou kapab fer ki evantyelman performans. E la ler mon pe dir performans, mon pe dir pwen dan legzanmen, akoz sa ki bokou, bokou dimoun i koz lo la. Pwen dan legzanmen i monte.

E apre byensir ki kantite letan sa zanfan, sa etidyan i donnez dan son lesion. I en gran konversasyon, me selman nou pa pe aret la. Akoz nou osi nou santi poudir non, i pa byen. Zanfan dan lekol i kapab perform pli byen.

Me sepandan nou pou kapab osi rikorde ki nou annan zanfan ki'n perform ekstrememan byen,

ekstrememan byen. Me letan ou *get the average, the average* la nou pa neseserman kontan. Me selman ou kapab *zoom* enn, de, ou ganny enn de ki pe fer tre byen. Nou ti a kontan tou zanfan i reisi. Tou zanfan i reisi.

*Virtual library*, ankor dan sa lespri teknolozi, *virtual library* i en keksoz ki'n monte. E mon kontan la sa pe ganny sipor, sipor bann Onorab. Akoz byensir zour nou pou reaparet ankor pou koz lo Bidze, sa pwen i pou en pwen ki nou pou pe rod sipor pou nou fer.

E la par egzanp a ler aktyel ki i annan. I annan en proze ki apel "Renesans". "Renesans" i en *project* ki montre bann etidyan ki mannyer pou lir. Pou lir langaz Angle. E li i annan en kantite liv dan sa *package*, e i en *package* ki si nou donn li sa latansyon ki i merite, i devret fer en zoli transformasyon dan langaz.

E ankor nou pou bezwen form ansenyan. Fer zanfan konpran akoz zot bezwen fer sa, servi sa. E menm osi fer paran konpran, pou zot osi donn sipor bann zanfan anmezir ki zot enterakte avek en programm parey "Renesans". Mersi.

### **MR SPEAKER**

Mersi. Wi Onorab.

### **HON JOHN HOAREAU**

Mon ti ava zis kontan en pti klarifikasiyon avek PS. Vi ki i annan bokou, i annan detrwa ki ou dir i dan prosesis pou detrwa *professional centers* ki dan prosesis pou ganny akreditasyon, eski sa i annan en lefe lo valide sertifika ki zot pou issue sa bann etidyan *at the end of the course?*

E mon ti a kontan osi ki PS i tret sa size semen kot Lekol Beau Vallon Primer koman en priyорите. Akoz enn, marmay pa kapab fer sa *screening test* devan kot Lekol Segonder, akoz zot pas 1 pou monte. Apre zot melanz ek lezot marmay an montan.

E dezyenmman, *fire engine* pa kapab monte dan sa semen ki pas par atraver kot Lekol Segonder. E an pasan Mr Speaker, bann *teachers* osi ki'n graduate apre 3an, zot pa ankor ganny zot lapey. *Full lapey*. E zot pe demande akoz ki in avoye pou 5an? Mersi.

### **MR SPEAKER**

Mersi. Wi PS Barallon.

### **PS LINDA BARALLON**

Mersi Chair. Mersi Onorab. Zis sa ki konsern kestyon akreditasyon an relevans avek

programm akreditasyon. CEO SQA i la akoz sa i enn son manda, i pou vin klarifye lo la ler i vini. me zis pou fer konpran ki dan sa bann *fully accredited* la, *NIHSS* osi i *fully accredited* parmi zot. Me relevan sa ..... avek programm *developments*, sa SQA son manda i ava vin reponn. Klarifye lo la. Mersi.

### **MR SPEAKER**

Okenn lot pwen ki pou klarifye?  
PS De Commarmond wi.

### **PS ODILE DE COMMARDMOND**

Mersi Mr Chair. Mersi Onorab. Pou sa *second access* wi Onorab nou konnen poudir sa i en keksoz priyорите. Sanmenm sa nou ti'n met li lo nou azanda lannen pase. E nou'n fer tou sa ki nou kapab. E la petet mon ti ava demann zot sipor bann *MNA* pou kapab ed nou dan sa prosesis negosyasyon, pou nou kapab ekliersi sa *encroachment* pou nou kapab petet regarde ki mannyer nou kapab *speed-up* avek sa proze.

Lo kote saler bann *teachers*. Si i annan *teachers* spesifikman ki annan problem avek zot saler, nou ti ava kontan zot vin devan pou nou kapab regarde ki prosedir, kwa ki'n arive. Akoz ordinerman letan zot *graduate* zot ganny en

pti *increment*, apre zot *housing allowance* ki R5 mil.

E sa i ale pou 5an. E apre sa 5an sa R5mil i antre lo zot saler. I vin en parti zot saler. Savedir zot *increment* la, i vin apre 5an. So si zot krwar poudir i annan en problem, fer zot vini nou ava regarde. Mersi.

### **MR SPEAKER**

Mersi. Nou a pran Onorab Mondon.

### **HON TERENCE MONDON**

Mersi Mr Chairman. Mon kestyon, mon premye kestyon i konsernan ansenyan Lekol Primer. Prenon kont lenportans bann ansenyan Lekol Primer, ki donn sa formasyon debaz nou zanfan. Eski zot, ozordi zot kapab dir zot konnen konpran bann defi ki sa bann ansenyan i fer fas avek?

E kwa ki Minister pe anvizaze fer pou siport e ankouraz sa bann ansenyan an plis pou sa lannen? E i annan osi parmi sa bann ansenyan ki pe fer bann leson apre ler pou elev zot nivo. Dan menm konteks mon ti a kontan konnen ki Minister pe donne an plis pou siport sa bann ansenyan?

Mon dezyenm kestyon Mr Chairman, i annan en leklersisman mon anvi gannyen

lo bann *basic pay* ki nou'n gannyen lo paz separe, ki donn tou bann detay. Mon vwar en gran logmantasyon ler nou koz anba *curriculum assessment*. Sa i tonm *set program 1* sorti 3 milyon 291mil, pou vin 7 milyon 419 mil, ki reprezent en ogmantasyon pli ki 100 poursan.

Anba *school sekretarya* mon vwar sorti 7, nou pe koz *basic pay*. Sorti R7milyon 842 mil pou vin 11milyon 969 mil. E sa osi i reprezent en ogmantasyon plis ki 50 poursan. E enn de ankor mon war sa varyasyon dan *basic pay*. Mon ti a kontan ganny en lesplikasyon akoz sa gran varyasyon lo *basic pay* lo sa bann paz detay? Mersi.

### **MR SPEAKER**

Mersi. Wi Minis.

### **MINISTER JUSTIN VALENTIN**

Mersi Mr Chair. Mersi Onorab pou kestyon. Mon pou pran premye kestyon ki an konsern defi bann ansenyan. E apre *Financial Controller* Madanm Monthy i a pran lo sa bann varyasyon dan diferan sekter.

Mon krwar sa konversasyon siport bann ansenyan, annan plis bann ansenyan konpetans. I en konversasyon ki'n mont bokou

ozordi apre midi. E la mon anvi ankor koman Minis Ledikasyon koz lo sa sipor ki nou anvi donn bann ansenyan pou zot byensir avans zot performans zot menm zot fer zot prop *professional development* vin en realite.

En, nou *MOTO* ki nou pou vin avek apre byensir ki nou'n ganny nou Bidze. Se *raise aspiration sorry, "Raising aspirations."* Annan de ler, ler ou pe fer sa diferans Kreol an Angle ou bite. *Raising aspirations.* E sa i pou montre nou egzakteman ki nou devret fer pou nou lev aspirasyon bann ansenyan.

Laspirasyon bann etidyan, laspirasyon tou bann dimoun ki pe travay dan sistem ledikasyon. Sa i enportan. E nou letan bann ansenyan i montre nou sa lentansyon pou zot menm zot pran zot devlopman, zot *personal development* dan zot lanmen, pou nou sa i en, nou kontan en kantite sa. Nou kontan en kantite.

E mwan koman Minis Ledikasyon, letan mon pou war sa mon pou siporte. Mon pou siporte e mon pou gete ki bor mon kapab, ki zistans mon kapab zwenn sa bann ansenyan. E se pou sela, ou konnen letan ou fek antre dan en pozisyon parey Minis

Ledikasyon, i annan bokou keksoz ki ou pa ti pe prevwar i arive. E mwan mon pou sezi sa bann lokazyon mwan.

Mon pou sezi sa bann lokazyon e pli tar letan nou pou prezant en lot Bidze pou Ledikasyon, pou mwan tousala i pou reflekte, i pou reflekte sa zefor e sa volonte ki mon anvi. Pou vwar ledikasyon, pou vwar ansenyan dan sistenm Sesel progrese, progrese. E mwan sa i pou enn mon priorite.

Ansenyan Seselwa i devret ganny sipor. Ganny soutenir pou zot avans devan. E fer monte zot performans a tou pri. Mersi.

### **MR SPEAKER**

Yes, Madame.

### **FINANCIAL CONTROLLER LINDA MONTHY**

Mersi Mr Chair. Mersi Onorab pou ou kestyon. Konsernen *increase* dan *basic pay* avek bann lezot *allowance*, anba *School Management* ok. Sa i annan pou fer avek *salary increase*, *allowance* e lezot keksoz pou fer avek *Scheme of Service*, ki ti ganny aprouve lannen pase prezan zot pe ganny *back date* pou sa lannen.

Anba *curriculum* avek anba *School Management* osi.

Pou bann dimoun ki anba *School Management*. Mersi.

E i osi annan provizyon pou en pe *new position* sa lannen. Mersi.

### **MR SPEAKER**

Ok. Nou a pas lo Onorab Cosgrow.

### **HON WALLACE COSGROW**

Mersi Chair. Bonn apre midi Minis. Minis taler dan ou lenthervansyon ou'n dir ki poudir sa Ladministrasyon i enn ki fer konsiltasyon. Parkont Prezidan i dir nou pou koup bann *Board allowance*. Me dan ou larepons ou dir nou ou pa ankor fer sa diskisyon. E ler mon pe ekoute ou a krwar ou pa tro an faver sa zafer *Board allowance*. Sirtou avek *School Council* ki mon krwar ou ti deza lo enn bann *School Council*.

Mon santi petet ou apresye louvraz ki *School Council* i fer, e ou krwar zot merit ganny renimere. I montre petet ki in napa en konsiltasyon avek bann *stakeholders* avan ki Prezidan in fer sa lanons.

Minis akoz mon dir sa *School Council*, mon'n spesifye *School Council*. Akoz mon krwar en kantite ou bann problem, ban ptipi problem

administrativ ki nou pe tandé ozordi la. Ti pou kapab ganny *solve* si nou ti bouz pli vit, or petet si ou ti met *school autonomy* en pe anler lo ou azanda.

Ou'n dir ou menm sa bann zafer si ti fer dan lekol, ti pou tir en kantite presyon lo *headquarters*, e mon dakor. So donn, ki priyrite ou pe donn *school autonomy* lo ou azanda ozordi?

An term *URS* taler *figure* ki'n sorti 63 apepre bann dimoun ki ti lo sa programm *URS* in ganny abzorbe. Me i annan *over* 100 ekek lezot ozordi, ki pa pe ganny en posibilite ganny abzorbe dan sistem kot Ledikasyon. Parkont Minis in dir, Minis pa ou, Minis Finans. Ki zot pou sey met mazorite dimoun ki lo *URS* dan en lanplwa.

E la kot ledikasyon nou war zis 63 ki'n nobou ganny anmase. So i annan kantite dimoun deor ki annan konsern. Zot ti pe annan en *hope* kot Minister Ledikasyon. Zot annan konsern ki zot riske napa en *job*.

Minis eski ou pa kapab sey gete kote ou kapab *squeeze*, mon asire i annan demann, i annan bezwen. Kote ou kapab met serten sa bann dimoun pou

zot kapab osi donn en koudmen dan Servis Ledikasyon.

Apre taler Minis ou'n osi lo *conducive environment for learning*. Ou'n koz lo met mazorite Bidze Ledikasyon dan laprantisaz. Minis sekirite kot lekol, *conducive learning environment* i enportan pou osi led laprantisaz. Nou'n tandem ki i annan demars pou revwar sekirite an zeneral dan bann servis Gouvernman.

Minis eski ou kapab donn nou lasirans ki, donn nou lasirans bann paran, e osi bann *teachers* pou zot prop sekirite. Ki ou pou fer tou posib pou kapab annan en bon sistem sekirite kot lekol. *As much as possible* gard sekirite dimoun ki kapab reakte ler i annan en sityasyon.

Apre dernyen Mr Speaker.

### **MR SPEAKER**

I fer ou kat pwen.

### **HON WALLACE COSGROW**

Non i fer 3 Mr Speaker. Dernyen en pti komanter Mr Speaker. An relasyon avek lenstitusyon edikasyonnel prive. Kote i ete en pti pe dan ou, dan zot plan reform. Si i deza annan, an term zot relasyon avek *private schooling or private institutions*?

Mon dir sa akoz mon santi ki nou bezwen standardiz sistem ledikasyon. E Minister Ledikasyon i bezwen annan e *oversight* lo tou. Bezwen annan en relasyon avek Lekol Prive. Fer sir ki osi konpran konsern bann Lekol Prive. So, Minis sa i pli ou mwen en pti *statement*. Be selman si ou le fer komanter lo la ou kapab fer. Mersi.

### **MR SPEAKER**

Mersi Onorab. Wi Minis. komanse.

**MINISTER JUSTIN VALENTIN**  
 Mersi Mr Chair. Mersi Onorab pou ou kreasyon. Parmi bann kestyon i annan bann sizesyon. I annan bann keksoz osi ki mon pou adrese. Par egzant ou premye pwen lo sa zafer eski nou'n annan konsiltasyon? Annefe nou ti ganny dir ale al negosye. Al negosye, e i annan serten negosyasyon ki'n komans fer byensir.

E mwan avek bann *School Council* nou pa ti ankor zwenn zot direkteman pou nou komans fer sa konversasyon. Akoz mon pe dir ou sa? Ou konnen bann *School Council* i en group dimoun ki nou zwenn zot, ki laplipar di tan zot kot lekol. Parey mon pe dir ou sa konversasyon larzan la, i pa en konversasyon ki pou afekte

bann *School Council* sa konversasyon.

Akoz parey mon pe dir ou sa bann dimoun in travay en kantite letan pou naryen. E zot in fer sa *fantastic!* Alor pa ti lo en azanda irzan pou koz ek zot sa size.

Dezyenm pwen ki mon anvi dir, ou'n envit nou pou nou al gete si nou pa kapab *squeeze* en pe bann *URS*, nou a fer nou a gete apre sa Bidze in ganny *approve* la. Nou a gete si nou pa kapab *squeeze* ankor. Me selman tou an prenon kont ki la prezan ou pe al anploy en dimoun lo en *long term*, ou bezwen fer sir ki li osi i devret pare prezan pou pran sa komitman *long term*. Pa zis pou li ganny en saler. Nou pa le zis saler dan Ledikasyon, nou le dimoun ki vin travay dan Ledikasyon! So sa i mon reaksyon.

Sekirite i *conducive*, pou *conducive learning*, ou konnen les mwan reponn sa. Ti pou enteresan si mon ti'n kapab dabor prezant byen an detay bann plan dan ledikasyon ki mon pe vin avek. Akoz 3 keksoz la ki ou'n demande, ou a dir ou'n deza war mon papye par la.

Premye keksoz, lo lotonomi, lotonomi i limero enn lo mon azanda. Limero enn lo

mon azanda. Limero enn lo mon azanda se ki fer sir ki lekol i pran kontrol lo zot biznes. E ozordi sa diskisyon mon krwar in en pe rezonnen dan sa diskisyon ki nou'n fer. Mon'n kontan dir al kot zot lekol demann zot lekol, tir sa lendepandans lo *headquarters*. Se en pe sa sinaly ki mon pe donnen poudir lotonomi i en keksoz ki mon pou koz lo la for. E mon pou avans devan.

Sekirite bann dimoun otour mwan dan Minister, ki mon'n prezant zot mon plan. Zot in tann mwan koz lo en *Management Model*, en *behavior Management Model* ki pou fer ki lekol, lekol i gou. Pou etidyan, pou ansenyan e pou tou lezot bann travayer. I gou e i an sekirite.

I lo plan. I lo plan e ou trwazyenm pwen ki konsern bann Lekol Prive. *Private schooling* - mon'n diviz, mon pou diviz Minister Ledikasyon an 2 departman. Enn ki pou get Lekol Leta, e apre en ki pou responsab pou devlop Sekter Ledikasyon dan Sesel. E letan ou pe devlop Sekter Ledikasyon dan Sesel, i pou enkli Lekol Prive, i pou enkli *private schooling*, i pou enkli *home schooling*. I pou enkli bann *online learning*. Bann diferan fasilité.

E mwan, e nou, nou lapros avek Lekol Prive, i ekselan. E ou pou war le 18 ler nou ti lanse, nou ti osi envit zot lo nou plato pou zot koze. Pou zot osi lanse. E sa ti enteresan. E nou an konversasyon, bann Lekol Prive a ler aktyel la, pe konsilte avek Minister Ledikasyon lo ki mannyer pou zot osi relanse bann sipor.

E mwan, mon annan gran sipor e gran respe pou Lekol Prive sa ki pe pase dan bann Lekol Prive, akoz mon santi se nou zanfan osi ki laba. Nou zanfan ki laba. E nou bezwen osi gete ki pe arive laba. Ed zot osi, pou zot osi akonplir zot bann rev, zot bann vizyon, zot bann misyon. Mersi Mr Chair.

### **MR SPEAKER**

Mersi. Nou a *move on*, e mon annan Onorab Woodcock.

### **HON WAVEL WOODCOCK**

Mersi Mr Speaker. Bonn apre midi Minis avek ou delegasyon. Mon kestyon i premyerman kot i konsern *rent*, akomodasyon. Sirtou pou bann *teachers* ki sorti Mahe ki ganny *reallocate* lo Praslin. Eski sa bann lasistans ki zot ti pe donnen pou *rent* avek akomodasyon pou kontinyen pou zot?

Dezyenmman, apre vizit ki ou ti fer Praslin Minis ki mon ti

akonpanny ou. Ti annan, mon krwar i enn bann plan ou Minister ki dan le fitir pou annan bann *online classes* atraver *video conferencing* kot i konsern sirtou bann etidyan ki pos segonder parey *A Levels*. E mon krwar ti annan en partenarya avek *Airtel* osi ki nou ti an diskisyon pou ede avek *internet*.

Mon kestyon i, kan eski zot pe anvizaze komans sa bann *online learning*? E mon okouran osi poudir ti annan en group zenn *maverick* ki ti'n apros ou, mon krwar regardan pou devlop bann *App* ki kot lekol. Nou'n war Lekol Beau Vallon in vreman inovativ avek kreasyon en *App* pou son lekol. Esaki sa i laliny ki zot pe mazin ale pou moderniz en pe laprantisaz dan lekol?

E trwazyenmman, ti annan sa *issue* Baie Ste Anne kot ti annan en laklas ki ti'n ganny *allocate* avek liniversite, ti annan serten konsern regardan sa laklas ki pa ti pe ganny servi e bann lekipman ladan ti'n andomaze, eski sa programm sa plan ki zot ti pou fer bann laklas, bann *courses* ti pou fer dan sa lekol pou kontinyen? Si ou kapab donn nou en pe detay lo la.

E finalman, ti annan en *audit* ki ti ganny fer, mon pa

kennen si an 2018 or 2019, kot i konsern nivo kalifikasyon bann *teachers* dan lekol. E nou ti war poudir ti annan en bon pe *teachers* napa sa kalifikasyon. E ti annan bann programm ki ti'n komanse parey *BLM*. E *Unisey* osi mon krwar i pe ofer en *B.Ed.* onivo *B.Ed.*

Me selman sa pou segonder. Esaki byen zot pou. kan zot pou rekomans sa bann laklas *BLM* pou bann nouveau cohort? Esaki osi zot annan lentansyon annan sa *B.Ed* lo nivo primer osi. Akoz la mon krwar si nou pa tronpe lo nivo segonder.

Apre finalman Minis ou bezwen klarifye sa byen, akoz mon santi i annan en mannigans politik pou *undermine* ou pou kraz en pe ou Minister aktyelman la. Anvi enn de bann kestyon ki'n sorti. Kot i konsern, akoz i annan bann *misinformation* ki pe sirkile aktyelman la kot i konsern *Dedicated Fund*.

Zot pe dir poudir goute ek dezennen ki bann marmay mwen fortinen ti pe gannyen, pe al ganny koup konpletman. Sak lekol, liniform pe al ganny koup konpletman. E mwan mon krwar i enportan pou ou klarifye sa, akoz i annan en politik ki pe ganny fer la konmsi pou sey tourn latansyon piblik

kont ou. E sa in ganny anmennen par Onorab Ti Nesta avek Alex Ari pli boner. Mon pa konnen si Onorab Nasim osi pli tar i pou koz lo la.

*(Interruption)*

### **HON WAVEL WOODCOCK**

Mr Speaker ...

### **MR SPEAKER**

Arete!

### **HON WAVEL WOODCOCK**

Minis klarifye sa, akoz sa i bann politik bon marse ki pe ganny fer dan nou Lasanble Nasyonal,

### **MR SPEAKER**

Arete!

### **HON WAVEL WOODCOCK**

... kan sa bann lasistans i deza pe ganny donne dan ou Minister .....

*(mic switched off)*

### **MR SPEAKER**

Silvouple ou a les mwan fer mon louvraz. Mersi. Onorab Woodcock, ou ti'n deza fer 4, apre ou'n al dan en gran diskour. Mon pa *mind* sa politik ki ou'n fer mwan. Mon pa *mind*, politik i ganny fer tou lede kote i fer. Me selman, mon en pe konsernen ki ou fer ou 4

pwen apre ou lans ou dan en gran *speech*. Mon a dir ou termin la, e nou a les *panel* pran sa diskisyon. Mersi! Minis wi.

### **MINISTER JUSTIN VALENTIN**

Mersi Mr Chair. Mersi Onorab. Lo kote lasistans ki nou donn bann ansenyan ki kit Mahe ki al Praslin ou La Digue, i pou kontinyen parey. Ou'n koz lo *online classes*, sa lentansyon ki nou ti anvi avek *Airtel* ou fer en *Virtual Learning Center* lo Praslin, i ankor touzour la. me selman in ganny retarde akoz COVID. Nou pa'n kapab fer sa bann deplasman. Me selman nou ankor an konversasyon avek *Airtel*.

Bann App ki pe ganny devlope, wi nou pe ankouraze akoz parey nou'n dir pou nou kapab bouz devan avek nou plan, nou bann programm *online learning*. Bann App i enportan. i annan Lekol Beau Vallon wi ki'n devlop pou li. i annan en group *Vanilla Schools* ki pe fer pou li.

So i annan tou sa bann group ki pe apres nou, pou nou travay ansanm avek zot. E sa nou war li fantastik. I annan sa laklas ki Liniversite Sesel pe servi kot lekol Baie Ste Anne, mon'n perdi mon kapasite pou koz lo liniversite a sa pwen la. Me selman sa ki mon konnen

liniversite, wi zot ankor bezwen sa laklas.

E avek sa novo lelan ki nou pou mete dan laprantisaz *online*. Sa laklas i devret kapab prezan bouz dan sa bon direksyon. E mon'n ganny sinyale par *PS* ki *BLM* pou nou kapab lev kalifikasyon performans bann ansenyan. Sirtou bann ansenyan an primer, segonder dan *B.Ed.* pe deroule. In komans deroule. E pe al dan en bon direksyon. Mersi.

### **MR SPEAKER**

I annan lot, wi. Ou'n fini ek sa? Ok mersi. Nou a pran Onorab Samynadin.

### **HON KELLY SAMYNADIN**

Mersi Mr Chair. Bonn apre midi Minis avek ou delegasyon. Mr Speaker, si ou permet mwan mon ti a voudre felisit tou paran ki'n pran li zot responsabilite byen boner pou asire ki zot zanfan in pare pou al lekol Lendi. Akoz si mon mazin byen Minister Ledikasyon ti'n dir ki a okenn moman tou depandan lo sityasyon *COVID* dan pei bann lekol ti pou ouver.

Premyerman, mon bann kestyon. Premyerman, an vi ki lekol Au Cap i en *feeder school* Lekol Point Larue Segonder, mon ti a kontan konnen ki

provizyon sa Bidze pe donnent fas a sa sityasyon linondasyon kot sa Lekol Segonder? An vi ki sak fwa gro lapli, delo i monte e i koz en problem pou etidyan ek staff sa lekol. Sa sityasyon i enn ki'n kontinyelman repeate pandan plizer lannen. Si Minis i kapab donn nou en lesplikasyon lo la silvouple.

Dezyenmman, *issue* bis kot Lekol Au Cap. Bis i antre dan lakour lekol, e i poz en risk pou bann zanfan e *staff* sa lekol. Vi ki *SPTC* pe dir napa lot alternativ. Mon pe gete si i pa kapab annan en dialog ant Minister avek *SPTC* pou kapab trouv en solisyon?

E dernyerman, eski Gouvernman pa pe konsidere pou bann lekol ganny asiste avek sa *COVID Relief Fund* pou maintenance lekol lo nivo lizyenn e sekirite kont *COVID* anvi ki Bidze dan lekol i ganny koupe par aepre 50poursan. Mersi.

### **MR SPEAKER**

Mersi Onorab. Minis wi.

### **MINISTER JUSTIN VALENTIN**

Mersi Mr Chair. Mersi Onorab pou ou kestyon. Mersi pou sinyale ki bokou paran pe angaz zot pou anmenn zot zanfan lekol Lendi. An se ki konsern linondasyon, *PS* pou

pran sa apre. Ou konnen lo kote bis *SPTC* e lekol.

Sa parey mon pe dir i en lekol spesifik. Nou kot Minister Lédikasyon nou pou les lekol dabor lekol e *SPTC* rod sa solisyon. Akoz zot vwar sa solisyon kekfwa. E zot devret antre dan sa dyalog pou rezourd sa problem.

E ou'n fer en propozisyon lo *COVID Relief Fund*. Ki mannyer petet lekol i kapab ganny asiste. Mon krwar i en bon propozisyon. Ki mon pou anmenn sa propozisyon devan. Mersi.

### **MR SPEAKER**

Wi PS De Commarmond.

### **PS ODILE DE COMMARDMOND**

Mersi Mr Chair. Mersi Onorab. Wi lo problem inondasyon kot lekol Point Larue Segonder parey ou konnen lanvironnman sa lekol mannyer i ete i tre difisil. E sa i aplik osi pou Point Larue Primer. E travay ki nou ti'n antretyen la, nou pa'n kapab ganny ase larzan pou nou fer sa gro travay lo sa nivo ki nou, nou ti ava swete annan.

So nou pou bezwen zis pou lemoman sey mentenir sa sityasyon e servi e pe bann larzan '*maintenance*' pou fer serten travay ki pou minimiz sa

inondasyon pou lemoman. Apre i annan lot travay koneksyon avek *sewage system* ki osi lo nou plan. Mersi.

### **MR SPEAKER**

Mersi Onorab Vidot.

### **HON AUDREY VIDOT**

Mersi Mr Chair. Bonn apre midi tou dimoun ki a lekout. Spesyalman bann dimoun Roche Caiman bann dimoun ki pe swiv nou. Mon kestyon pou *panel i comme swivan*;

Minis ozordi le 11 Mars dan nou Lasanble, ou'n dir bann paran *call* lekol zot zanfan, e fer resorti zot bann konsern akoz zot Minister Lédikasyon. Zot pa'n anrezistre okenn konsern ki nou bann Manm nou'n fer resorti lo sa kote latab.

Me Minister apard sa lespas letan ki'n donn lanons konsernan lekol pe re ouver le 15 Mars, mon fek ganny en *text* en pti pe pli boner kot paran in fer resorti ki ozordi dan en rankont, en *meeting*. Zot in ganny fer resorti ki *uniform* pa pou asiste anba *Dedicated Fund*, me parkont zis pou goute avek *lunch*.

E ou kapab mazinen ki lafen di mwan Fevriye ki'n fek pase la. I annan ladan in ganny zis R3,500, bann ki ti anba *URS*

e i annan ankor pe rod louvraz. Eski *panel* i kapab ekliersi nou, mon lot kestyon, si bann zanfan avek en maladi kronik, mazin asma bann maladi en pe parey. E bann zanfan ki ganny akonpannyen avek zot paran dan bann Lekol Primer e Segonder akoz zot otreman kapab.

Resaman nou ti ganny sans ganny en zenn dan en sityasyon parey ki'n vin adres nou Lasamble, e mazin li. Pou antre dan lekol le 15. I annan paran ki konsernen e pe demande, bann paran parey pe demande, eski zot osi zot pou retourn lekol le 15, enkli ki zot paran?

Mon lot pwen, eski Minis i kapab - mon konnen i annan konsern parmi serten konsey e paran lo plan Gouvernman pou revwar bann Kontra lo bann lazans sekirite. Eski pou sanze pou met sistenm *camera*? Eski Minister Ledikasyon in konsilte ek bann konsey e PTA lo sa size? Si wi, kan ki zot lenpresyon ki zot in dir?

Akoz mon okouran i annan serten konsern ki'n ganny leve lo sa size akoz bann *issues* ki'n ganny fer resorti se, bann lensidan lepase kot menm si i annan lekol i annan *camera*, san prezans en zofisyel sekirite, i pa permet pou kapab anpes

bann dimoun an deor. Ki dan lepase nou konnen in antre dan lekol swa in fer vandalizm, e menm atak nou bann etidyan enkli bann ansenyan.

E pou terminen, ki pozisyon Minister Ledikasyon lo *plagiarism*? Mersi.

### **MR SPEAKER**

Mersi Onorab. Yes *panel*? Wi Minis.

### **MINISTER JUSTIN VALENTIN**

Mersi Mr Chair. Mr Chair nou pa'n neseserman konpran sa dernyen kestyon Onorab *please*.

### **MR SPEAKER**

Ale re fraz ..

### **HON AUDREY VIDOT**

Mon a vin pli spesifik Kreol. Ki pozisyon Minister Ledikasyon lo zot bann programm ki bann ansenyan i donn bann zanfan, pou anpeste ki marmay i kopi travay en lot dimoun e met an pratik dan lekol? Mersi.

### **MR SPEAKER**

Marmman, wi Minis ou'n pare? Wi.

### **MINISTER JUSTIN VALENTIN**

Mersi Mr Chair, mersi Onorab pou ou kestyon. Lo kote *Dedicated Fund* vizavi *uniform*,

*Financial Controller* Mrs Monthy pou pran sa apre.

An se ki konsern maladi kronik, wi nou'n lans lekol i annan bann paran byensir ki konsernen avek zot zanfan. Si zot konsernen zot napa tro bokou lasirans ki zot pou fer sirtou kot i konsern maladi. Nou pe demann zot pou konsilte dokter zot zanfan. Zot Sant Medikal, dokter zot zanfan pou rod leklersisman. E apre averti lekol ki *advice* zot in gannyen.

Lespri met *camera* dan bann lekol, sa i pa ankor pran en desizyon final lo la. Me i en keksoz ki dan diskisyon. Letan en pozisyon final i ava ganny pran, byensir pa tou lekol ki parey. I annan lekol petet wi i kapab marse, me i annan lekol i kapab pa marse.

E bann sinal ki nou pe gannyen osi, i kapab petet annan, pa konnen si i annan en ranforsisman, me ki mannyer sa pou ganny arive. *The expert* pou kapab donn nou sa fason pli byen.

E ou'n koz lo sa dernyen kestyon ki nou pe fer pou anpes etidyan ki pe fer travay *online* kopi. Eski ou pe, eski sa ki kestyon? Dakor lanfaz ki ganny mete, nou, nou demann bann zanfan pou et kreativ pou zot kapab demonstre zot talan. E

nou montre zot dan lekol. Nou montre zot, ou konnen i annan bann standar dan bann sant profesyonnel.

Nou montre zot bann standar ki mannyer zot referans zot bann travay. E bann zanfan i konpran sa tre byen. Mersi.

### **MR SPEAKER**

Mersi. Onorab Labonte. Pardon ti annan pwen ki pa ankor adrese? Wi madanm.

### **FINANCIAL CONTROLLER**

#### **LINDA MONTHY**

Mersi Mr Chair. Konsernan *Dedicated Fund* mon pe refer sorti, mon ti'n eksplike taler. Mon a refer sorti konsernan *Dedicated Fund* byen. *Dedicated Fund* i anba lekol. *Ok?* Sa larzan *ASP* in anvoy anba Ledikasyon dan son Bidze ki avan i ti anba Bidze *ASP*.

Sa selman sa diferans ki in fer. Ledikasyon ki zer sa Bidze anba Ledikasyon, *ok?* Bann paran ki ti pe dir konsernan *Dedicated Fund* ki pa pe ganny asiste, zis *stationary* Onorab. Sa bann *student* ki zot paran osi i *vulnerable* i lo benefis sosyal, zot ganny asiste. Tou sa ki dan Lekol Primer, Segonder, Lakres, avek *school meal*, *uniform* *stationary*, e lezot keksoz, *breakfast*. E lezot keksoz. *Ok?*

Selman sa paran pa pe ganny sa larzan dan son lanmen pou *uniform* avek pou *school meal*, ok? Sa bann marmay *earmark* e sa larzan i ganny sorti dan sa Bidze *Dedicated Fund* i ganny peye pou *school meal* avek pou *uniform* anba reveni Gouvernman ki nou anmase pou *school meal* ek *uniform*.

*Whereas* pou *stationary*, zot aste *stationary* dan laboutik, e sa larzan i ganny mete dan sak lekol dan zot *Commercial Bank Account*. E sa bann *Headteacher*, zot *Office Manager*, zot *Chairperson*, zot ki annan sinyatir lo sa bann *cheque* dan zot labank. Nou, nou zis *reimburse* apre ki zot in fini depanse, e nou fer sir sa bann depans i *in line* ek regilasyon. Ok?

Ou pa kapab dir mwan ou a donn en marmay, ouswa en lot non, ki *appear* lo la, ki pa'n ganny approve anba *Dedicated Fund*. E tou sa kont pou ganny odite. Mersi.

### **MR SPEAKER**

Mersi. Onorab Labonte.

### **HON ANDY LABONTE**

Mersi Mr Chairman. Minis avek PS. Bon premyerman mon anvi dir ki mon pou siport sa Bidze malgre i en gro Bidze. Akoz

Ledikasyon i en keksoz ki enportan e esansyel pou nou Nasyon an zeneral. E mon lentere dan sa Bidze i pli ou mwen i baze lentere *teacher*, zanfan e paran. Akoz zot ki pli enportan pou nou.

Alor mon kestyon i al koumsa, premye kestyon i baze pli ou mwen lo bann zanfan. Akoz i annan en mankman bann *special needs teacher* dan lekol, *be it* ki lo kote primer ou menm segonder, prezan pe ganny demande ki ou Minister pe deside pou fer lo la akoz sanmenm sa ki *lead* ki finalman i annan bann zanfan ki delenkan?

Apre an pasan ou'n koz lo nouveau Lekol La Rosière ki pe ganny fer. I en porsyon ki pe ganny finanse par Gouvernman *Kuwait* e en bout par Gouvernman. Me an 2019 mon'n war i annan en, si ou annan sa lenformasyon PS petet. I annan en alokasyon 8 milyon 168 mil ki ti ganny mete anba sa. Petet ou kapab eksplike sa ti pou kwa egzakteman.

Apre mon lot kestyon i plizoumwen Minis, vi ki ou en nouveau Minister, ou pe ganny demande si ou Minister pou kontinyen avek sa menm model *quality assurance* dan bann lekol, espesyalman sa

*Inspectorate Unit?* Akoz i pa ti pe mars ditou. E prensipalman akoz ti napa ase konsiltasyon ek sipor sorti kot *Headquarters*. E menm i annan lenformasyon ki *internet* dan lekol pa pe mars ditou.

E mon lot kestyion, mon kontan ler mon'n tann ou ...

### **MR SPEAKER**

... ou'n fer 4 pwen deza Onorab.

### **HON ANDY LABONTE**

Mon dernyen Mr Chairman. Mon dernyen leklersisman pli ou mwen. I vin lo kote *URS*. Mon'n kontan ler mon'n tann ou dir ou pou rod fason pou *squeeze*. Akoz dan mon distrik. e la i vin lo kote komunikasyon, i annan dimoun ki zis in ganny dir koumsanmenm sirtou en dimoun ki i pe al ganny zanfan, i annan 4 mwan. E in zis pa ganny dir naryen zis ler i vin kot lekol zot dir li koumsa poudir *URS* in kennsel. So i war li poudir i napa okenn landrwa pou li travay.

Lo kote manze, *tuck-shop*

...

### **MR SPEAKER**

... ou pa ti ankor fini Onorab?

### **HON ANDY LABONTE**

I relye avek kanmarad li.

### **MR SPEAKER**

In ase silvouple aret la. Permet Minis reponn kestyion. Mersi. Wi Minis.

### **MINISTER JUSTIN VALENTIN**

Mersi Mr Chair. Mersi Onorab pou ou kestyion. Ou konnen mankman *teachers* dan lekol i ankor annan. Avek sa nouvo vizyon ki mon pe anmennen nou pou bezwen rod bann nouvo model, bann nouvo fason wi, pou nou ganny sa bann *teachers* ki nou ti ava anvi.

*Teachers* pou *special needs*, wi nou rekonnert e parey nou pe dir ou. Mwan mon'n vin avek sa lespri. Annefe mon'n ganny osi sa manda pou mwan devlop ledikasyon e mon pou pran sa manda avek tout son bann konpleksite pou nou kapab bouz ledikasyon devan. Lekol La Rosière petet *PS* i ava reponn sa kestyion. Me selman i pe sey, *ok PS* pou reponn sa kestyion lo La Rosière.

Lo *quality assurance* zisteman en lazans ki tonm anba dan Minister kot mon ansarz i *SQA*, i pou vini swa taler oubyen demen. I pou kapab pran sa kestyion lo *quality assurance* avek *Inspectorate Unit*. Akoz sa zot tonm zisteman anba son manda.

URS mon krwar nou'n koz ase lo la longman. Vwala, mersi bokou.

**PS            ODILE            DE**  
**COMMANDMOND**

Mersi Mr Chair. Pou La Rosière wi, si ou a rapel nou proze ti'n sipoze demare depi 2018, sanmenm sa nou ti'n met sa larzan. E sa larzan se sa GOS *component* pou si proze ti demare sa ki nou ti pou mete. Lefe ki proze pa'n demare sa larzan ti ganny servi pou fer lezot proze renovasyon dan bann lezot lekol. Mersi.

**MR SPEAKER**

I annan ankor Onorab.

**HON ANDY LABONTE**

Dernyen pti klarifikasyon Mr Chairman, an relasyon avek en larepons;- konsernan komunikasyon ki ou pa'n vreman reponn mon respons lo kote komunikasyon. Parey mon pe dir, mon kapab al direkteman lo la pou petet en pe pli kler PS.

Ki mon menm mon personnelman mon'n deza anvoy ou en *mail* ki mon ti pe pran lentere enn mon zabitan *regarding related* avek *tuck shop operator* ki ti anvi en *meeting* omwen avek zot pou kapab kominike. Me selman

mon pa'n zanmen ganny repons ni menm avek ou. Me selman mon krwar poudir ki ou'n bezwen resewwar mon *mail*, petet ou kapab amelyore lo sa kote komunikasyon ki petet dimoun i konnen kwa vreman ki pe arive. Akoz finalman i ganny gete koman....

**MR SPEAKER**

Ok ale nou'n tandé Onorab. Mersi.

**HON ANDY LABONTE**

Mersi.

**MR SPEAKER**

PS mon sipoze ou'n note. Mon pa konnen si ou le fer en komanter lo la. I zis e demann pli bon komunikasyon. Wi PS.

**PS            ODILE            DE**  
**COMMANDMOND**

Mersi Mr Chair. Lo kote *tuck-shop*, i annan en dimoun ki responsab *tuck shop*. Alors tou komunikasyon nou ganny anvoie kot sa dimoun ki responsab *tuck shop* e li i fer sa bann lyezon avek bann *tuck shop operators*. Mersi.

**MR SPEAKER**

Ok. Nou a pas lo Onorab Pillay. Onorab Pillay mon war ou'n sinal mwan poudir ou le fer en deklarasyon lo *COVID testing*.

Si ou pou fer li fer li an kad en remark pou Minis oubyen soz. Annou evit okenn gran deklarasyon zis pou piblik silvouple. Mersi.

### **HON SEBASTIEN PILLAY**

Mersi Mr Chairman, i pa en deklarasyon ki an relasyon avek Minister Ledikasyon. Be mon pou al lo size mon bann kestyon pou Minister Ledikasyon. Sa ki mon ti annan pou dir *regarding COVID* ti senpleman ki sa size *testing* in mont ankor pou sa novo varyan. E *Public Health Authority* in dir ki i annan en keksoz ki zot manke pou kapab anmenn sa *sample*, fer teste Sid Afrik pou sa novo varyan *COVID*.

E sa ki mon ti pe sey demande se eski atraver ou lofis nou pa kapab *find out* si *Public Health Authority* pa kapab ganny akse ek sa *COVID Fund*? Pou fer ki avyon *IDC* al rod sa ki zot bezwen, pou nou kapab anmenn sa *sample* Sid Afrik ouswa Kenya pou fer sa tes. Pou ki nou a kapab ganny sa rezulta se tou.

### **MR SPEAKER**

Mersi wi. Ale ou kestyon.

### **HON SEBASTIEN PILLAY**

Mersi Mr Chairman. Mr Chairman mon kestyon pou

Minis se ki, en pwen ki'n souleve se ki louvertir bann lekol i baze lo lamelyorasyon sityasyon *COVID* oubyen sanzman dan sityasyon *COVID*. Minis ou pe propoz Minister Ledikasyon pe propoz louvertir lekol, le 15 Mars, me an Avril zanfan pe al vakans. Pa ni menm 1 mwan, or 1 mwan keksoz.

E relativman avek sa sityasyon 1 mwan la, nou pa ankor fini aprouv bann Bidze, bann revi pa ankor ganny fer pou vvar kote bann larzan i kapab ganny mete pou remet bann dimoun dan lanplwa. Minister Lanplwa pa ankor kapab plas bann dimoun ki'n sorti lo *FA4JR* dan lanplwa. I pa ankor kapab plas bann dimoun ki lo *URS* danm lanplwa. Ou menm ou annan dimoun lo *URS* ki'n sorti ki paran son zanfan pe al lekol.

Sert tou dimoun ti'n devret pare le 18 Zanvye me pa nou tou ki viv dan menm realite. Mon osi mon annan 2 zanfan ki pe al dan lekol Gouvernman *as of* le 15. E mon 2 zanfan po al dan lekol, pou *still* annan *community transmission*.

I annan paran ki konsernen ki ler zanfan pou ariv lekol si i atrap sa maladi i retourn kot li, *the whole family*

prezan i bezwen al dan karantenn. Dan mon ka par egzanp si mon zanfan i retourn ek sa dan lakour, i fer en tes i pozitiv, mon pa pou vin Lasanble.

E ou annan sityasyon osi ki *teachers* pa'n vaxsinen. Mon konnen Gouvernman pou kontan mon pa vini. So, *Minister*, mon konpran nou bezwen annan en, ou pe *practice collective responsibility* anver ou Gouvernman e bann lanons ki zot in fer. Me mon enplor ou pou get sa from perspektiv en *fellow educator* ki'n travay akote kanmarad, e ki konnen sityasyon manyer i ete *regarding* zanfan ler i pou al kot lekol, enteraksyon eksetera.

Ki eski pa ti a meyer, vi ki pei pe ouver le 25, pou zanfan retourn lekol *around* sa menm peryod, akoz se sa peryod ki ganny etablir ki nou pou *achieve herd immunity?*

En keksoz ki'n come up ankor *Minister*, se lefe ki ou pe rod landrwa pou *squeeze* larzan dan sa Bidze. E nou vvar poudir i annan aepre 32 milyon ki'n ganny mete pou sipor zanfan pou *travel* ek *SPTC*. 2 mwan sa larzan pa'n ganny servi, savedir sa i tonm aepre 2.6milyon par mwan. Ki fer pou 2 mwan sa i fer aepre 5.3 milyon.

Ki'n sipoze ganny *savings*, me *PS These* i kapab klarifye. Eski nou pa kapab redwir sa sonm, sa 5milyon. E sa 5milyon i retourn dan *Consolidated Fund* e i gannyen servi pou ed Minis zisteman pran ankor en pe plis sa bann dimoun ki ti lo *URS* ki ti pe asiste dan bann lekol. Akoz zisteman pandan 2 mwan nou pa'n servi sa larzan ki sipoze ganny vote. *PS These* i ava klarifye sa pou nou.

E Minis ou'n dir nou poudir ou annan sa reparasyon ki bezwen ganny fer lo Minister Ledikasyon, ki pe kout R8 milyon. E sa i an relasyon avek *asbestos*. Mon pe demann ou si eski nou pa kapab fer en pe *savings* la? Koz a sa moman petet konsiderasyon mazin ki nou bezwen annan se larzan ki sipoze al dan *teaching and learning* nou pa kapab touse. Saler bann *teachers*, saler bann dimoun ki travay, nou pa kapab touse.

Me nou sey rod landrwa kot nou kapab fer seren lekonomi, pou nou'n kapab ed Minister Ledikasyon siport *maximum* dimoun ki kapab travay. Mr Speaker, mon note an pasan ki mon kontan ki kote Gouvernman i komans koz, koze *URS*, ki mon ti anmenn en kestyon pou Minis Lanplwa. E

dernyen lenformasyon ki mwan mon'n gannyen se ki pa ankor fini plas dimoun dan travay. E i annan e kantite dimoun ki'n ganny met ater ki napa travay e i konmans vin difisil.

So, mon ti a kontan Minis si ou kapab regard sa size dan en fason obzektif. Malgre mon konnen ou en Manm en *Cabinet* e ou annan responsabilite kolektiv ki paret ou pe fer ou mye pou ou kapab onore dan Lasamble. Mersi Mr Chairman.

### **MR SPEAKER**

Mersi Onorab. *Panel* lekel pou komanse? Minis wi.

### **MINISTER JUSTIN VALENTIN**

Mersi Mr Chair. Mersi Onorab pou ou kestyon. Desizyon pou ouver lekol nou'n rod *advice* byensir avek Minister Lasante, e nou desizyon i byen sir in ganny gide par *advice* Minister Lasante. E pa'n annan en konsern mazer. Byensir nou annan bann konsern parey nou tou nou konnen, be selman nou'n ganny dir i *safe* nou konpran nou kapab komanse.

E sa in gid nou desizyon. Ou'n fer detrwa sizesyon Onorab kot nou kapab ganny bann larzan pou kapab zisteman met dan Ledikasyon. Mon war sa i en nide ki byen e nou kapab konsidere. Par

egzanz ou'n koz lo sa sityasyon reparasyon Minister Ledikasyon pou tir son, pou sanz sa twatir. E zisteman nou, nou pou gete si sa i vreman neseser la a sa pwen.

Me si i pa neseser kestyon ki ou kapab reponn, annou petet donn li, annou anvoy li en pe pli tar. Gete ki mannyer petet nou kapab ganny sa larzan. So sa 2 pwennvi. E apre ou'n koz osi lo met bann *URS*, ankor zot in koz sa lespri *squeeze* bann *URS*. Nou bezwen osi gete wi kantmenm nou pou pran sa lannen, eski nou pou annan potansyel pou nou, akoz sa i pou en long term *commitment*.

Eski nou pou annan potansyel pou nou kapab kontenir sa *commitment*? Sa osi i ava bann desizyon ki nou a fer baze lo bann kalkilasyon ki Minister Finans i ava ed nou travay lo la. Mersi Mr Speaker.

### **MR SPEAKER**

Mersi. I annan kestyon ki i pa'n reponn Onorab.

### **HON SEBASTIEN PILLAY**

Wi mersi Mr Chairman, pou ou lendilzans. Mr Chairman en pwen enportan Minis se ki ou'n dir nou Minister Lasante in dir nou i *safe*. Nou Minister Lasante in dir i *safe* pou ouver pei e nou pou *achieve herd*

*immunity* le 25. So ki mannyer i kapab *safe* avan le 25, i *safe* pou Seselwa me i pa *safe* pou etranze? Sa pou mwan i en premye pwen enportan ki piblik Seselwa, e ki Minis mon krwar ou Gouvernman i bezwen pran konsiderasyon.

Mon dezyenm pwen Minis. mon'n *actually* fer sa kalkil ki ou pou kapab pran apepre 76 dimoun lo R5,800, mon pa dir nou pou pran 76. Me i ariv apepre 76 dimoun ki nou pou kapab pran lo R5,800 *for the whole year*.

Me la mon pe koz *for the whole year*, i pa vedir ki nou pou pran li *for the whole year* akoz ler lekonomi pou re ouver, si i pa kapab re ouver le 25 Mars i pou bezwen reouver *sometime*. E dimoun pou kapab pou kapab komans retourn dan travay. I pa vedir ki nou pou bezwen sa larzan antye.

So, mon pwen Mr Chairman, se eski Gouvernman avan in vin fer sa bann lanons ki in fer, in *actually* regard bann *lines of expenditure* ki i annan, pou analize si vreman in napa *savings* avan ki i fer sa bann *statement* ki pou mwan ti en pti pe *blanket*.

Mon pa pe blanm personn. Me mon pe zis dir poudir petet i annan en lot fason fer ki pa kapab permet ou ganny dimoun

adisyonnel pou fer serten travay ki ou bezwen kot Minister Ledikasyon. Ou'n koz lo *Attainment Leaders*, ou pe *recruit* plis dimoun dan ledikasyon kot larestan landrwa pe ganny en *freeze* lo *recruitment*.

Mon bi se fer sir ki Ledikasyon ki en size ki vreman enportan pou mwan, ki pre ek mon leker. Ki i marse, e ki nou kapab, mon 2 zanfan osi. E tou zanfan lezot dimoun i a kapab pe retourn lekol e pe aprann. Se sa mon bi e se s mon lentansyon.

So, Minis petet *please* sey konsider bann keksosz ki mon pe met devan ou.

### **MR SPEAKER**

Ok. Minis a adrese silvouple.

### **MINISTER JUSTIN VALENTIN**

Mersi bokou Mr Chair. Mersi Onorab. An sa ki konsern met URS e sa 76 parey sa kalkil ki ou'n fer, mon pou sirman les mwan, Minister pou ganny gide par bann zofisye Finans, ki ava kapab osi met zot *thinking* dan sa kalkilasyon.

E apre an se ki konsern, par egzant mon'n wi *Attainment Leaders* ki nou anvi met dan sistem. I pa neserman nou pe fer nouvo *recruitment*. I annan re klasifikasyon bann *post* ki

nou kapab fer. I annan bann differan lezot travayer petet ki nou kapab reget zot rol ki zot pe zwe, zot la deza avek nou.

Annefe tou sa bann *Attainment Leader* ki mon pe mazinen la, i bann dimoun ki deza egziste avek nou avek bann saler ki nou kapab pozisyonn zot pou zwe sa bann rol, dan bann lekol ouswa dan bann zone. Mersi Mr Chair.

### **MR SPEAKER**

Mersi. Nou napa okenn lot kestyon. Nou a kapab, wi madanm?

### **FINANCIAL CONTROLLER** **LINDA MONTHY**

Mersi Mr Chair. Onorab konsernan 32milyon anba concession. Ledikasyon in pey *invoice* pou *bus concession omnibus* pou Novanm ek Desanm. So napa, ..... sa Bidze sa lannen. So, *it is no more 32 million*. Nou'n fini pey pou Novanm ek Desanm dan sa Bidze ki ti *arrears* lanmen pase. Mersi.

### **MR SPEAKER**

Onorab Pillay nou pa kapab prolong sa. Minis in donn ou en repons.

### **HON SEBASTIEN PILLAY**

Mr Chairman, non, non. Non, non, Mr Chairman. Mon annan en *point of order*.

### **MR SPEAKER**

Ale fer li vitman silvouple.

### **HON SEBASTIEN PILLAY**

Ou bezwen *allow* mwan pou eksplik ou akoz mon pe *raise* mon *point of order*. Mon lo sa....

### **MR SPEAKER**

... ou pe ...

### **HON SEBASTIEN PILLAY**

*May I* Mr Chairman?

### **MR SPEAKER**

Ou pe al dan *point of order*.

### **HON SEBASTIEN PILLAY**

Well mon bezwen ganny en lesplikasyon avek Minister Finans Mr Chairman, akoz dan sa Lalwa ki nou gannyen sa *Appropriation Bill* ki mon'n gannyen mwan, pozisyon konsolide Minister Ledikasyon i enkli sa R2milyon ki mon pe vote la a sa moman.

Now, si PS Finans pe dir mwan ki poudir pandan sa lannen nou sipoze *allocate* 32 milyon ki pou *a full year*. E mon konpran akoz, i pa baze lo sa ki Mrs Monthy in dir mwan. Me i baze lo sitasyon ki nou ladan. So eski nou pe vot lo en Bidze ki

an mwens pou Minister Lédikasyon? *That is the question* preznan ki *begs itself* akoz i pou 2 mwan an mwens ki sa pou sa lannen.

Akoz si zot ti'n pey lannen pase, i ti pou bezwen vin koman en *supplementary* ki *over and above*. Mon pa tro, tro ganny en konpran kwa ki nou pe sey fer egzakteman Mr Chairman. Akoz pou mwan Bidze Lédikasyon i *R1 billion 43 thousand and 293*. So petet PS Finans i kapab eksplike. Mersi Mr Chairman?

### **MR SPEAKER**

Mersi. PS Finans ou a eksplik sa pozisyon.

### **PS DAMIEN THESEE**

Mersi Mr Chair. Mon krwar ou pe fer referans avek pri transportasyon bann etidyan pos segonder. Parey ou konnen lannen pase ti en keksoz eksepsyonnal ki ti ganny fer, kot bann *omnibus operators* ti bezwen antre. E ti menm *extend* ek zot ziskan lafen Desanm. Menm si ti napa litilite.

*SPTC* ti'n deza *advice* ki i kapab reprenan sa servis. Me selman pou en rezon ou lot ti kontinyen donn zot. E sa lannen aktyelman pou annan serten Lekol Pos-Segonder ki *omnibus operators* pou sorti. Me

pou annan serten lekol ki *omnibus operators* pou kontinyen fer, akoz bann restriksyon lo bann bis *SPTC* ki pa, dimoun pa kapab debout. Alors zot napa sa *fleet vehicles* pou kapab ofer sa servis.

So pou annan en rediksyon dan *cost* pou *provide* sa servis. Nou'n pli ou mwen *budget* dapre sa ki nou war kou transportasyon bann etidyan pos segonder pou arive. E osi nou annan bann Lekol Belonie osi ki pe ganny transporte Bel Ombre. Tousala nou'n met an konsiderasyon.

Parkont nou konnen nou fer *mid-year review*, si ou war sityasyon i sanze oubyen sityasyon i agrave ankor ki fonksyon *SPTC* i ganny afekte. Nou bezwen revwar naturelman. So nou annan *mid-year review* pou nou get sa bann evantyalite ki arive. Mersi.

### **MR SPEAKER**

Eklersi pou mwan PS. Sa sif ki la i korek. Ki nou pe vot lo la.

### **PS DAMIEN THESEE**

*As much as possible* nou'n fer en *forecast* wi.

### **MR SPEAKER**

Mersi. Byen. Yes, Onorab Pillay.

**HON SEBASTIEN PILLAY**

Mersi Mr Chairman. Mr Chairman mon konpran tre byen ki PS. Me PS i konnen, e *from* en perspektiv prensip travay ki nou pe fer. Ler nou sorti la anndan meton nou pe vot en bidze pou en Minister, nou vot sa larzan, e nou konsyans se ki sa larzan ki nou'n vote ki pe al ganny servi. E si i an plis, si i an mwens Minister i vini i demann nou en *Supplementary Budget*.

So sa ki mon pe dir poudir pou mwan mon war li, i *irregular*, pou nou pran en lapros ki nou pe met en larzan dan *Appropriation Act* ki nou'n fini depanse. Kan pou mwan sa i devret vin koman en *supplementary* dan sa lannen ki sipoze ganny depanse.

Me lefe kot nou pri la nou koman en Lasanble, se lefe ki sa Bidze ki devan nou la i en Bidze sitan enportan ki nou pa kapab *afford* pou nou pran li en lot fason. Akoz i annan tro bokou keksoz ki sa Bidze i bezwen fer. Son lenportans stratezik e Nasyonal, ki mon pou siport sa Bidze me, mon santi poudir *it is irregular* pou pran sa pratik Mr Chairman. Mersi.

**MR SPEAKER**

Mersi. PS.

**PS DAMIEN THESEE**

Mersi Mr Chair. Tre briyevman. Nou *operate* lo en *cash basis* nou. savedir ler i dir ou 31 Desanm nou frenmen. *Anything* prezan ki annan pou fer lo *Bill* 2020 si nou pey li dan 2021. I ganny sarze dan nou *bank account* 2021. So nou pa *operate* lo *accrual basis*.

So si in ganny peye da 2021, in afekte nou *cash book* 2021. I bezwen ganny sarze dan Bidze 2021. E bokou tranzaksyon nou fer koumsa. *Even utilities, utilities* Desanm, i ganny peye dan Zanvye. So i napa naryen ekstraordiner avek sa. Mersi.

**MR SPEAKER**

Ok. Tre byen PS. Onorab Georges ou le pran laparol.

**HON BERNARD GEORGES**

Mersi Mr Chair. Mr Chair mon pa pou long. Mon ti ava kontan solman zis dir ki otan ki sa lesanz lo sityasyon *COVID* dan lekol i enteresan. Onorab *Leader* Lopozisyon ti ava'n kapab fer sa direkteman avek Komite *Platinum*, si i pa ti'n sorti lo sa Komite.

**(APPLAUSE)**

**HON BERNARD GEORGES**

Mr Chair mon pou bref. E mon pe demann 3 kestyon ki mon'n ganny demande pou demande par bann dimoun ki'n kontakte mon. E zot tre senp. Premyerman, si okenn *teacher* i refize pou en rezon konsyans ou lasante pou pran vaksen COVID. Ki pou arive avek li? Eski i pou kapab vini e kontinyen *teach*?

Dezyenmman, bann zanfan ki *fail S5, sorry, wi S5*. Eski zot pou ganny en posibilite pou zot re fer S5 ankor enn fwa oubyen eski *that is the end of the road?*

Trwazyenmman, eski Minister pe regard dan posibilite annan *mentoring* pou bann zanfan S4 ek S5 pou prepar zot pou antre dan pou fer en swa *tertiary* oubyen *post-secondary education*. Menm lo en baz volonteer par bann *peers* sa lekol? Eski pou annan en lekol pou otizm, oubyen en programm pou bann zanfan ki annan otizm dan bann lekol?

E finalman, Mr Chair avek ou permisyon Minis avek PS zot konn tre byen mon pozisyon lo *teaching*. E mon'n toulstan sey defann bann *teaching profession*, akoz i annan 2 group dimoun dan sa pei mon krwar ki ganny mal valorize. Enn se *social workers* en lot se *teachers*.

Ki zot annan dan sa Bidze ou zeneralman dan zot striktir pou fer ki *the teaching profession* i vin limero enn dan Sesel? Ki tou bann dimoun ki pe kit lekol i ava anvi vin en *teacher*. I ava anvi antre dan lansennyman olye vin en Avoka oubyen en dokter oubyen en *architect*, oubyen bann lezot koumsa. Ki zot pou fer pou *draw the best to the teaching profession instead of les zot al dan bann lezot profesyon*?

E mon pe mazin la zot pe lwe 350 lakaz. Mon mazinen annan *at least 350* dimoun ki etranze. Ki mannyer zot pe *draw the best out of* bann Seselwa, pou bann Seselwa kapab pran sa bann profesyon. Mersi Mr Chair.

### **MR SPEAKER**

Onorab Pillay ou a les Minis adres bann ... Minis.

### **MINISTER JUSTIN VALENTIN**

Mersi Mr Chair. Mersi Onorab pou ou kestyon. Ou premye kestyon adres si en ansenyan i refize pou pran vaksen? Nou a sa pwen nou pa pou kapab fer naryen, me selman i pou bezwen kontinyen vin travay. E la nou pe demann li pou li sa ansenyan byensir pran son responsabilite pou li pran son bann swen ki i neseser. Son

bann prekosyon ki i neseser pou li kapab li osi rezouir sa konteks dan ki i pe travay.

Si en etidyan *ifail S5*, dan sa klima ki nou ladan? A sa moman senserman nou pa ankor pran en pozisyon lo la. E mon krwar sa i en kestyion enteresan e enportan ki nou pou bezwen adrese imedyatman akoz nou bezwen. Nou bezwen en solisyon, en larepons pou nou dir avek bann zanfan, bann etidyan, e bann paran.

Me selman sa ki mon kapab dir a sa pwen, si zanmen en, dizon en etidyan ki ti pe al fer son *IGCSE* dizon, dan sa klima ki nou ladan, nou bezwen fleksib. E mwan, mon krwar dan fleksibilite. Si i eksprimen petet akoz petet i pa kapab al fer sa legzanmen dizon an Desanm, me i le pou li petet dan sa lot sezon ki an Me. Sa osi nou pou reflesir lo la e nou pou pran bann pozisyon. Nou pou pran bann pozisyon. E parey mon dir nou pou fleksib.

Zisteman ou pwen pou *mentoring at S4 ek S5 i koz lo careers guidance*. *Careers guidance* in en pti pe, i pa'n en lafors dan Minister Ledikasyon. Ou santi, ou santi ki bann swa ki bann etidyan pe fer pou zot al dan bann pos-segonder i pa neseserman sa swa ki zot ti'n devret fer. E la ankor nou

bezwen a tou pri fer ki *careers guidance* i ganny revwar e nou anvi finalman nou lobzektif prensipal se ki etidyan i fer sa bann bon swa dan zot karyer.

Programm otizm dan lekol, ou konnen sa i osi tonm parmi sa bann group, sa bann group parey mon ti dir pli boner dan bann, parey Lekol Eksepsyonnell. Kot mon'n met en pe latansyon lo la. Akoz depi ler mon'n fini mon'n pas dan enn, de lekol e mon'n war bokou paran ki bezwen kit travay pou vin siport, pou vin asiste zot zanfan dan lekol.

Mon pa krwar sa i neseserman petet le meyer fason. Akoz nou devret annan petet bann dimoun ki *train* pou kapab *cope* avek bann zanfan ki annan sa kondisyon. Alors i pou neseser ki li osi a en moman donnen nou komans mazin formasyon pou bann etidyan, formasyon pou bann ansenyan ki anvi travay avek zanfan dan sa bann kondisyon.

E osi an plis ki sa dan nou programm formasyon bann etidyan. Formasyon bann ansenyan, nou kapab met sa koman en konponan ladan.

*Social workers* ek *teachers* wi, zot pa neseserman ganny byen gete an term finans. I kler sa, i vre. E ou kapab prezan al en pe pli profon. E

bann *teachers* par egzant ki kot Lekol Eksepsyonnal in tann mwan dir sa bokou souvan fwa. I ti ava'n neseser osi nou komans mazin en *allowance* pou zot. Akoz sa konteks dan ki zot travay.

En *teacher* lakres par egzant, i koz ek mwan, i dir mwan, ler sezon zoranz si i annan li 30 zanfan i bezwen plis 30 zoranz dan son laklas. E ler i fer konesans laklos in fini sonnen, li prezant ki i pou bezwen sey al rod en pti morso goute. So nou konpran sa bann difikilte.

Mwan parey mon pe dir mon pou *lead* bann *thinking*, bann refleksyon lo nivo Minister Ledikasyon. Ki fer ki nou pou donn *teachers* e zanfan *the best possible deal*. E sanmenm sa ki mon pe apel mon programm '*Raising Aspirations*.' Pou ki bann zanfan, bann ki aspire pou vin bann ansenyan zot war lespwar.

E bann ansenyan zot osi ki dan sa profesyon zot war sa lespwar, sa lespwar devan. Mersi.

### **MR SPEAKER**

Mersi Minis. Eski ou *point of order* i annan pou fer avek sa prosesis Bidze ki nou pe fer la Onorab? Wi ou non?

### **HON SEBASTIEN PILLAY**

Mr Chairman mon le *raise* en *point of order* anba *Order 39, 49 and 61 (1) (d)*.

### **MR SPEAKER**

Wi ou non Onorab?

### **HON SEBASTIEN PILLAY**

I annan pou fer akoz i annan en komanter ki'n ganny fer e mon le ..... en lesplikasyon Mr Chairman.

### **MR SPEAKER**

I annan pou fer avek sa ki nou pe fer la?

### **HON SEBASTIEN PILLAY**

Wi i annan pou fer avek *Order 39, 49 e 61 (1) (d)*. Mon le zis dir Mr Chairman avek Lasanble ki *as far as I know* nou'n ganny dir yer *Platinum Committee* in zwenn *virtual* mon krwar dernyen fwa en pe letan pase. E ki malerezman si mon ti lo *Platinum* mon ti pou ganny menm resepsyon ki mon pe gannyen ek zot, ki sa ki mon ti pou dir pa ti pou ganny ekoute! Mersi Mr Chairman.

### **MR SPEAKER**

Mersi ok. Avek sa nou a pran vot lo Bidze pou Minister Ledikasyon, Ki lo paz 307 ziska 323 pou en total R1bilyon 43 milyon 293 mil.

Manm ki an faver silvouple lev lanmen?

Mersi. Madanm Clerk ou ok? Okenn Manm ki kont?

Mersi. Onorab Pillay ou pe *disturb* Lasanble ankor enn fwa. E ou fer sa konstaman. Selman letan lezot dimoun i fer ou *complain*. So, mon a dir ou silvouple ...

**(APPLAUSE)**

**MR SPEAKER**

... gard menm lord ki ou pe demann lezot dimoun garde. Mersi.

Vot pou *Ministry of Education* lo paz 307 ziskan 323 pou R1bilyon 43milyon 293 mil, in ganny 30 vot pour, 0 vot kont, e 0 abstansyon. Alor Bidze in aprouve par Lasanble.

E avek sa nou a pas dan Staz Lasanble. E nou ava *adjourn* ziskan demen bomaten 9er. Mersi.

E mersi bokou Minis e bann zofisyen Minister Ledikasyon pou zot partisipasyon. E mon swet zot bon rantre. Mersi.

**(ADJOURNMENT)**